

無量壽經五種原譯本

目錄

佛說無量清淨平等覺經	2
佛說無量清淨平等覺經卷上.....	2
佛說無量清淨平等覺經卷中.....	20
佛說無量清淨平等覺經卷下.....	34
佛說阿彌陀三耶三佛薩樓佛檀過度人道經	50
佛說阿彌陀三耶三佛薩樓佛檀過度人道經卷上.....	50
佛說阿彌陀三耶三佛薩樓佛檀過度人道經卷下.....	73
佛說無量壽經	93
佛說無量壽經卷上.....	93
佛說無量壽經卷下.....	109
大寶積經無量壽如來會	125
大寶積經無量壽如來會卷上.....	125
大寶積經無量壽如來會卷下.....	142
佛說大乘無量壽莊嚴經	158
佛說大乘無量壽莊嚴經卷上.....	158
佛說大乘無量壽莊嚴經卷中.....	165
佛說大乘無量壽莊嚴經卷下.....	172

佛說無量清淨平等覺經

佛說無量清淨平等覺經卷上

原本為(清)清龍藏本。 甲·直接校本三。 一·(甯)金陵刻經處本。 二·(大)日本大正藏本。 三·(卍)日本卍字藏本。 乙·間接校本五。 一·(麗)高麗藏本。 二·(宋)宋思溪藏本。 三·(元)元普寧藏本。 四·(明)明嘉興藏本。 五·(敦)敦煌本。 此五本均據大正·麗本則兼據卍字。 大卍所刊此經·均以麗為原本。故校勘記中·二本文字同處作麗·異處作大與卍。 文旁數字標校勘記號數。校勘記見經文後。

後漢月支三藏支婁迦讖譯

佛在王舍國靈鳥山中。與大弟子眾千二百五十人·菩薩七十二那術·比丘尼五百人·清信士七千人清信女五百人·欲天子八十萬·色天子七十萬·遍淨天子六十那術·梵天一億。皆隨佛住·神通飛化。弟子名曰·知本際·賢者馬師·賢者大力·賢者安詳·賢者能贊·賢者滿願臂·賢者無塵·賢者氏聚迦葉·賢者牛闍·賢者上時迦葉·賢者治恆迦葉·賢者金朽·坦迦葉·賢者舍利弗·賢者大目犍連·賢者大迦葉·賢者大迦旃延·賢者多睡·賢者大賈師·賢者大瘦短·賢者盈辨子·賢者不爭有無·賢者知宿命·賢者了深定·賢者善來·賢者離越·賢者癡王·賢者氏戒聚·賢者類親·賢者氏梵經·賢者多欲·賢者王宮生·賢者吉來·賢者氏黑山·賢者經剎利·賢者博聞·賢者仁吉·其女弟子名曰·大欽性比丘尼·幻者比丘尼·蓮香色比丘尼·生地動比丘尼·生地檐比丘尼·生則侍者頭痛比丘尼·安豐殖比丘尼·體柔

軟比丘尼·勇生行比丘尼·自淨比丘尼·清信士名曰·給飯
 孤獨長者·安念眾長者·快臂長者·火英長者·善容長者·
 具足寶長者·名遠聞長者·香辟疫長者·安吉長者·施寶盈
 長者·欣贊長者·胎施殷長者·供異道長者·勇降怨長者·
 寶珥長者·寶結長者·清信女名曰生儻·名曰黑哲·名曰信
 法·名曰軟善·名曰樂涼·名曰忍苦樂·名曰樂愛優婆夷·
 如此之人·皆一種類·消盡諸垢勇淨者也·無數之眾·悉共
 大會·於時佛坐·思念正道·面有九色光·數千百變·光甚
 大明·賢者阿難·即從座起·更正衣服·稽首佛足·長跪叉
 手·前白佛言·今佛面目光色·何以時時更變·明乃爾乎今
 佛面目光精·數百千色·上下明徹·好乃如是·我侍佛以
 來·未曾見佛身體光曜·巍巍重明乃爾·我未曾見至真等正
 覺·光明威神·有如今日·明好不妄·會當念諸過去當來·
 若他方佛國·今現在佛·佛告阿難·有諸天來教汝·諸佛教
 汝·令問我耶·若自從智出乎·阿難白佛言·亦無諸天·無
 諸佛教我·今問佛者·自從意出·來白佛耳·每佛坐起·若
 行出入·有所至到·所當作為·所當教勅·

我輒知佛意·今佛獨當展轉相思·故使面色光明乃如此
 耳·佛言·善哉阿難·若所問者·甚深快善·多所度脫·若
 問佛者·勝於供養一天下阿羅漢辟支佛·布施諸天人民·及
 蜎飛蠕動之類累劫·百千萬億倍矣·佛言·阿難·今諸天帝
 王人民·及蜎飛蠕動之類·汝皆度脫之·佛言·佛威神甚重
 難當·若所問者大深·汝乃慈心於佛所哀諸天人民·若比丘
 比丘尼優婆塞優婆夷大善·當爾時皆過度之·佛語阿難·如
 世間有優曇鉢樹·但有實·無有華·天下有佛·乃有華出
 耳·世間有佛·甚難得值·今我作佛·出於天下·若有大
 德·聰明善心·豫知佛意·若不妄在佛邊侍佛也·若今所
 問·善聽諦聽·佛語阿難·前已過去劫·大眾多不可計·無

邊幅不可議。乃爾時有過去佛。名錠光如來。復次有佛。名曰曜光。復次有佛。名日月香。復次有佛。名安明山。復次有佛。名日月面。復次有佛。名無塵垢。復次有佛。名無沾汙。復次有佛。名曰如龍無所不伏。復次有佛。名曰日光。復次有佛。名大音王。復次有佛。名寶潔明。復次有佛。名曰金藏。復次有佛。名燄寶光。復次有佛。名曰有舉地。復次有佛。名曰瑠璃光。復次有佛。名曰月光。復次有佛。名曰日音聲。復次有佛。名光明華。復次有佛。名神通遊持意如海。復次有佛。名嗟歎光。復次有佛。名具足寶潔。復次有佛。名曰光開化。復次有佛。名曰大香聞。復次有佛。名曰降棄恚嫉。復次有佛。名瑠璃紫磨金燄。復次有佛。名心持道華無能過者。復次有佛。名曰積眾華。復次有佛。名水月光。復次有佛。名曰除眾冥。復次有佛。名日光蓋。復次有佛。名曰溫和如來。復次有佛。名曰法意。復次有佛。名曰師子威象王步。復次有佛。名曰世豪。復次有佛。名曰淨音。復次有佛。名曰不可勝。復次有佛。名曰樓夷_𑖀羅。在中教授四十二劫。皆已過去。乃爾劫時作佛。天上天下人中之雄。經道法中勇猛之將。佛為諸天及世人民。說經講道。莫能過者。世饒王聞經道。歡喜開解。便棄國位。行作比丘。名曇摩迦留。發菩薩意。為人高才。智慧勇猛。無能踰者。與世絕異。到世饒王佛所。稽首為禮。長跪叉手。稱讚佛言。無量之光曜。威神無有極。如是之燄明。無能與等者。若以日摩尼。火月水之形。其景不可及。其色亦難比。顏色難稱量。一切世之最。如是大音聲。徧諸無數刹。成以三昧定。精進及智慧。威德無有輩。殊勝亦希有。深微諦善念。從是得佛法。持覺若如海。其限無有底。瞋恚及愚癡。世尊之所無。嗟歎佛世雄。終始無厭足。佛如好華樹。莫不愛樂者。處處人民見。一切皆歡喜。令我作佛時。願使如法

王。過度於生死。無不解脫者。檀施調伏意。戒忍及精進。如是三昧定。智慧為上最。吾誓得佛者。普逮得此事。一切諸恐懼。我為獲大安。假令有百千。億萬那術佛。如是佛之數。使如恆水沙。計以沙等佛。一切皆供養。不如求正覺。堅勇而不怯。譬如恆水中。流沙之世界。復倍不可計。無數之剎土。光焰一切照。徧此諸數國。如是精進力。威神難可量。令我為世雄。國土最第一。其眾殊妙好。道場踰諸剎。國如泥洹界。而無有等雙。我當常愍哀。度脫一切人。十方往生者。其心悅清淨。已來到我國。快樂喜安隱。幸佛見信明。是我第一證。發願在於彼。精進力所欲。十方諸世尊。皆有無礙慧。常念此尊雄。知我心所行。令我身止住。於諸苦毒中。我行精進力。忍之終不悔。法寶藏比丘。說此唱讚世饒王如來至真等正覺已。發意欲求無上正真道。最正覺。我立是願。如多陀竭佛所有者。願悉得之。拔人勤苦生死根本。悉令如佛。唯為說經所可施行。令疾得決。我作佛時。令無及者。願佛為我說諸佛國功德。我當奉持。當那中住。取願作佛。國亦如是。佛語阿難。其世饒王佛。知其高明。所願快善。即為法寶藏菩薩說經言。譬如大海水。一人斗量之。一劫不止。尚可枯盡。令海空竭。得其底泥。人至心求道。何而當不可得乎。求索精進。進不休止者。會得心中所欲願耳。法寶藏菩薩。聞世饒王佛說經如是。則大歡喜踊躍。其佛則為選擇二百一十億佛國中諸天人民善惡。國土之好醜。為選心中所願用與之。世饒王佛說經竟。法寶藏菩薩便一其心。則得天眼徹視。悉自見二百一十億諸佛國中諸天人民之善惡。國土之好醜。則選心所欲願。便結得是二十四願經。則奉行之。精進勇猛。勤苦求索。如是無央數劫。所師事供養請已過去佛。亦無央數。其法寶藏菩薩。至期然後自致得作佛。名無量清淨覺最尊。智慧勇猛。光明無比。今

現在所居國甚快善。在他方異佛國。教授八方上下無央數諸天人民。及蜎飛蠕動之類。莫不得過度解脫憂苦者。無量清淨佛為菩薩時。常奉行是二十四願。珍寶愛重。保持恭順。精進禪行之。與眾超絕。卓然有異。皆無有能及者。佛言。何等為二十四願者。一。我作佛時。令我國中。無有地獄禽獸餓鬼蜎飛蠕動之類。得是願。乃作佛。不得從是願。終不作佛。二。我作佛時。令我國中。人民有來生我國者。從我國去。不復更地獄餓鬼禽獸蠕動有生其中者。我不作佛。三。我作佛時。人民有來生我國者。不一色類金色者。我不作佛。四。我作佛時。人民有來生我國者。天人世間人有異者。我不作佛。五。我作佛時。人民有來生我國者。皆自推所從來生本末。所從來十億劫宿命。不悉知念所從來生。我不作佛。六。我作佛時。人民有來生我國者。不悉徹視。我不作佛。七。我作佛時。人民有來生我國者。不悉知他人心中所念者。我不作佛。八。我作佛時。我國中人民。不悉飛者。我不作佛。九。我作佛時。我國中人民。不悉徹聽者。我不作佛。十。我作佛時。我國中人民。有愛欲者。我不作佛。十一。我作佛時。我國中人民。住止盡般泥洹。不爾者。我不作佛。十二。我作佛時。我國諸弟子。令八方上下各千億佛國中。諸天人民蠕動之類。作緣一覺大弟子。皆禪一心。共數我國中諸弟子。住至百億劫無能數者。不爾者。我不作佛。十三。我作佛時。令我光明。勝於日月諸佛之明。百億萬倍。照無數天下窈冥之處。皆常大明。諸天人民蠕動之類。見我光明。莫不慈心作善。來生我國。不爾者。我不作佛。十四。我作佛時。令八方上下無數佛國。諸天人民蠕動之類。令得緣一覺果證弟子。坐禪一心。欲共計知我年壽幾千萬億劫。令無能知壽崖底者。不爾者。我不作佛。十五。我作佛時。人民有來生我國者。除我國中人民所願。

餘人民壽命·無有能計者。不爾者·我不作佛。十六·我作佛時·國中人民·皆使莫有惡心。不爾者·我不作佛。十七·我作佛時·令我名聞八方上下無數佛國。諸佛各於弟子眾中·歎我功德國土之善。諸天人民蠕動之類·聞我名字·皆悉踊躍·來生我國。不爾者·我不作佛。十八·我作佛時·諸佛國人民·有作菩薩道者·常念我淨潔心·壽終時·我與不可計比丘眾·飛行迎之·共在前立。即還生我國·作阿惟越致。不爾者·我不作佛。十九·我作佛時·他方佛國人民·前世為惡·聞我名字·及正為道·欲來生我國·壽終皆令不復更三惡道·則生我國·在心所願。不爾者·我不作佛。二十·我作佛時·我國諸菩薩·不一生等置是餘願功德。不爾者·我不作佛。二十一·我作佛時·我國諸菩薩·不悉三十二相者·我不作佛。二十二·我作佛時·我國諸菩薩·欲共供養八方上下無數諸佛·皆令飛行。欲得萬種自然之物·則皆在前。持用供養諸佛悉徧已後·日未中則還我國。不爾者·我不作佛。二十三·我作佛時·我國諸菩薩欲飯時·則七寶鉢中·生自然百味飲食在前。食已·皆自然去。不爾者·我不作佛。二十四·我作佛時·我國諸菩薩·說經行道·不如佛者·我不作佛。佛告阿難。無量清淨佛為菩薩時·常奉行是二十四願。分檀布施·不犯道禁·忍辱精進·一心智慧。志願常勇猛·不毀經法·求索不懈。每獨棄國捐王·絕去財色·精明求願·無所適莫。積功累德·無央數劫。自致作佛·悉皆得之·不亡其功也。佛言。無量清淨佛光明·最尊第一無比。諸佛光明·皆所不及也。八方上下無央數諸佛·中有佛頂中光明照七丈。中有佛頂中光照一里。中有佛頂中光明照五里。中有佛頂中光明照二十里。中有佛頂中光明照四十里。中有佛頂中光明照八十里。中有佛頂中光明照百六十里。中有佛頂中光明照三百二十里。中有

佛頂中光明照六百四十里。中有佛頂中光明照千三百里。中有佛頂中光明照二千六百里。中有佛頂中光明照五千二百里。中有佛頂中光明照萬四百里。中有佛頂中光明照二萬一千里。中有佛頂中光明照四萬二千里。中有佛頂中光明照八萬四千里。中有佛頂中光明照十七萬里。中有佛頂中光明照三十五萬里。中有佛頂中光明照七十萬里。中有佛頂中光明照百五十萬里。中有佛頂中光明照三百萬里。中有佛頂中光明照六百萬里。中有佛頂中光明照千二百萬里。中有佛頂中光明照一佛國。中有佛頂中光明照兩佛國。中有佛頂中光明照四佛國。中有佛頂中光明照八佛國。中有佛頂中光明照十五佛國。中有佛頂中光明照三十佛國。中有佛頂中光明照六十佛國。中有佛頂中光明照百二十佛國。中有佛頂中光明照五百佛國。中有佛頂中光明照千佛國。中有佛頂中光明照二千佛國。中有佛頂中光明照四千佛國。中有佛頂中光明照八千佛國。中有佛頂中光明照萬六千佛國。中有佛頂中光明照三萬二千佛國。中有佛頂中光明照六萬四千佛國。中有佛頂中光明照十三萬佛國。中有佛頂中光明照二十六萬佛國。中有佛頂中光明照五十萬佛國。中有佛頂中光明照百萬佛國。中有佛頂中光明照二百萬佛國。佛言。八方上下無央數諸佛。其頂中光明所照皆如是也。無量清淨佛頂中光明。焰照千萬佛國。所以諸佛光明。所照有遠近者何。本前世宿命求道為菩薩時。所願功德。各自有大小。至期然後作佛時。悉各自得之。是故令光明轉不同等。諸佛威神同等耳。自在意所欲作為不豫計。無量清淨佛光明所照最大。諸佛光明皆所不能及也。佛稱譽無量清淨佛光明。無量清淨佛光明極善。善中明好。甚快無比。絕殊無極也。無量清淨佛光明殊好。勝於日月之明百億萬倍也。無量清淨佛光明。諸佛光明中之極明也。無量清淨佛光明。諸佛光明中之極好也。無量清淨

佛光明。諸佛光明中之極雄傑也。無量清淨佛光明。諸佛光明中之快善也。無量清淨佛光明。諸佛光明中之王也。無量清淨佛光明。諸佛光明中之最極尊也。無量清淨佛光明。諸佛光明中之壽明無極。無量清淨佛光明。焰照諸無央數天下幽冥之處皆常明。諸有人民蜎飛蠕動之類。莫不見無量清淨佛光明。見無量清淨佛光明。莫不慈心歡喜者。世間諸有姪洩瞋怒愚癡。見無量清淨佛光明。莫不作善也。諸泥犁禽獸薛荔拷掠勤苦之處。見無量清淨佛光明至。皆休止不得復治。死後莫不得解脫憂苦者也。無量清淨佛光明。名聞八方上下。無窮無極。無央數佛國諸天人民。莫不聞知。聞知者。莫不得過度者。佛言。我不獨稱譽無量清淨佛光明也。八方上下無央數諸佛。辟支佛。菩薩。阿羅漢。所稱譽皆如是。佛言。其有人民。善男子善女人。聞無量清淨佛聲。稱譽光明。如是朝暮。常稱譽其光明明好。至心不斷絕。在心所欲願。往生無量清淨佛國。可得為諸菩薩阿羅漢所尊敬。智慧勇猛。若其然後作佛者。亦當復為八方上下無央數辟支佛。菩薩。阿羅漢。所稱譽光明。亦當復如是。則眾比丘僧。諸菩薩。阿羅漢。諸天帝王人民聞之。皆歡喜踊躍。莫不讚歎者。佛言。我道無量清淨佛光明。殊好巍巍。稱譽快善。晝夜一劫。尚未竟也。我但為若曹小說之耳。佛說無量清淨佛為菩薩。求索得是二十四願時。阿闍世王太子。與五百大長者迦羅越子。各持一金華蓋。前上佛已。悉却坐一面聽經。阿闍世王太子。及五百長者子。聞無量清淨佛二十四願。皆大歡喜踊躍。心中俱願言。令我等後作佛時。皆如無量清淨佛。佛則知之。告諸比丘僧。是阿闍世王太子。及五百長者子。卻後無央數劫。皆當作佛。如無量清淨佛。佛言。是阿闍世王太子。五百長者子。作菩薩道以來。無央數劫。皆各供養四百億佛已。今復來供養我。是阿闍世王太子。及

五百人等。皆前世迦葉佛時。為我作弟子。今皆復會。是共相值也。則諸比丘僧聞佛言。皆心踊躍。莫不歡喜者。佛告阿難。無量清淨佛。作佛以來。凡十小劫。所居國。名須摩提。正在西方。去是閻浮利地界千億萬須彌山佛國。其國地皆自然七寶。其一寶者名白銀。二寶者名黃金。三寶者水精。四寶者瑠璃。五寶者珊瑚。六寶者琥珀。七寶者磈磈。是七寶皆以自共為地。曠蕩甚大無極。皆自相參。轉相人中。各自焜煌。參光極明。自然軟甚。姝好無比。如其七寶地。諸八方上下眾寶中精。都自然之合會。共化生耳。其寶比如第六天上之七寶也。其國中無有須彌山。其日月星辰。第一四天王。第二忉利天。皆在虛空中。其國土無有大海水。亦無小海水。無江河恆水也。亦無山林溪谷。無有幽冥之處。其國七寶地皆平正。無有泥犁禽獸餓鬼蜎飛蠕動之類也。無阿須倫諸龍鬼神也。終無有大雨時。亦無春夏秋冬也。亦無有大寒。亦不大熱。常和調中適。甚快善無比。皆有萬種自然之物。百味飲食。意欲有所得。則自然在前。意不用者。則自然化去。比如第六天上自然之物。恣若自然。則皆隨意。其國中悉諸菩薩阿羅漢。無有婦女。壽命極壽。壽亦無央數劫。女人往生者。則化生皆作男子。但有菩薩阿羅漢無央數。悉皆洞視徹聽。悉遙相見。遙相瞻望。遙相聞語聲。悉皆求道善者。同一種類。無有異人也。其諸菩薩阿羅漢。面目皆端正清潔絕好。悉同一色。無有偏醜惡者。諸菩薩阿羅漢。皆才猛黠慧。其所衣服。皆衣自然之衣。都心中所念。常念道德。其所欲言。便皆豫相知意。其所念言道。常說正事。其國中諸菩薩阿羅漢。自共相與語言。輒說經道。終不說他餘之惡。其語言音響。如三百鐘聲。皆相敬愛。無有相憎者。皆自以長幼上下先後言之。都共往會。以義而禮。轉相敬事。如兄如弟。以仁履義。不妄動作。言語

而誠·轉相教令。不相違戾·轉相承受。皆心潔淨·無所貪慕。終無有姪洩瞋怒之心·愚癡之態也。無有邪心念婦女意也。悉智慧勇猛·和心歡樂·好喜經道。皆自知其前世所從來生。億萬劫世時·宿命善惡·存亡現在卻知無極。無量清淨佛所可教授講堂精舍·皆復自然七寶·金·銀·水精·瑠璃·白玉·琥珀·碑磔·自共轉相成也。甚殊明好·絕殊無比。亦無有作者。亦不知所從來·亦無有持來者·亦無所從去。無量清淨佛·所願德重。其人作善故·論經語義·說經行道·講會其中·自然化生耳。其講堂精舍·皆復有七寶樓觀欄楯。復以金銀水精瑠璃白玉琥珀碑磔為瓔珞。復以白珠·明月珠·摩尼珠·為交絡·覆蓋其上。皆自作五音聲。其聲甚妙無比。無量清淨佛國·諸菩薩阿羅漢所居舍宅·皆復以七寶金銀水精瑠璃珊瑚琥珀碑磔碼碯化生·轉共相成也。其舍宅皆悉各有七寶樓觀欄楯·復以金銀水精瑠璃白玉琥珀碑磔為瓔珞。復以白珠明月珠摩尼珠為交絡·覆蓋其上。皆各復自作五音聲。無量清淨佛講堂精舍·及諸菩薩阿羅漢所居七寶舍宅中·外內處處·皆復自然流泉水浴池。其浴池者·皆復以自然七寶·七寶俱生·金銀水精瑠璃珊瑚琥珀碑磔·轉共相成也。水底沙·皆復以七寶金銀水精瑠璃珊瑚琥珀事碑磔也。有純白銀池者·其底沙皆黃金也。中有純黃金池者·其水底沙皆白銀也。中有純水精池者·其水底沙皆瑠璃也。中有純瑠璃池者·其水底沙皆水精也。中有純珊瑚池者·其水底沙皆琥珀也。中有純琥珀池者·其水底沙皆珊瑚也。中有純碑磔池者·其水底沙皆碼碯也。中有純碼碯池者·其水底沙者皆碑磔也。中有純白玉池者·其水底沙者皆紫磨金也。中有純紫磨金池者·其水底沙者皆白玉也。中復有二寶共作一池者·其水底沙者皆金銀也。中復有三寶共作一池者·其水底沙者皆金銀水精也。中復有四寶共作一池

者。其水底沙金銀水精瑠璃也。中復有五寶共作一池者。其水底沙皆金銀水精瑠璃珊瑚琥珀也。中復有六寶共作一池者。其水底沙皆金銀水精瑠璃珊瑚琥珀碑磔也。中復有七寶共作一池者。其水底沙皆金銀水精瑠璃珊瑚琥珀碑磔碼碯也。其浴池中有長四十里者。中有池長八十里者。中有池長百六十里者。中有池長三百二十里者。中有池長六百四十里者。中有池長千二百八十里者。中有浴池長二千五百六十里者。中有浴池長五千一百二十里者。中有浴池長萬二百四十里者。中有浴池長二萬四百八十里者。其縱廣各適等。是浴池者。皆諸菩薩阿羅漢常所可浴池。佛言。無量清淨佛浴池。長四萬八千里。廣亦四萬八千里。其浴池。皆七寶轉自共相成。其池水底沙。皆復以七寶。白珠。明月珠。摩尼珠也。無量清淨佛及諸菩薩阿羅漢浴池中水。皆清淨香潔。中皆有香華。悉自然生百種華。種種異色異香。華皆千葉。諸華甚香無比。香不可言也。其華香者。亦復非世間之華。復勝天上之華。是華香者。八方上下眾華香中精。自然生耳。池中水流行。轉相灌注。池中水流亦不遲。亦不駛。皆復自作五音聲。佛言。八方上下無央數佛國諸天人民。及蜎飛蠕動之類。諸生無量清淨佛國者。都皆於是七寶水池蓮華中化生。便則自然長大。亦無乳養之者。皆食自然之飲食。其身體者。亦非世間人之身體也。亦非天上人之身體也。皆積眾善之德。悉受自然虛無之身體。甚姝好無比。佛語阿難。如世間貧窮乞丐人。令在帝王邊住者。其人面目形貌。何等類乎。寧類帝王面目形貌顏色不。阿難言。假令使子在帝王邊住者。其面目形狀。甚醜惡不好。不如帝王面目形類姝好百千億萬倍也。所以者何。見乞人貧窮困極。飲食未曾有美食時也。既惡食。不能得飽食。食纔支命。骨節相撐拄。無所用自給。常乏無有儲積。飢餓寒凍。怔忡愁苦。但坐其前世

宿命為人時·愚癡無智·富益慳貪。有財不肯慈哀·仁賢為善·博愛施與。但欲唐得·貪惜飲食·獨食嗜美。不信施貸·後得償報也。復不信作善·後世得其福。蒙籠頑很·益作眾惡。如是壽終·財物盡索。素無恩德·無所恃怙。入惡道中·坐之適苦。然後得出解脫·今生為人·作於下賤貧家作子。強像人形·形狀貌甚醜。衣被弊壞·單空獨立·不蔽形體。乞丐生活耳。飢寒困苦·面目羸劣·不類人色。坐其前世身之所作·受其殃罰·示眾見之。莫誰哀者。棄捐市道·暴露瘠瘦·黑醜惡極·不及人耳。所以帝王人中獨尊最好者何。皆其前世宿命為人時作善·信愛樂經道·布施恩德·博愛順義·慈仁喜與·不貪飲食·與眾共之·無所遺惜·都無違諍·得其福德·壽終德隨·不更惡道。今生為人·得生王家·自然尊貴。獨王典主·攬制人民·為人雄傑。面目潔白·和顏好色·身體端正·眾共敬事。美食好衣·隨心恣意。在樂所欲·自然在前。都無違諍。於人中殊好·無憂快樂·面色光澤·故乃爾耳。佛告阿難。若言是也。如帝王雖於人中獲好無比·當令在遮迦越王邊住者·其面目形貌甚醜惡·其狀不好·比而乞人在帝王邊住耳。帝王面醜·尚復不如遮迦越王面色殊好·百千億萬倍也。如遮迦越王於天下絕好無比·當令在第二忉利天帝釋邊住者·其面甚醜不好·尚復不如天帝釋面貌端正殊好·百千億萬倍也。如天帝釋·令在第六天王邊住者·其面貌甚醜不好·尚復不如第六天王面貌端正殊好·百千億萬倍也。如第六天王·令在無量清淨佛國中諸菩薩阿羅漢邊住者·其面甚醜。尚復不如無量清淨佛國中諸菩薩阿羅漢面貌端正殊好·百千億萬倍也。佛言。無量清淨·佛諸菩薩·阿羅漢·面貌悉皆端正·絕好無比·次於泥洹之道也。佛告阿難。無量清淨佛及諸菩薩阿羅漢講堂精舍·所居處舍宅中外浴池上·皆有七寶樹。

中有純銀樹·中有純金樹·中有純水精樹·中有純琉璃樹·
中有純白玉樹·中有純珊瑚樹·中有純琥珀樹·中有純碑磔
樹·種種各自異行。中復有兩寶共作一樹者。銀樹·銀根·
金莖·銀枝·金葉·銀華·金實。金樹者·金根·銀莖·金
枝·銀葉·金華·銀實。是兩寶樹·轉共相成·各自異行。
中復有三寶共作一樹者。銀樹·銀根·金莖·水精枝·銀
葉·金華·水精實。金樹者·金根·銀莖·水精枝·金葉·
銀華·水精實。水精樹者·水精根·銀莖·金枝·水精葉·
銀華·金實。是三寶樹·轉共相成·各自異行。中復有四寶
共作一樹者。銀樹·銀根·金莖·水精枝·琉璃葉·銀華·
金實。金樹者·金根·銀莖·水精枝·琉璃葉·金華·銀
實。水精樹者·水精根·琉璃莖·銀枝·金葉·水精華·瑠
璃實。琉璃樹者·琉璃根·水精莖·金枝·銀葉·琉璃華·
水精實。是四寶樹·轉共相成·各自異行。中復有五寶共作
一樹者。銀樹·銀根·金莖·水精枝·琉璃葉·珊瑚華·金
實。金樹者·金根·銀莖·水精枝·琉璃葉·珊瑚華·銀
實。水精樹者·水精根·琉璃莖·珊瑚枝·銀葉·金華·瑠
璃實。琉璃樹者·琉璃根·珊瑚莖·水精枝·金葉·銀華·
珊瑚實。珊瑚樹者·珊瑚根·琉璃莖·水精枝·金葉·銀
華·琉璃實。是五寶樹·轉共相成·各自異行。中復有六寶
共作一樹者。銀樹·銀根·金莖·水精枝·琉璃葉·珊瑚
華·琥珀實。金樹者·金根·銀莖·水精枝·琉璃葉·琥珀
華·珊瑚實。水精樹者·水精根·琉璃莖·珊瑚枝·銀葉·
琥珀華·金實。琉璃樹者·琉璃根·珊瑚莖·琥珀枝·水精
葉·金華銀實。珊瑚樹者·珊瑚根·琥珀莖·銀枝·金葉·
水精華·琉璃實。琥珀樹者·琥珀根·珊瑚莖·金枝·銀
葉·琉璃華·水精實。是六寶樹·轉共相成·各自異行。中
復有七寶共作一樹者。銀樹·銀根·金莖·水精節·琉璃

枝·珊瑚葉·琥珀華·碑磔實。金樹者·金根·水精莖·瑠璃節·珊瑚枝·琥珀葉·碑磔華·銀實。水精樹者·水精根·瑠璃莖·珊瑚節·琥珀枝·碑磔葉·白玉華金實。瑠璃樹者·瑠璃根·珊瑚莖·琥珀節·白玉枝·碑磔葉·水精華·銀實。珊瑚樹者·珊瑚根·琥珀莖·白玉節·銀枝·明月珠葉·金華·水精實。琥珀樹者·琥珀根·白玉莖·珊瑚節·瑠璃枝·碑磔葉·水精華·金實。白玉樹者·白玉根·碑磔莖·瑠璃節·珊瑚枝·琥珀葉·金華·摩尼珠寶。是七寶樹·轉共相成。種種各自異行。行行自相值。莖莖自相准。枝枝自相值。葉葉自相向。華華自相望。極自軟好。實實自相當。佛言。無量清淨佛講堂精舍中外內七寶浴池繞邊上諸七寶樹·及諸菩薩阿羅漢七寶舍宅中外七寶池繞池邊七寶樹·數千百重行·皆各各如是。行行自作五音聲·甚好無比。佛語阿難。如世間帝王萬種伎樂音聲·不如遮迦越王諸伎樂一音聲好百千億萬倍也。如遮迦越王萬種伎樂音聲·尚復不如第二忉利天上諸伎樂一音聲好百千億萬倍也。如忉利天上萬種伎樂之聲·尚復不如第六天上諸伎樂一音聲好百千萬倍也。如第六天上萬種音樂之聲·尚復不如無量清淨佛國中七寶樹一音聲好百千億萬倍也。無量清淨佛國·亦有萬種自然之伎樂無極也。無量清淨佛及諸菩薩阿羅漢欲浴時·便各自入其七寶池中浴。諸菩薩阿羅漢·意欲令水沒足·水則沒足。意欲令水至膝·水則至膝。意欲令水至腰·水則至腰。意欲令水至腋·水則至腋。意欲令水至頸·水則至頸。意欲令水自灌身上·水則灌身上。意欲令水轉復還如故·水則轉還復如故。恣若隨意所欲好喜。佛言。無量清淨佛及諸菩薩阿羅漢皆浴已·悉自於一蓮華上坐。則四方自然亂風起。其亂風者·亦非世間之風也·亦復非天上之風也。是亂風者·都為八方上下眾風中之自然都相合會共化生耳。其亂

風·亦不大寒·亦不大溫·常和調中適·其涼好無比。亂風徐起·亦不遲·亦不疾·適得中宜。吹國中七寶樹。七寶樹皆復自作五音聲。亂風吹華·悉覆蓋其國中。華皆自散無量清淨佛及諸菩薩阿羅漢上。華適墮地·華皆厚四寸·極自軟好無比。華小萎·則自然亂風吹萎華·悉自然去。則復四方復自然亂風起·吹七寶樹。七寶樹皆復自作五音聲。亂風吹華·悉復自然散無量清淨佛及諸菩薩阿羅漢上。華墮地·則自然亂風復吹萎華·悉自然去·則復四方自然亂風起·吹七寶樹華。如是者四及。諸菩薩阿羅漢·中有但欲聞經者·中有但欲聞音樂聲者·中有但欲聞華香者·中有不欲聞經者·中有不欲聞五音者·中有不欲聞華香者。其所欲聞者·輒則獨聞之。其所不欲聞者·了獨不聞也。則皆自然隨意·在所欲喜樂·不違其心中所欲願也。無量清淨佛及諸菩薩阿羅漢。皆浴訖已各自去。其諸菩薩阿羅漢·各自行道。中有在地講經者·中有在地誦經者·中有在地說經者·中有在地口受經者·中有在地聽經者·中有在地念經者·中有在地思道者·中有在地坐禪一心者·中有在地經行者。中有在虛空中講經者·中有在虛空中誦經者·中有在虛空中說經者·中有在虛空中口受經者·中有在虛空中聽經者·中有在虛空中念經者·中有在虛空中思念道者·中有在虛空中坐禪一心者·中有在虛空中經行者。中有未得須陀洹道者·則得須陀洹道。中有未得斯陀含道者·則得斯陀含道。中有未得阿那含道者·則得阿那含道。中有未得阿羅漢道者·則得阿羅漢道。中有未得阿惟越致菩薩者·則得阿惟越致菩薩。菩薩阿羅漢·各自說經行道·皆悉得道·莫不歡喜踊躍者。諸菩薩中·有意欲供養八方上下無央數諸佛·即皆俱前。為無量清淨佛作禮。卻長跪叉手·白佛辭行·欲供養八方上下諸無央數佛。無量清淨佛·則然可之。則使其行供養。諸菩薩等·

皆大歡喜。數千億萬人無央數不可復計。皆智慧勇猛。各自翻飛。等輩相追。俱共散飛。則行即到八方上下無央數諸佛所。皆前為佛作禮。便則供養諸佛。其諸菩薩意欲得萬種自然之物在前。則自然百種雜色華。百種自然雜繒幡綵。百種物。自然劫波育衣。自然七寶。自然燈火。自然萬種伎樂。悉皆在前。其華香萬種自然之物者。亦非世間之物也。亦復非天上之物也。是萬種之物。都為八方上下眾物自然共合會化生耳。意欲得者。則自然化生在前。意不用者。便則自化去。諸菩薩便共持供養諸佛及諸菩薩阿羅漢上。邊傍前後。迴遶周帀。自在意所欲得。則輒皆至。當爾之時。快樂不可言也。諸菩薩意各欲得四十里華。則自然四十里華在前。諸菩薩皆於虛空中共持華。則散諸佛及諸菩薩阿羅漢上。華皆在虛空中下向。華甚香好。華適小萎。便自墮地。則自然亂風吹萎華悉自然去。諸菩薩意各復欲得八十里華。則自然八十里華在前。諸菩薩皆復於虛空中共持華。散諸菩薩阿羅漢上。華皆復在虛空中下向。華小萎。便自墮地。則自然亂風吹萎華去。諸菩薩意各復欲得百六十里華。則自然百六十里華在前。諸菩薩皆復於虛空中共持華。則散諸佛及諸菩薩阿羅漢上。華皆復於虛空中下向。華適小萎。便自墮地。則自然亂風吹華悉自然去。諸菩薩意各復欲得三百二十里華。則自然三百二十里華在前。諸菩薩皆復於虛空中共持華。則散諸佛及諸菩薩阿羅漢上。華皆復在虛空中下向。華適小萎。便自墮地。則自然亂風吹華悉自然去。諸菩薩意各復欲得六百四十里華。則自然六百四十里華在前。諸菩薩皆復於虛空中共持華。散諸佛及諸菩薩阿羅漢上。華皆復在虛空中下向。華適小萎。便自墮地。則自然亂風吹華悉自然去。諸菩薩意各復欲得千二百八十里華。則自然千二百八十里華在前。諸菩薩皆復於虛空中共持華。散諸佛及諸菩薩阿羅漢

上。華皆復在虛空中下向。華適小萎。便自墮地。則自然亂風吹華悉自然去。諸菩薩意各復欲得二千五百六十里華。則自然二千五百六十里華在前。諸菩薩皆復於虛空中共持華。散諸佛及諸菩薩阿羅漢上。華皆復在虛空中下向。華適小萎。便自墮地。則自然亂風吹華悉自然去。諸菩薩意各復欲得五千一百二十里華。則自然五千一百二十里華在前。諸菩薩皆復於虛空中共持華。則散諸佛及諸菩薩阿羅漢上。華皆復在虛空中下向。華適小萎。便自墮地。則自然亂風吹華悉自然去。諸菩薩意各復欲得萬二百四十里華。則自然萬二百四十里華在前。諸菩薩皆復於虛空中共持華。散諸佛及諸菩薩阿羅漢上。華皆復在虛空中下向。華適小萎。便自墮地。則自然亂風吹華悉自然去。諸菩薩意各復欲得二萬四百八十里華。則自然二萬四百八十里華在前。諸菩薩皆復於虛空中共持華。散諸佛及諸菩薩阿羅漢上。華皆復在虛空中下向。華適小萎。便自墮地。自然亂風吹華悉自然去。諸菩薩意各復欲得五萬里華。則自然五萬里華在前。諸菩薩皆復於虛空中共持華。散諸佛及諸菩薩阿羅漢上。華皆在虛空中下向。華適小萎。便自墮地。則自然亂風吹華悉自然去。諸菩薩意各復欲得十萬里華。則自然十萬里華在前。諸菩薩皆復於虛空中共持華。則散諸佛及諸菩薩阿羅漢上。華皆在虛空中下向。華適小萎。便自墮地。則自然亂風吹華悉自然去。諸菩薩意各復欲得二十萬里華。則自然二十萬里華在前。諸菩薩皆復於虛空中共持華。則散諸佛及諸菩薩阿羅漢上。華皆在虛空中下向。華適小萎。便自墮地。則自然亂風吹華悉自然去。諸菩薩意各復欲得四十萬里華。則自然四十萬里華在前。諸菩薩皆復於虛空中共持華。則散諸佛及諸菩薩阿羅漢上。華皆在虛空中下向。華適小萎。便自墮地。則自然亂風吹華悉自然去。諸菩薩意各復欲得八十萬里華。則自然八十

萬里華在前。諸菩薩皆復於虛空中共持華。則散諸佛及諸菩薩阿羅漢上。華皆在虛空中下向。華適小萎。便自墮地。則自然亂風吹華則自然去。諸菩薩意。各復欲得百六十萬里華。則自然百六十萬里華在前。諸菩薩皆復於虛空中共持華。則散諸佛及諸菩薩阿羅漢上。華皆在虛空中下向。華適小萎。便自墮地。則自然亂風吹華悉自然去。諸菩薩意各復欲得三百萬里華。則自然三百萬里華在前。諸菩薩皆復於虛空中共持華。則散諸佛及諸菩薩阿羅漢上。華皆在虛空中下向。華適小萎。便自墮地。則自然亂風吹華悉自然去。諸菩薩意各復欲得四百萬里華。則自然四百萬里華在前。諸菩薩心意。俱大歡喜踊躍。皆在虛空中共持華。則散諸佛及諸菩薩阿羅漢上。華都自然合為一華。華正團圓。周帀各適等。華轉倍前。極自軟好。轉勝於前華好。數百千色。色色異香。甚香不可言。諸菩薩大歡喜。俱於虛空中大共作眾音自然伎樂。樂佛及諸菩薩阿羅漢。當是之時。快樂不可言。諸菩薩皆悉卻坐聽經。聽經竟。則悉皆諷誦通利。重知經道。益明智慧。其諸華香小萎。便自墮地。則自然亂風吹華悉皆自然去。則諸佛國中。從第一四天王上至三十六天上。諸菩薩阿羅漢天人。皆復於虛空中大共作眾音伎樂。諸天人前來者轉去。避後來者。後來者轉復供養。如前更相開避。諸天人歡喜聽經。皆大共作音樂。當是之時。快樂無極。諸菩薩供養聽經訖竟。便皆起為諸佛作禮而去。則復飛到八方上下無央數諸佛所。則復供養聽經。皆各如前時。悉徧以後。日未中時。諸菩薩則皆飛而去。則還其國。悉為前無量清淨佛作禮。皆卻坐一面聽經。聽經竟。皆大歡喜。

佛說無量清淨平等覺經卷上

佛說無量清淨平等覺經卷中

後漢月支三藏支婁迦讖譯

佛言。無量清淨佛及諸菩薩阿羅漢欲食時。則自然七寶几。自然劫波育。自然鬘鬘以為座。無量清淨佛及諸菩薩阿羅漢皆坐已。前悉有自然七寶鉢。中皆有自然百味飲食。飲食者。亦不類世間飲食之味也。亦復非天上飲食之味也。此百味飲食者。都為八方上下眾自然之飲食中精。味甚香美無有比。都自然化生耳。其飲食自在所欲。得味甜酢。鉢自在所欲得。諸菩薩阿羅漢。中有欲得銀鉢者。中有欲得金鉢者。中有欲得水精鉢者。中有欲得琉璃鉢者。中有欲得珊瑚鉢者。中有欲得琥珀鉢者。中有欲得白玉鉢者。中有欲得車渠鉢者。中有欲得碼碯者。中有欲得明月珠鉢者。中有欲得摩尼珠鉢者。中有欲得紫磨金鉢者。滿其中百味飲食自恣。若隨意則至。亦無所從來。亦無有供作者。自然化生耳。諸菩薩阿羅漢皆食。食亦不多。亦不少。悉自然平等。諸菩薩阿羅漢食。亦不言美惡。亦不以美故喜。食已。諸飯具鉢几坐。皆自然化去。欲食時。乃復化生耳。諸菩薩阿羅漢。皆心清潔。不慕飯食。但用作氣力耳。皆自然消散靡盡化去。佛告阿難。阿彌陀佛為諸菩薩阿羅漢說法時。都悉大會講堂上。其國諸菩薩阿羅漢及諸天人民。無央數都不可復計。皆飛到無量清淨佛所。悉前為無量清淨佛作禮。卻坐聽經。無量清淨佛。便則為諸比丘僧。諸菩薩阿羅漢。諸天人民。廣說道智大經。皆悉聞知經道。莫不歡喜踊躍心開解者。則四方自然亂風起。吹國中七寶樹。七寶樹皆復作五音聲。亂風吹七寶華。覆蓋其國。皆在虛空中下向。華甚香。極自軟好。香徧國中。華皆自散無量清淨佛及諸菩薩阿羅漢上。華墮地皆厚四寸。華適小萎。則自然亂風吹萎華自然去。則四方俱復自然亂風起。吹七寶樹。七寶樹皆復自然作五音聲。

亂風吹七寶樹華。華復如前。皆自然散無量清淨佛及諸菩薩阿羅漢上。華墮地復厚四寸。華小萎。則自然亂風吹萎華悉自然去。亂風吹華。如是四反。則第一四天王諸天人。第二忉利天上諸天人。第三天上諸天人。第四天上諸天人。第五天上諸天人。第六天上諸天人。第七梵天上諸天人。上至第十六天上諸天人。上至三十六天上諸天人。皆持天上萬種自然之物。百種雜色華。百種雜香。百種雜繒綵。百種波育毳衣。萬種伎樂。轉倍好相勝。各持來下。為無量清淨佛作禮。則供養無量清淨佛及諸菩薩阿羅漢。諸天人皆復大作伎樂。樂無量清淨佛及諸菩薩阿羅漢。當是之時。快樂不可言也。諸天人前來者轉去。避後來者。後來者轉復供養。如前更相開避。則東方無央數佛國。不可復計。如恆水邊流沙。一沙一佛。其數如是。諸佛各遣諸菩薩。無央數不可復計。皆飛到無量清淨佛所。則為無量清淨佛作禮。以頭面著佛足。悉卻坐一面聽經。聽經竟。諸菩薩皆大歡喜。悉起為無量清淨佛作禮而去。則西方無央數諸佛國。復如恆水邊流沙。一沙一佛。其數如是。諸佛各復遣諸菩薩。無央數都不可復計。皆飛到無量清淨佛所。則前為無量清淨佛作禮。以頭面著佛足。悉卻坐一面聽經。聽經竟。諸菩薩皆大歡喜。起為無量清淨佛作禮而去。則北方無央數諸佛國。復如恆水邊流沙。一沙一佛。其數如是。諸佛各復遣諸菩薩。無央數都不可復計。皆飛到無量清淨佛所。則前為無量清淨佛作禮。以頭面著佛足。悉卻坐一面聽經。聽經竟。諸菩薩皆大歡喜。起為無量清淨佛作禮而去。則南方無央數諸佛國。復如恆水邊流沙。一沙一佛。其數如是。諸佛各復遣諸菩薩。無央數都不可復計。皆飛到無量清淨佛所。則前為無量清淨佛作禮。以頭面著佛足。悉卻坐一面聽經。聽經竟。諸菩薩皆大歡喜。起為無量清淨佛作禮而去。則復四角無央數諸佛

國·各復如恆水邊流沙·一沙一佛·其數各如是。諸佛各復遣諸菩薩·無央數都不可復計·皆飛到無量清淨佛所·前為無量清淨佛作禮·以頭面著佛足·悉卻坐一面聽經。聽經竟·諸菩薩皆大歡喜·起為無量清淨佛作禮而去。佛言。八方上下諸無央數佛·更遣諸菩薩·飛到無量清淨佛所·聽經供養·轉更相開避如是。則下面諸八方無央數佛國·一方者·各復如恆水邊流沙·一沙一佛·其數復如是。諸佛各遣諸菩薩·無央數都不可復計·皆飛到無量清淨佛所·前為阿彌陀佛作禮·以頭面著佛足·悉卻坐聽經。聽經竟·諸菩薩皆大歡喜·起為無量清淨佛作禮而去。上方諸佛·更遣諸菩薩·飛到無量清淨佛所·聽經供養·更相開避。前來者則去·避後來者。後來者供養·亦復如是。終無休絕極時。

譬若如恆沙剎。東方佛國如是。各各遣諸菩薩。稽首禮無量覺。西南北面皆爾

如是恆沙數土。是諸佛遣菩薩。稽首禮無量覺。此十方菩薩飛。皆以衣祴諸華

天拘蠶種種具。往供養無量覺。諸菩薩皆大集。稽首禮無際光。遶三帀叉手住

歎國尊無量覺。皆持華散佛上。心清淨稱無量。於佛前住自說。願使我剎如此

所散華止虛空。合成蓋百由旬。其柄妙嚴飾好。悉徧覆眾會上。諸菩薩都往至

諸尊剎難得值。如是人聞佛名。快安隱得大利。吾等類得是德。諸此剎獲所好

計本國若如夢。無數劫淨此土。見菩薩遶世尊。威神猛

壽無極。國學眾其清淨

無數劫難思議。時無量世尊笑。三十六億那術。此數光從口出。徧照諸無數刹

則迴光還遶佛。三币已從頂入。色霍然不復現。天亦人皆歡喜。盧樓亘從坐起

正衣服稽首問。白佛言何緣笑。唯世尊說是意。願授我本空剎

慈護成百福相 聞是語音聲者。一切人踊躍喜。梵之音及雷霆。八種音深重聲。佛授盧樓亘決

今吾說仁諦聽。眾世界諸菩薩。到須阿提禮佛。聞歡喜廣奉行。疾得至清淨處

已到此嚴淨國。便速得神足俱。眼洞視耳徹聽。亦還得知宿命。無量覺授其決

我前世有本願。一切人聞說法。皆疾來生我國。吾所願皆具足。從眾國來生者

皆悉來到此間。一生得不退轉。若菩薩更興願。欲使國如我剎。亦念度一切人

令名願達十方。速疾超便可到。安樂國之世界。至無量光明土。供養於無數佛

其奉事億萬佛。飛變化徧諸國。恭敬已歡喜去。便還於須摩提。非有是功德人

不得聞是經名。惟有清淨戒者。乃逮聞此正法。會更見世尊雄。則得信於是事

謙恭敬聞奉行。便踊躍大歡喜。惡憍慢弊懈怠。難以信於此法。宿世時見佛者

樂聽聞世尊教。譬從生盲冥者。欲得行開導人。聲聞悉或大乘。何況於俗凡諸

天中天相知意。聲聞不了佛行。辟支佛亦如是。獨正覺乃知此。使一切悉作佛

其淨慧智本空。復過此億萬劫。計佛智無能及。講議說無數劫。盡壽命猶不知

佛之慧無邊幅。如是行清淨致。奉我教乃信是。惟此人能解了。佛所說皆能受

是則為第一證。人之命希可得。佛在世甚難值。有信慧不可致。若聞見精進求。聞是法而不忘。便見敬得大慶。則我之善親厚。以是故發道意。設令滿世界火

過此中得聞法。會當作世尊將。度一切生老死

佛語阿難。無量清淨佛為菩薩阿羅漢說經竟。諸天人人民。中有未得須陀洹道者。則得須陀洹道。中有未得斯陀含道者。則得斯陀含道。中有未得阿那含道者。則得阿那含道。中有未得阿羅漢道者。則得阿羅漢道。中有未得阿惟越致菩薩者。則得阿惟越致菩薩。阿彌陀佛。輒隨其本宿命求道時。心所喜願大小。隨意為說經。輒授之。令其疾開解得道。皆悉明慧。各自好喜所願經道。莫不喜樂誦習者。則各自諷誦經道通利。無厭無極也。諸菩薩阿羅漢。中有誦經者。其音如雷聲。中有說經者。如疾風暴雨。時諸菩薩阿羅漢。說經行道。皆各如是。盡一劫竟。終無懈倦時也。皆悉智慧勇猛。身體皆輕便。終無有痛癢極時。行步坐起。皆悉

身健。勇猛如師子中王在深林中。當有所趣向時。無有敢當者。無量清淨佛國諸菩薩阿羅漢。說經行道。皆勇猛無有疑難之意。則在心所作。為不豫計。百千億萬倍是猛師子中王也。如是猛師子中王百千億萬倍。尚復不如我第二弟子摩訶目犍連勇猛百千億萬倍也。無量清淨國諸菩薩阿羅漢。皆不勝我第二弟子摩訶目犍連也。佛言。如摩訶目犍連勇猛。於諸佛國諸阿羅漢中。最為無比。如摩訶目犍連。飛行進止。智慧勇猛。洞視徹聽。知八方上下去來現在之事。百千億萬倍。都合為一智慧勇猛。當在無量清淨佛國諸阿羅漢中者。其德尚復不如無量清淨佛國一阿羅漢智慧勇猛者。千億萬倍也。是時坐中有一菩薩。字阿逸菩薩。阿逸菩薩。則起前長跪叉手問佛言。阿彌陀佛國中諸阿羅漢。寧頗有般泥洹去者不。願欲聞之。佛告阿逸菩薩。若欲知者。如是四天下星。若見之不。阿逸菩薩言。唯然。皆見之。佛言。而我第二弟子摩訶目犍連。飛行四天下。一日一夜。徧數星知有幾枚也。如是四天下星甚眾多不可得計。尚為百千億萬倍是四天下星也。佛言。如天下大海水。減去一滲水。寧能令海水為減不。阿逸菩薩言。減大海水百千億萬斗石水。尚復不能令海減少也。佛言。阿彌陀佛國諸阿羅漢中。雖有般泥洹去者。如是大海減一小水耳。不能令諸在阿羅漢為減知少也。佛言。減大海水一谿水。寧能減海水不。阿逸菩薩言。減大海百千萬億谿水。尚復不能減海水令知減少也。佛言。阿彌陀佛國諸阿羅漢中。有般泥洹去者。如是大海減一谿水耳。不能減諸在阿羅漢為減知少也。佛言。而大海減一恆水。寧能減海水不。阿逸菩薩言。減大海水百千萬億恆水。尚復不能減大海水令知減少也。佛言。阿彌陀佛國諸阿羅漢般泥洹去者無央數。其在者新得阿羅漢者亦無央數。都不為增減也。佛言。令天下諸水。都流行入大海中。寧能令海水為增

多不。阿逸菩薩言。不能令海水增多也。所以者何。是大海為天下諸水眾善中王也。故能爾耳。佛言。無量清淨佛國亦如是。悉令八方上下無央數佛國無央數諸天人民蜎飛蠕動之類。都往生無量清淨佛國者。其輩甚大眾多。不可復計。無量清淨佛國諸菩薩阿羅漢眾比丘僧。都如常一法不異為增多也。所以者何。無量清淨佛國為最快。八方上下無央數諸佛國中。眾菩薩中王也。無量清淨佛國。為諸無央數佛國中之雄國也。無量清淨佛國。為諸無央數佛國中之珍寶也。無量清淨佛國。為諸無央數佛國中之極長久也。無量清淨佛國。為諸無央數佛國之眾傑也。無量清淨佛國。為諸無央數佛國中之廣大也。無量清淨佛國。為諸無央數佛國中都自然之無為也。無量清淨佛國。為最快明好甚樂之無極也。無量清淨佛國獨勝者何。本為菩薩求道時。所願勇猛。精進不懈。累德所致。故乃爾耳。阿逸菩薩則大歡喜。長跪叉手言。佛說無量清淨佛國諸阿羅漢般泥洹去者。甚眾多無央數。國土快善之極。明好最殊無比。乃獨爾乎。佛言。無量清淨佛國諸菩薩阿羅漢所居七寶舍宅。中有在虛空中居者。中有在地居者。中有意欲令舍宅最高者。舍宅則高。中有意欲令舍宅最大者。舍宅則大。中有意欲令舍宅在虛空中者。舍宅則在虛空中。皆自然隨意在所作為。中有殊不能令其舍宅隨意所作為者。所以者何。中有能者。皆是前世宿命求道時。慈心精進。益作諸善。德重所能致也。中有不能致者。皆是前世宿命求道時。不慈心精進作善。少德小患。各自然得之。所衣被服飲食。俱自然平等耳。是故不同。德有大小。別知勇猛。令眾見耳。佛告阿逸菩薩。若見是第六天上。天王所居處不耶。阿逸菩薩言。唯然。皆見之。佛言。無量清淨佛國土講堂舍宅。倍復勝第六天王所居處。百千億萬倍也。無量清淨佛國。其諸菩薩阿羅漢。悉皆洞視徹聽。悉復見知八方

上下去來現在之事。復知諸無央數天上天下人民及蜎飛蠕動之類。皆悉知心意所念善惡。口所欲言。皆知當何歲何劫中得度脫得人道。當往生無量清淨佛國。知當作菩薩道得阿羅漢道。皆豫知之。無量清淨佛國諸菩薩阿羅漢。其頂中光明。皆悉自有光明所照大小。其諸菩薩中。有最尊兩菩薩。常在無量清淨佛左右座邊坐侍政論。無量清淨佛。常與是兩菩薩。共對坐議八方上下去來現在之事。無量清淨佛。若欲使令是兩菩薩。到八方上下無央數諸佛所。是兩菩薩。便飛行則到八方上下無央數諸佛所。隨心所欲至到何方佛所。是兩菩薩。則俱飛行則到。飛行駛疾。如佛勇猛無比。其一菩薩。名盧樓亘。其一菩薩。名摩訶那鉢。光明智慧最第一。其兩菩薩頂中光明。各燄照他方千須彌山佛國常大明。其諸菩薩頂中光明。各照千億萬里。諸阿羅漢頂中光明。各照七丈。佛言。其世間人民。善男子善女人。若有急恐怖遭縣官事者。但自歸命是盧樓亘菩薩。無所不得解脫者也。

佛告阿逸菩薩。無量清淨佛頂中光明極大明。其日月星辰。皆在虛空中住止。亦不復迴轉運行。亦無有精光。其明皆蔽不復現。無量清淨佛光明照國中。及焰照他方佛國。常大明。終無有當冥時也。其國中無有一日二日也。無有十五日一月也。無有五月十月也。無有五歲十歲也。無有百歲千歲也。無有萬歲億歲億萬歲十億萬歲也。無有百千億萬歲也。無有千億億萬歲也。無有一劫十劫也。無有百劫千劫也。無有萬劫十萬劫也。無有千萬劫也。無有百千億萬劫也。佛言。無量清淨佛光明。光明無極。無量清淨佛光明。卻後無數劫無數劫。重復無數劫無數劫。不可復計劫。劫無央數。終無有當冥時也。無量清淨國土及諸天。終無有壞敗時也。所以者何。無量清淨佛。壽命極長。國土甚好。故能爾耳。佛言。無量清淨佛尊壽。卻後無數劫常未央。無般泥

洹時也。無量清淨佛於世間教授。意欲過度八方上下諸無央數佛國諸天人民及蜎飛蠕動之類。皆欲使往生其國。悉令得泥洹之道。其諸有作菩薩者。皆欲令悉作佛。作佛已。悉令轉復教授八方上下諸天人民及蜎飛蠕動之類。皆復欲令悉得作佛。得作佛時。復教授無央數諸天人民蠕動之類。皆令得泥洹道去。諸所可教授弟子者。展轉復相教授。轉相度脫。至令得須陀洹。斯陀含。阿那含。阿羅漢。辟支佛道。轉相度脫。皆得泥洹之道。悉如是。無量清淨佛。常未欲般泥洹日也。無量清淨佛所脫度。展轉如是。復住無數劫無數劫。不可復計劫。終無有般泥洹時也。八方上下無央數諸天人民蜎飛蠕動之類。其生無量清淨佛國者。不可復勝數。諸作阿羅漢得泥洹之道者。亦無央數。都不可復計也。無量清淨佛恩德。諸所布施。八方上下。無窮無極。甚深大無量。快善不可言也。無量清淨佛智慧教授所出經道。布告八方上下諸無央數天上天下甚多。不原其經卷數。甚大眾不可復計。都無極也。佛告阿逸菩薩。若欲知無量清淨佛壽命無極時不也。阿逸菩薩言。願皆欲聞知之。佛言。明聽。悉令八方上下諸無央數佛國中諸天人民蜎飛蠕動之類。皆使得人道。悉令作辟支佛阿羅漢。共坐禪一心。都合其智慧為一勇猛。共欲計知無量。清淨佛壽命。知壽幾千億萬劫歲數。皆無有能計知極無量清淨佛壽者也。佛言。復令他方面各千須彌山佛國中諸天人民及蜎飛蠕動之類。皆復得人道。悉令作辟支佛阿羅漢。皆令坐禪一心。共合其智慧都為一勇猛。共欲數無量清淨佛國中諸菩薩阿羅漢計千億萬人。皆無有能數者也。佛言。無量清淨佛年壽甚長久。皓皓浩浩。照明善。甚深無極無底。誰當能信知其者乎。獨佛自知耳。阿逸菩薩聞佛言。即大歡喜。長跪叉手言。佛說無量清淨壽命甚長。威神大。智慧光明巍巍快善。乃獨如是乎。佛言。無量清淨佛至

其然後般泥洹者。其盧樓亘菩薩。便當作佛總領道智。典主教授。世間八方上下。所過度諸天人民蜎飛蠕動之類。皆令得佛泥洹之道。其善福德。當得復如大師無量清淨佛。住止無央數劫無央數劫。不可復計劫不可復計劫。唯法大師。爾乃般泥洹。其次摩訶那鉢菩薩。當復作佛。典主智慧。都總教授。所過度福德。當復如大師無量清淨佛。止住無央數劫。當復不般泥洹。展轉相承受。經道甚明。國土極善。其法如是。終無有斷絕。不可極也。

阿難長跪叉手問佛言。佛說無量清淨佛國中。無有須彌山者。其第一四天王。第二忉利天。皆依因何等住止乎。願欲聞之。佛告阿難。若有疑意於佛所耶。八方上下。無窮無極。無有邊幅。其諸天下大海水。一人升量之。尚可枯盡得其底。佛智亦如是。八方上下。無窮無極。無有邊幅。佛言。我智慧所知。見諸已過去佛。如我名字釋迦文佛者。復如恆水邊流沙。一沙一佛。甫始諸來欲求作佛者。如我名字釋迦文佛者。復如恆水邊流沙。一沙一佛。佛正坐直南向視。見南方今現在佛。如我名字釋迦文佛者。復如恆水邊流沙。一沙一佛。八方上下。去來現在諸佛。如我名字釋迦文佛者。各如十恆水邊流沙。一沙一佛。其數如是。佛皆悉豫見知之。佛言。往昔過去無央數劫已來。一劫十劫百劫千劫萬劫億劫萬億劫億萬劫。劫中有佛。諸已過去佛。一佛十佛百佛千佛萬佛億佛億萬佛。中有佛。佛各各自有名字。名字不相同類。無有如我名字者。甫始當來劫。諸當來佛。一劫十劫百劫千劫萬劫億劫萬億劫億萬劫。劫中有一佛十佛百佛千佛萬佛萬億佛億萬佛。中有佛。佛各自有名字。名字各異。不同諸佛名字。時乃有一佛。如我名字釋迦文佛耳。諸八方上下無央數佛國。今現在佛。次他方異佛國。一佛國十佛國百佛國千佛國萬佛國億佛國萬億佛國億萬佛國。佛國中

有佛。各各自有名字。名字各異。多多復不可同。無有如我名字者。八方上下無央數諸佛中。時時乃有如我名字釋迦文佛耳。八方上下。去來現在。其中間曠絕甚遠。悠悠無窮無極。佛智亘然甚明。探古知今。前知無窮卻觀未然。豫知無極。都不可復計。甚無央數。佛威神尊明。皆悉知之。佛智慧道德合明。都無有能問佛經道窮極者。佛智慧終不可斗量盡也。阿難聞佛言。則大恐怖。衣毛皆起。阿難白佛言。我不敢有疑意於佛所也。所以問佛者。他方佛國。皆有須彌山。其第一四天王天。第二忉利天。皆依因之住止。我恐佛般泥洹後。儻有諸天人民。若比丘比丘。優婆塞優婆夷。來問我無量清淨佛國。何以獨無須彌山。其第一四天王。第二忉利天。皆依因何等住止乎。我等應答之。今我不問佛者。佛去後。我當將何等語報答之乎。獨佛自知耳。其餘人無有能為解之者。以是故問佛耳。佛言。阿難。若言是也。第三焰天。第四兜率天。上至第七梵天。皆依因何等住止乎。阿難言。是諸天皆自然在虛空中住止。無所依因也。佛言。無量清淨佛國。無有須彌山者。亦如是。第一四王天。第二忉利天。皆自然在虛空中住止。無所依因也。佛言。佛威神甚重。自在所欲作為。意欲有所作。不豫計也。是諸天皆常自然在虛空中住止。何況佛威神尊重。自在所欲作為乎。阿難聞佛言。則大歡喜。長跪叉手言。佛智慧知八方上下去來現在之事。無窮無極。無有邊幅。甚高大妙。絕快善。極明好。甚無比。威神尊重。不可當也。

佛告阿逸菩薩。其世間人民。若善男子善女人。欲願往生無量清淨佛國者。有三輩。作功德有大小。轉不能相及。佛言。何等為三輩。其最上第一輩者。當去家。捨妻子。斷愛欲。行作沙門。就無為道。當作菩薩道。奉行六波羅蜜經者。作沙門不當虧失經戒。慈心精進。不當瞋怒。不當與女

人交通·齋戒清淨·心無所貪慕·至精願欲生無量清淨佛國·當念至心不斷絕者。其人便今世求道時·則自於其臥睡中·夢見無量清淨佛及諸菩薩阿羅漢。其人壽命欲終時·無量清淨佛·則自與諸菩薩阿羅漢·共翻飛行迎之。則往生無量清淨佛國·便於七寶水池蓮華中化生·則自然受身長大·則作阿惟越致菩薩。便則與諸菩薩·共翻輩飛行·供養八方上下諸無央數佛。則智慧勇猛·樂聽經道·其心歡樂。所居七寶舍宅·在虛空中。恣隨其意·在所欲作為。去無量清淨佛近。佛言。諸欲往生無量清淨佛國者·精進持經戒。奉行如是上法者·往生無量清淨佛國者·可得為眾所尊敬。是為上第一輩。佛言。其中輩者。其人願欲往生無量清淨佛國·雖不能去家捨妻子斷愛欲行作沙門者·當持經戒·無得虧失·益作分檀布施·當信受佛語深·當作至誠忠信·飯食沙門·而作佛寺起塔·燒香散華然燈·懸雜繒綵·如是法者·無所適貪·不當瞋怒·齋戒清淨·慈心精進斷欲·念欲往生無量清淨佛國·一日一夜不斷絕者。其人於今世·亦復於臥睡夢中·見無量清淨佛。其人壽欲盡時·無量清淨佛·則化令其人自見無量清淨佛及國土·往生無量清淨佛國者·可得智慧勇猛。佛言。其人奉行施與如是者·若其然後中復悔·心中狐疑·不信分檀布施作諸善後世得其福·不信有無量清淨佛國·不信往生其國中。雖爾·其人續念不絕·暫信暫不信·意志猶豫·無所專據。續結其善願為本·續得往生。其人壽命病欲終時·無量清淨佛·則自化作形像·令其人目自見之。口不能復言·便心中歡喜踊躍。意念言。我悔不知益齋作善·今當生無量清淨佛國。其人則心中悔過。悔過者·過差少·無所復及。其人壽命終盡·則生無量清淨佛國·不能得前至無量清淨佛所。便道見無量清淨佛國界邊自然七寶城·心中便大歡喜·道止其城中。則於七寶水池蓮華中化

生。則受身自然長大。在城中。於是間五百歲。其城廣縱各二千里。城中亦有七寶舍宅。舍宅中。自然內皆有七寶浴池。浴池中。亦有自然華。遶浴池上。亦有七寶樹重行。皆復作五音聲。其飲食時。前亦有自然食具。百味食。在所欲得。其人於城中快樂。其城中比如第二忉利天上自然之物。其人於城中不能得出。復不能得見無量清淨佛。但見其光明。心中自悔責。踊躍喜耳。亦復不能得聞經。亦復不能得見諸比丘僧。亦復不能得見知無量清淨佛國中。諸菩薩阿羅漢狀貌何等類。其人若如是比而小適耳。佛亦不使爾身諸所作自然得之。皆心自趣向。道入其城中。其人本宿命求道時。心口各異。言念無誠。狐疑佛經。復不信向之。當自然入惡道中。無量清淨佛哀愍。威神引之去耳。其人於城中五百歲乃得出。往至無量清淨佛所。聞經。心不開解。亦復不得在諸菩薩阿羅漢比丘僧中聽經以去。所居處舍宅在地。不能令舍宅。隨意高大。在虛空中。復去無量清淨佛甚大遠。不能得近附無量清淨佛。其人智慧不明。知經復少。心不歡樂。意不開解。其人久久。亦自當智慧開解知經。明健勇猛。心當歡樂。次當復如上第一輩。所以者何。其人但坐其前世宿命求道時。不大持齋戒。虧失經法。心意狐疑。不信佛語。不信佛經深。不信分檀布施作善後世當得其福。復坐中悔。不信往生無量清淨佛國。作功德不至心。用是故。為第二中輩。佛言。其三輩者。其人願欲生無量清淨佛國。若無所用分檀布施。亦不能燒香散華。然燈懸繒綵。作佛寺起塔。飲食沙門者。當斷愛欲。無所貪慕。慈心精進。不當瞋怒。齋戒清淨。如是清淨者。當一心念欲生無量清淨佛國。晝夜十日不斷絕者。壽終則往生無量清淨佛國。可復尊極。智慧勇猛。佛言。其人作是以後。若復中作悔心。意用狐疑。不信作善後世當得其福。不信往生無量清淨佛國。其人

雖爾·續得往生。其人壽命病欲終時·無量清淨佛·則令其人於臥睡夢中·見無量清淨佛國土。其人心中歡喜。意自念言。我悔不知益作善·今當生無量清淨佛國。其人但心念是·口不能復言。則自悔過。悔過者·過差減少·悔者無所復及。其人命終·則生無量清淨佛國·不能得前至。便道見二千里七寶城·心中獨歡喜·便止其中。復於七寶水池蓮華中化生。則自然長大。其城亦復如前城法。比如第二忉利天上自然之物。其人亦復於城中五百歲。五百歲竟·乃得出至無量清淨佛所·心中大歡喜。其人聽聞經·心不開解·意不歡喜·智慧不明·知經復少。所居舍宅在地。不能令舍宅·隨意高大·在虛空中。復去無量清淨佛·亦復如前第二輩狐疑者。其人久久·亦當智慧開解·知經勇猛·心當歡樂·次如上第一輩也。所以者何。皆坐前世宿命求道時·中悔狐疑·暫信暫不信·不信作善後得其福德·皆自然得之耳。隨其功德·有鉉不鉉·各自然趣向。說經行道·卓德萬殊·超不相及。佛言。其欲求作菩薩道·生無量清淨佛國者·其然後皆當得阿惟越致菩薩。阿惟越致菩薩者·皆當有三十二相·紫磨金色·八十種好·皆當作佛。隨心所願在·欲於何方佛國作佛。終不更泥犁禽獸薜荔。隨其精進求道早晚之事·事同等耳。求道不休·會當得之·不失其所欲願也。佛告阿逸菩薩等。諸天帝王人民。我皆語若曹。諸欲生無量清淨佛國·雖不能大精進禪持經戒者·大要當作善。一者不得殺生。二者不得盜竊。三者不得婬泆·犯愛他人婦女。四者不得調欺。五者不得飲酒。六者不得兩舌。七者不得惡口。八者不得妄言。九者不得嫉。十者不得貪欲。不得心有所慳惜。不得瞋怒。不得愚癡。不得隨心嗜欲。不得心中中悔。不得狐疑。當作孝順。當作至誠忠信。當作受佛經語深。當信作善後世得其福。奉持如是其法不虧失者。在心所願·可

得往生無量清淨佛國。至要當齋戒一心清淨。晝夜常念。欲往生無量清淨佛國。十日十夜不斷絕。我皆慈哀之。悉令生無量清淨佛國。佛言。世間人。欲以慕及賢明。居家修善為道者。與妻子共居。在恩好愛欲之中。憂念若多。家事務。不暇大齋戒一心清淨。雖不能得離家。有空閑時。自端正心。意念諸善。專精行道十日十夜。殊使不能爾。自思惟熟計。欲度脫身者。下當絕念去憂。勿念家事。莫與女人同牀。自端正身心。斷愛欲。一心齋戒清淨。至意念生無量清淨佛國。一日一夜不斷絕者。壽終皆得往生其國。在七寶浴池蓮華中化生。可得智慧勇猛。所居七寶舍宅自在其意所欲作為。可次如上第一輩。佛語阿逸菩薩言。諸八方上下無央數諸天人民。比丘僧比丘尼。優婆塞優婆夷。其往生無量清淨佛國。眾等大會。皆共於七寶浴池中。都共人人悉自於一大蓮華上坐。皆自陳道德善。人人自說其前世宿命求道時。持經戒所作善法。所從來生本末。其所好喜經道。知經智慧。所施行功德。從上次下轉皆徧。以知經有明不明。有深淺大小。德有優劣厚薄。自然之道。別知才能。智慧勇健。眾相觀照。禮義和順。皆自歡喜踊躍。智慧有勇猛。各不相屬逮。佛言。其人殊不豫益作德為善。輕戲不信之然。徒倚懈怠為用可爾。至時都集。說經行道。自然迫促。應答遲晚。道智卓殊超絕。才妙高猛。獨於邊羸。臨事乃悔。悔者已出其後。當復何益。但心中戾。慕及等耳。

佛說無量清淨平等覺經卷中

佛說無量清淨平等覺經卷下

後漢月支三藏支婁迦讖譯

佛言。無量清淨佛國。諸菩薩阿羅漢眾等。大道聚會自都集。拘心制意。端身正行。遊戲洞達。俱相隨飛行。翻輦出入。供養無極。歡心喜樂。樂共觀經行道。和好文習。才猛智慧。志若虛空。精進求願心。終不復中徊。意終不復轉。終無有懈極時。雖求道外若遲緩。內獨駛急疾。容容虛空中。適得其中。中表相應。自然嚴整。檢斂端直。身心淨潔。無有愛欲有所適貪。無有眾惡瑕穢。其志願皆安定殊好。無增缺減。求道和正。不信傾邪。准望道法。隨經約令。不敢違失蹉跌。若於繩墨。遊於八方上下。無有邊幅。自在所欲至到。無窮無極。咸然為道。恢廓慕及。曠蕩念道。無他之念。無有憂思。自然無為。虛無空立。淡安無欲。作德善願。盡心求索。含哀慈愍精進。中表禮義都合。通洞無違。和順副稱。苞羅表裏。過度解脫。敢昇入於泥洹。長與道德合明。自然相保守。快意之滋滋。真真了潔白。志願高無上。清淨定安靜。樂之無有極。善好無有比。巍巍之耀照。照一旦開達明徹。自然中自然相。自然之有根本。自然成五光至九色。五光至九色參徊轉。數百千更變。最勝之自然。自然成七寶。橫攬成萬物。光精參明俱出。好甚殊無有極。其國土甚殊好若此。何不力為善。念道之自然。著於無上下。洞達無邊幅。捐志虛空中。何不各精進。努力自求索。可得超絕去。往生無量清淨阿彌陀佛國。橫截於五道。惡道自閉塞。昇道之無極。易往無有人。其國土不逆違。自然之隨牽。何不棄世事。行求道德。可得極長生。壽樂無有極。何為用世事。饒共憂無有常。世人薄俗。共爭不急之事。共於是處劇惡極苦之中。勤身治生。用相給活。無尊無卑。無富無貧。無老無少。無男無女。皆當共憂錢財。有無同然。憂思適等。屏營愁苦。累念思慮。為之走使。無有安時。有田憂田。有宅憂宅。有牛憂牛。有馬憂

馬。有六畜憂六畜。有奴婢憂奴婢。衣被錢財。金銀寶物。復共憂之。重思累息。憂念懷愁。恐橫為非常水火盜賊怨家債主。所漂燒擊擄突沒溺。憂毒怔忡。無有解時。結憤心中。惱氣恚怒。病在胸腹。憂苦心離。心慳意固。適無縱捨。或坐摧藏。終亡身命。棄捐之去。莫誰隨者。尊貴豪富。有此憂懼。勤苦若此。結眾寒熱。與痛共居。小家貧者。窮困乏無。無田亦憂欲有田。無宅亦憂欲有宅。無牛亦憂欲有牛。無馬亦憂欲有馬。無六畜亦憂欲有六畜。無奴婢亦憂欲有奴婢。無衣被錢財什物飯食之屬。亦憂欲有之。適有一少一。有是少是。思有齊等。適小具有。便復餽盡。如是苦生。當復求索。思想無益。不能時得。身心俱勞。坐起不安。憂念相隨。勤苦若此。焦心不離。恚恨獨怒。亦結眾寒熱。與痛共居。或時坐之。終身天命。亦不肯作善為道。壽命盡死。皆當獨遠去。有所趣向。善惡之道。莫能知者。或時世人。父子兄弟。夫婦家室。中外親屬。居天地之間。當相敬愛。不當相憎。有無當相給與。不當有貪。言色當和。莫相違戾。或儻心爭。有所恚怒。今世恨意。微相嫉憎。後世轉劇。至成大怨。所以者何。今世之事。更欲相患害。雖不臨時。應急相破。然之愁毒結憤。精神自然剋識。不得相離。皆當對相生值。更相報復。人在世間愛欲之中。獨來獨去死生。當行至趣苦樂之處。身自當之。無有代者。善惡變化。殃咎異處。宿豫嚴待。當獨昇入。遠到他處。莫能見者。去在何所。善惡自然追逐往生。窈窈冥冥。別離久長。道路不同。會見無期。甚難甚難。復得相值。何不棄眾事。各勵強健時。努力為善。精進求度世。可得極長壽。殊不肯求於道。復欲何須待。欲何樂乎。如是世人。不信作善得善。不信為道得道。不信死後世復生。不信施與得其福德。都不信之。亦以謂之不然。言無有是。但坐是故。且自

見之。更相看視前後。轉相承受。父餘教令。先人祖父。素不作善。本不為道。身愚神闇。心塞意閉。不見天道。殊無有能見人生死有所趣向。亦莫能知者。適無有見善惡之道。復無有語者。為用作善惡福德。殃咎禍罰。各自競作為之。用殊無有怪也。至於生死之道。轉相續。顛倒上下。無常根本。皆當過去。不可常得。教語開導。信道者少。皆當生死。無有休止。如是曹人。朦冥抵突。不信經語。各欲快意。心不計慮。愚癡於愛欲。不解於道德。迷惑於瞋怒。貪狼於財色。坐之不得道。當更勤苦極。在於惡處生。終不得止休息。痛之甚可傷。或時家室中外。父子兄弟夫婦。至於生死之義。更相哭淚。轉相思慕。憂念憤結。恩愛繞續。心意痛著。對相顧戀。晝夜無有解時。教示道德。心不開明。恩愛情欲不離。閉塞蒙蒙。交錯覆蔽。不得思計。心自端正。決斷世事。專精行道。便旋至竟。年壽命盡。不能得道。無可奈何。總猥憤謔。皆貪愛欲。如是之法。不解道者多。得道者少。世間忽忽無可聊賴。尊卑上下。豪貴貧富。男女大小。各自忽務。勤苦躬身。各懷殺毒。惡氣冥冥。莫不惆悵。為妄作事。惡逆天地。不從仁心。道德非惡。先隨與之。恣聽所為。其壽未至。便頓奪之。下入惡道。累世勤苦。展轉愁毒。數千萬億歲。無有出期。痛不可言。甚可憐愍。佛告阿逸菩薩等。諸天帝王人民。我皆語若曹。世間之事。人用是故。坐不得道。若曹熟思惟之。惡者當縱捨遠離之。從其善者。當堅持之。勿妄為非。益作諸善。大小多少。愛欲之榮。皆不可常得。猶當別離。無可樂者。曼佛世時。其有信受佛經語深。奉行道德。皆是我弟子也。其有甫欲學佛經戒者。皆是我弟子也。其有欲出身去家。捨妻子。絕去財色。欲來作沙門。為佛作比丘者。皆是我子孫。我世甚難得值。其有願欲生無量清淨佛國者。可得智慧勇猛。為

眾所尊敬。勿得隨心所欲。虧負經戒。在人後。儻有疑意不解經者。復前問佛。佛當為若解之。阿逸菩薩長跪叉手言。佛威神尊重。所說經快善。我曹聽佛經語。皆心貫思之。世人實爾。如佛所語無有異。今佛慈哀我曹。開示大道。教語生路。耳目聰明。長得度脫。若得更生。我曹聽佛經語。莫不慈心歡喜踊躍開解者。我曹及諸天帝王人民蜎飛蠕動之類。皆蒙佛恩。無不得解脫憂苦者。佛諸教戒甚深。無極無底。佛智慧所見。知八方上下去來現在之事。無上無邊幅。佛甚難得值。經道甚難得聞。念曹皆慈心於佛所。念我曹得度脫者。皆是佛前世求道時。勤苦學問精進所致。恩德普覆所施行。福德相祿巍巍。光明徹照。洞虛無極。開入泥洹。教授經典。制威消化。愍動八方上下。無窮無極。佛為師法。尊絕羣聖。都無能及佛者。佛為八方上下諸天帝王人民作師。隨其心所欲願大小。皆令得道。今我曹得與佛相見。得聞無量清淨佛聲。我曹甚喜。莫不得點慧開明者。佛告阿逸菩薩。若言是當爾。若有慈心於佛所者大善。實當念佛。天下久久。乃復有佛耳。今我於苦世作佛。所出經道。教授洞達。截斷狐疑。端心正行。拔諸愛欲。絕眾惡根本。遊步無拘。典總智慧。眾道表裏。攬持維綱。昭然分明。開示道。決正生死泥洹之道。佛言。若曹從無數劫已來。不可復計劫。若作菩薩道。欲過度諸天人民。及蜎飛蠕動之類。已來甚久遠。人從若得道度者無央數。至得泥洹之道者亦無央數。若曹及八方上下諸天帝王人民。若比丘比丘尼。優婆塞優婆夷。若曹宿命從無數劫已來。展轉是五道中。生死呼嗟。更相哭淚。轉相貪慕。憂思愁毒。痛苦不可言。至今世生死不絕。今日與佛相見共會。乃聞無量清淨佛聲。甚快善哉。助汝曹喜。亦可自厭死生痛癢。生時痛甚苦甚極。至年長大。亦痛亦苦亦極。飢時亦痛亦苦亦極。病時亦痛亦苦亦

極。死時亦痛亦苦亦極。惡臭處不潔淨。了無有可者。佛故悉語若曹。若曹亦可自決斷臭處惡露。若曹亦可端心正身。益作諸善。於是當端中表內外。潔淨身體。洒除心垢。自相約檢。表裏相應。言行忠信。人能自度脫。轉自相接扶。拔諸愛欲。精明至心。求願不轉。結其善道根本。雖精進苦一世。須臾間耳。今世為善。後世生無量清淨佛國。快樂甚無極。長與道德合明。然善極相保。長去離諸惡痛癢之臭處。拔勤苦諸惡根本。斷諸愛欲恩好。長生無量清淨國。亦無有諸痛癢。亦無復諸惡臭處。亦無復有勤苦。亦無復有婬泆瞋怒愚癡。亦無復有憂思愁毒。生於無量清淨佛國。欲壽一劫十劫百劫千劫萬劫億劫萬億劫。自恣若意。欲住上壽無央數劫。不可復計數劫。恣若隨意。皆可得之。欲食不食。恣若其意。都悉自然皆可得之。次於泥洹之道。皆各自精明求索。心所欲願。勿得狐疑心中悔欲往生者。無得坐其過失。在無量清淨佛國界邊。自然七寶城中。適五百歲。阿逸菩薩言。受佛嚴明重教。皆精進求索。請奉行之。不敢狐疑。佛告阿逸菩薩等。若曹於是世。能自制心正意。身不作惡者。是為大德善。都為八方上下最無有比。所以者何。八方上下無央數國界中。諸天人民。皆自然作善。不大為惡。易教化。今我於是世間為佛。於五惡五痛五燒之中作佛。為最劇。教語人民。令斷五惡。令去五痛。令去五燒。降化其心。令持五善。得其福德度世長壽泥洹之道。佛言。何等為五惡。何等為五痛。何等為五燒中者。何等為消化五惡。令持五善者。何等為持五善。得其福德長壽度世泥洹之道。佛言。其一惡者。諸天人民。下至禽獸蝸飛蠕動之類。欲為眾惡。強者伏弱。轉相剋賊。自相殺傷。更相食噉。不知為善。惡逆不道。受其殃罰。道之自然。當往趣向。神明記識。犯之不貫。轉相承續。故有貧窮下賤。乞丐孤獨。人有

聾盲瘖瘂愚癡弊惡。下有尫羸不及逮之屬。其有尊貴豪富。高才明達。智慧勇猛。皆其前世宿命。為善慈孝。布恩施德。故有官事王法牢獄。不肯畏慎。作惡入法。受其過謫。重罰致劇。求望解脫。難得度出。今世有是。目前現在。壽終尤劇。入其窈冥。受身更生。譬若王法。劇苦極刑。故有自然泥犁禽獸薜荔。蝸飛蠕動之屬。轉貿身形。改惡易道。壽命短長。魂神命精。自然入趣。受形寄胎。當獨值向。相從共生。轉相報償。當相還復。殃惡謫罰。眾事未盡。終不得離。展轉其中。世世累劫。無有出期。難得解脫。痛不可言。天地之間。自然有是。雖不臨時。卒暴至。應時但取自然之道。皆當善惡歸之。是為一大惡。為一痛。為一燒。勤苦如是。愁毒呼嗟。比如劇火起燒人身。人能自於其中。一心制意。端身正行。獨作諸善。不為眾惡者。身獨度脫。得其福德。可得長壽度世上天泥洹之道。是為一大善。佛言。其二惡者。世間帝王長吏人民。父子兄弟。室家夫婦。略無義理。不從正令。轉姪奢憍慢。各欲快意。恣心自在。更相欺調。殊不懼死。心口各異。言念無實。佞諂不忠。諛媚巧辭。行不端正。更相嫉憎。轉相讒惡。陷入怨枉。主上不明。心不察照。任用臣下。臣下存在。踐度能行。知其形勢。在位不正。為其所調。妄損忠良。不當天心。甚違道理。臣欺其君。子欺其父。弟欺其兄。婦欺其夫。室家中外。知識相殆。各懷貪姪。心獨恚怒。朦朧愚癡殺盜。無有尊卑上下。無男無女。無大無小。心俱同然。欲自厚己。破家亡身。不顧念前後。家室親屬。坐之破族。或時家中內外知識。朋友鄉黨。市廛愚民。轉共從事。更相利害。爭錢財鬪。忿怒成讎。轉爭勝負。慳富焦心。不肯施與。專專守惜。愛寶貪重。坐之思念。心勞身苦。如是至竟。無所恃怙。獨來獨去。無一隨者。善惡禍福。殃咎謫罰。追念所

生。或在樂處。或入毒苦。然後乃悔。當復何及。或時世人。愚心少智。見善誹謗。不肯慕及。但欲為惡。妄作非法。但欲盜竊。常懷恚心。欲得他人財物。用自供給。消散靡盡。餽復求索。邪心不正。常獨恐怖。畏人有色。臨時不計。事至乃悔。今世現在。長吏牢獄。自然趣向。受其殃咎。世間貧窮乞丐孤獨。但坐前世宿命。不信道德。不肯為善。今世為惡。天神別籍。壽終入惡道。故有自然泥犁禽獸薜荔。蝸飛蠕動之類。展轉其中。世世累劫。無有出期。難得解脫。痛不可言。是為二大惡。二痛。二燒。勤苦如是。比如火起燒人身。人能自於其中。一心制意。端身正行。獨作諸善。不為眾惡者。身獨度脫。得其福德。可得長壽度世上天泥洹之道。是為二大善。佛言。其三惡者。世間人民。寄生相假因。共依居天地之間。處年壽命。無能幾歲。至有豪貴長者。賢明善人。下有貧賤尪羸愚者。中有不良之人。但懷念毒惡。身心不正。常念姪洩。煩滿胸中。愛欲交錯。坐起不安。貪意慳惜。但欲唐得。眇眇細色。惡態恣洩。有婦厭憎。私妄出入。持家所有。相結為非。聚會飲食。自共作惡。興兵作賊。攻城格鬪。劫殺截斷。強奪不道。取人財物。偷竊趣得。不肯治生。所當求者。不肯為之。惡心在外。不能專作。欲擊成事。恐勢迫脅。持歸給家。共相生活。恣心快意。極身作樂。姪亂他人婦女。或於其親屬。不避尊卑長老。眾共憎惡。家室中外。患而苦之。亦復不畏縣官法令。無所避錄。如是之惡。自然牢獄。日月照識。神明紀取。諸神攝錄。故有自然泥犁禽獸薜荔。蝸飛蠕動之類。展轉其中。世世累劫。無有出期。難得解脫。痛不可言。是為三大惡。三痛。三燒。勤苦如是。比如若火。起燒人身。人能自於其中。一心制意。端身正行。獨作眾善。不為眾惡者。身獨度脫。得其福德。可得長壽度世上天泥洹之道。是

為三大善。佛言。其四惡者。諸惡人不能作善。自相壞敗。轉相教令。共作眾惡。主為傳言。但欲兩舌。惡口罵詈。妄語相嫉。更相鬪亂。憎嫉善人。敗壞賢善。於傍快惡。復不孝順供養父母。輕易師父。知識無信。難得誠實。自大尊貴有道。橫行威武。加權力勢。侵剋易人。不能自知為惡。不自羞慚。自用頗健。令人承事敬畏。復不敬畏天地神明日月。亦不可教令作善。不可降化。自用偃蹇。謂常當爾。亦復無憂哀心。亦不知恐懼。恣意憍慢。如是天神記識。賴其前世宿命。頗作福德。小善扶接。營護助之。今世作惡。福德盡餽。諸善鬼神。各去離之。身獨空立。無所復依。受重殃謫。壽命終身。惡繞歸。自然迫促。當往追逐。不得止息。自然眾惡共趣頓乏。其有名籍。在神明所。殃咎引牽。當值相得。當往趣向。受過謫罰。身心摧碎。神形苦極。不得離卻。但得前行。入於火鑊。當是時。悔復何益。當復何及。天道自然。不得蹉跌。故有泥犁禽獸薜荔。蝸飛蠕動之屬。展轉其中。世世累劫。無有出期。難得解脫。痛不可言。是為四大惡。四痛。四燒。勤苦如是。比如火起燒人身。人能於其中。一心制意。端身正行。獨作諸善。不為眾惡者。身獨度脫。得其福德。可得長壽度世上天泥洹之道。是為四大善。佛言。五惡者。世人徙倚懈惰。不肯作善。不念治生。妻子飢寒。父母俱然。欲訶教其子。其子惡心。瞋目應怒。言令不和。違戾反逆。劇於野人。比若怨家。不如無子。妄論假貸。眾共患厭。尤無返復。無有報償之心。窮貧困乏。不能復得。辜較諧聲。放縱遊散。串數唐得。自用賑給。不畏防禁。飲食無極。喫酒嗜美。出入無有期度。虜扈抵突。不知人情。睚眦強制。見人有善。憎嫉恚之。無義無禮。自用識當。不可諫曉。亦復不憂念父母妻子有無。又復不念酬報父母之德。亦復不念師父之恩。心常念惡。口常

言惡。日不成就。不信道德。不信有賢明先聖。不信作善為道。可得度世。不信世間有佛。欲殺羅漢。鬪比丘僧。常欲殺人。欲殺父母兄弟妻子宗親朋友。父母兄弟妻子宗親朋友。憎惡見之。欲使之死。不信佛經語。不信人壽命終盡死。後世復生。不信作善得善。不信作惡得惡。如是曹人。男子女人。心意俱然。違戾反逆。愚癡蒙冥。瞋怒嗜欲。無所識知。自用快善。為大智慧。亦不知所從來生。死所趣向。不肯慈孝。惡逆天地。於其中間。求望僥倖。欲得長生。躬得不死。會當歸就生死勤苦善惡之道。身所作惡。殃咎眾趣。不得度脫。亦不可降化令作善。慈心教語。開導生死善惡所趣有是。復不信之。然苦心與語。欲令度脫。無益其人。心中閉塞。意不開解。大命將至。至時皆悔。其後乃悔。當復何及。不豫計善。臨窮何益。天地之間。五道分明。恢廓窈窕。浩浩茫茫。轉相承受。善惡毒痛。身自當之。無有代者。道之自然。隨其所行。追命所生。不得縱捨。善人行善。從善慈孝。從樂入樂。從明入明。惡人行惡。從苦入苦。從冥入冥。誰能知者。獨佛見知耳。教語人民。信用者少。生死不休。惡道不絕。如是世人。不可悉道。故有自然泥犁禽獸薜荔。蜎飛蠕動之類。展轉其中。世世累劫。無有出期。難得解脫。痛不可言。是為五大惡。五痛。五燒。勤苦如是。比如火起燒人身。人能自於其中。一心制意。端身正行。言行相副。所作至誠。所語如語。心口不轉。獨作眾善。不為眾惡者。身獨度脫。得其福德。可得長壽度世上天泥洹之道。是為五大善。佛告阿逸菩薩等。我皆語若曹。是世五惡。勤苦如是。令起五痛。令起五燒。展轉相生。世間人民。不肯為善。欲作眾惡。敢有犯此諸惡事者。皆悉自然當具更歷入惡道中。或其今世先被病殃。死生不得。示眾見之。壽終趣入至極大苦。愁痛酷毒。自相焦

然·轉相燒滅。至其後共作怨家·更相傷殺。從小微起·至大困劇。皆從貪婬財色。不肯忍辱施與。各欲自快。無復有曲直。欲得健名。為癡欲所迫。隨心思想·不能得也。結憤胸中。財色縛束·無有解脫。不知厭足。厚己爭欲。無所省錄。都無義理·不隨正道。富貴榮華·當時快意。不能忍辱·不知施善。威勢無幾·隨惡名焦。身坐勞苦·久後大劇。自然隨逐·無有解已。王法施張·自然糾舉。上下相應·羅網綱紀。瑩瑩忪忪·當入其中。古今有是·痛哉可傷。佛語阿逸菩薩等。若世有是·佛皆慈愍哀之。威神摧動·眾惡諸事皆消化之。令得去惡就善。棄捐所思·奉持經戒。莫不承受。施行經法·不敢違失。度世無為泥洹之道·快善極樂·甚明無極。佛言。若曹諸天帝王人民·及後世人·得佛經語·熟思惟之。能自於其中·端心正行。其主上為善率化·檢御其下。教語人民·轉相勅令·轉共為善·轉相度脫。各自端守慈仁愍哀·終身不怠。尊聖敬孝·通洞博愛。佛語教令·無敢虧負。當憂度世泥洹之道。當憂斷截生死痛癢·拔惡根本。當憂斷絕泥犁禽獸薜荔·蜎飛蠕動之類·惡苦之道。當勵佛世·堅持經道·無敢失也。佛言。若曹當作善者·云何第一急。當自端身·當自端心·當自端目·當自端耳·當自端鼻·當自端口·當自端手·當自端足。能自檢斂·莫妄動作。身心淨潔·俱善相應。中外約束·勿隨嗜欲·不犯諸惡。言色當和。身行當專。行步坐起不動。作事所為·當先熟思慮計之。揆度才能·視瞻圖規·安定徐作為之。作事倉卒·不豫熟計·為之不諦·亡其功夫。敗悔在後·唐苦亡身。至誠忠信·得道絕去。佛言。若曹於是·益作諸善·布恩施德·能不犯道禁。忍辱精進·一心智慧·展轉復相教化·作善為德·如是經法·慈心專一·齋戒清淨·一日一夜者·勝於在無量清淨佛國作善百歲。所

以者何。無量清淨佛國。皆積德眾善。無為自然。在所求索。無有諸惡大如毛髮。佛言。於是作善十日十夜者。其得福勝於他方佛國中人民作善千歲。所以者何。他方佛國。皆悉作善。作善者多。為惡者少。皆有自然之物。不行求作。便自得之。是間為惡者多。為善者少。不行求作。不能得也。世人能自端制作善。至心求道。故能爾耳。是間無有自然。不能自給。當行求索。勤苦治生。轉相欺詒。調作好惡。得其財物。歸給妻子。飲苦食毒。勞心苦身。如是至竟。心意不專。周旋不安。人能自安靜為善。精進作德。故能爾耳。佛言。我皆哀若曹。及諸天帝王人民。皆教令作諸善。不為眾惡。隨其所能。輒授與道。教戒開導。悉奉行。則君率化為善。教令臣下。父教其子。兄教其弟。夫教其婦。家室內外。親屬朋友。轉相教語。作善為道。奉經持戒。各自端守。上下相檢。無尊無卑。無男無女。齋戒清淨。莫不歡喜。和順義理。歡樂慈孝。自相約檢。其有得佛經語。悉持思之。不當所作如犯為之。則自悔過。去惡就善。棄邪為正。朝聞夕改。奉持經戒。劇如貧人得寶。佛所行處。所在郡國。輒授與經戒。諸天日月星辰諸神。國王傍臣。長吏人民。諸龍鬼神。泥犁禽獸。承奉行之。則君改化為善。齋戒精思。淨自湔洒。端心正行。居位嚴慄。教勅率眾為善。奉行道禁。令言令正。臣事其君。忠直受令。不敢違負。父子言令。孝順承受。兄弟夫婦。宗親朋友。上下相令。順言和理。尊卑大小。轉相敬事。以禮如義。不相違負。莫不改往修來。洒心易行。端正中表。自然作善。所願輒得。感善降化。自然之道。求欲不死。則可得長壽。求欲度世。則可得泥洹之道。佛言。佛威神尊重。消惡化善。莫不度脫。今我出於天下。在是惡中。於苦世作佛。慈愍哀傷。教語開道。諸天帝王。傍臣左右。長吏人民。隨其心所

欲願樂。皆令得道。佛諸所行處。所更過歷郡國縣邑。丘聚市廛。莫不豐熟。天下太平。日月運照。倍益明好。風雨時節。人民安寧。強不陵弱。各得其所。無惡穢疾疫。無病瘦者。兵革不起。國無盜賊。無有怨枉。無有拘閉者。君臣人民。莫不歡喜。忠慈至誠。各自端守。皆自然守國。雍和孝順。莫不歡樂。有無相與。布恩施德。心歡樂與。皆相敬愛。推財讓義。謙讓於先。前後以禮。敬事如父如子。如兄如弟。莫不仁賢。和順禮節都無違諍。快善無極。佛言。我哀子曹。欲度脫之。劇父母念子。今八方上下諸天帝王人民。及蝸飛蠕動之類。得佛經戒。奉行佛道。皆得明慧。心悉開解。莫不得度過脫憂苦者。今我作佛。在於五惡五痛五燒之中。降化五惡。消盡五痛。絕滅五燒。以善攻惡。拔去毒苦。令得五善明好。燒惡不起。我般泥洹去後。經道稍稍斷絕。人民諛諂。淳為眾惡。不復作善。五燒復起。五痛劇苦。復如前法。自然還復。久後轉劇。不可悉說。我但為若曹小道之耳。佛告阿逸菩薩等。若曹各思持之。展轉相教戒。如佛經法。無敢犯也。阿逸菩薩長跪叉手言。佛所說。甚苦痛。世人為惡。其劇如是如是。佛皆慈哀。悉度脫之。皆言受佛重教。請展轉相教。不敢犯也。佛告阿難。我哀若曹。令悉見無量清淨佛。及諸菩薩阿羅漢。所居國土。若欲見之不。阿難則大喜。長跪叉手言。願皆欲見之。佛言。若起。更被袈裟。西向拜。當日沒處。為無量清淨佛作禮。以頭面著地。言南無無量清淨平等覺。阿難言。諾。受教。則起。更被袈裟。西向拜。當日所沒處。為無量清淨佛作禮。以頭腦著地。言南無無量清淨平等覺。阿難未起。無量清淨佛。便大放光明威神。則論八方上下諸無央數佛國。天地則皆為大震動。諸天無央數天地須彌山羅寶。摩訶須彌大山羅寶。諸天地大界小界。其中諸有大泥犁小泥犁。諸山林溪谷

幽冥之處·皆則大明·悉皆大開闢。則阿難諸菩薩阿羅漢等·諸天帝王人民·悉皆見無量清淨佛及諸菩薩阿羅漢國土七寶已·心皆大歡喜踊躍。悉起為無量清淨佛作禮·以頭腦著地·皆言南無無量清淨三藐三佛陀。無量清淨佛大放光威神已·諸無央數天人民·及蜎飛蠕動之類·皆悉見無量清淨佛光明·莫不慈心歡喜作善者。諸有泥犁禽獸薜荔·諸有考治勤苦之處·則皆休止不復治·莫不解脫憂苦者。諸有盲者·則皆得視。諸跛躄蹇者·則皆得走行。諸病者·則皆愈起。諸尪者·則皆強健。愚癡者·則皆更黠慧。諸有姪泆者·皆修梵行。瞋怒者·皆悉慈心作善。諸有被毒者·毒皆不行。鍾鼓琴瑟·笙篴樂器·諸伎不鼓·皆自作音聲。婦女珠環·皆自作聲。百鳥畜獸·皆自悲鳴。當是之時·莫不歡喜·得過度者。則時念曰。諸佛國中諸天人·莫不持天上華香來下·於虛空中·悉皆供養·散諸佛及無量清淨佛上。諸天各共大作萬種自然伎樂·樂諸佛及諸菩薩阿羅漢。當是之時·甚快樂不可言。佛告阿難阿逸菩薩等。我說無量清淨佛及諸菩薩阿羅漢國土自然七寶·當無有異乎。阿難長跪叉手言。佛說無量清淨佛國土快善。如佛所說·無有一異。佛言。我說無量清淨佛功德國土快善·晝夜一劫·尚復未竟。我但為若曹小說之耳。阿逸菩薩則長跪叉手問佛言。今佛國·從是間當有幾阿惟越致菩薩·往生無量清淨佛國。願聞之。佛言。若欲知者·明聽著心中。阿逸菩薩言。受教。佛言。從我國當有七百二十億阿惟越致菩薩·皆往生無量清淨佛國。一阿惟越致菩薩者·前後供養無央數諸佛。以次如彌勒·皆當作佛。及其餘諸小菩薩輩者·無央數不可復計·皆當往生無量清淨佛國。佛告阿逸菩薩。不但我國中諸菩薩·當往生無量清淨佛國。他方異國復有佛·亦復如是。第一佛·名光遠照·其國有百八十億菩薩·皆當往生無量清淨佛

國。他方異國第二佛。佛名寶積。其國有九十億菩薩。皆當往生無量清淨佛國。他方異國第三佛。名儒無垢。有二百二十億菩薩。皆當往生阿彌陀佛國。他方異國第四佛。名無極光明。其國有二百五十億菩薩。皆當往生無量清淨佛國。他方異國第五佛。名於世無上。其國有六百億菩薩。皆當往生無量清淨佛國。他方異國第六佛。名勇光。其國有萬四千菩薩。皆當往生無量清淨佛國。他方異國第七佛。名具足交絡。其國有十四億菩薩。皆當往生無量清淨佛國。他方異國第八佛。名雄慧王。其國有八十億菩薩。皆當往生無量清淨佛國。他方異國第九佛。名多力無過者。其國有八百一十億菩薩。皆當往生無量清淨佛國。他方異國第十佛。名吉良。其國有萬億菩薩。皆當往生無量清淨佛國。他方異國第十一佛。名慧辯。其國有萬二千菩薩。皆當往生無量清淨佛國。他方異國第十二佛。名佛。其國有諸菩薩。無央數不可復計。皆阿惟越致。皆智慧勇猛。各供養無央數諸佛已。一時俱心願欲往。皆當生無量清淨佛國。他方異國第十三佛。名樂大妙音。其國有七百九十億菩薩。皆當往生無量清淨佛國。佛言。是諸菩薩。皆阿惟越致。諸比丘僧中。及小菩薩輩。無央數。皆當往生無量清淨佛國。不獨是十四佛國中諸菩薩當往生也。都八方上下無央數佛國諸菩薩輩。各各如是。皆當往生無量清淨佛國。其無央數。都共往會無量清淨佛國。大眾多不可復計。我但說八方上下無央數佛名字。晝夜一劫尚未竟。我但復說佛國諸比丘僧眾菩薩。當往生無量清淨佛國人數。說之一劫不休止。尚未竟。我但為若曹總攬。都小說之耳。佛語阿難阿逸菩薩等。其世間帝王人民。善男子善女人。前世宿命行善所致相祿。乃當聞無量清淨佛聲。慈心歡喜。我代之喜。佛言。其有善男子善女人。聞無量清淨佛聲。慈心歡喜。一時踊躍。心意清淨。衣毛為起。淚出

者。皆前世宿命作佛道。若他方佛。故菩薩。非凡人。其有人民男子女人。聞無量清淨佛聲。不信有佛者。不信佛經語。不信有比丘僧心中狐疑。都無所信者。皆故從惡道中來生。愚蒙不解。宿命殃惡未盡。未當得度脫。故心中狐疑。不信向耳。佛言。我語若曹。若曹所當作善法。皆當奉行信之。無得以我般泥洹去後故。若曹及後世人。無得復言。我不信有無量清淨佛國。我故令若曹悉見無量清淨佛國土。所當為者。若自求之。我具為汝曹。道說經戒慎法。若曹當如佛法持之。無得毀失。我持是經。以累汝曹。汝曹當堅持之。無以為妄增減是經法。我般泥洹去後。經道留止千歲。千歲後。經道斷絕。我皆慈哀。特留是經法。止住百歲。百歲中竟。乃至休止絕。在心所願。皆可得道。佛言。師開導人耳目。智慧明達。度脫人。令得善合泥洹之道。常當慈孝於佛如父母。常念師恩。當念不斷絕。則得道疾。佛言。天下有佛者。甚難得值。人有信受師法經語深者。亦難得值。若有沙門若師。為人說佛經者。甚難得值。佛說是經時。則萬二千億諸天人民。皆得天眼徹視。悉一心皆為菩薩道。則二百二十億諸天人民。皆得阿那含道。則八百沙門。皆得阿羅漢道。則四十億菩薩。皆得阿惟越致。佛說經已。諸菩薩阿羅漢。諸天帝王人民。皆大歡喜。前趣為佛作禮。遶佛三匝。以頭面著佛足而去。

佛說無量清淨平等覺經卷下

佛說阿彌陀三耶三佛薩樓佛檀過度人道經

佛說阿彌陀三耶三佛薩樓佛檀過度人道經卷上

原本為(清)清龍藏本。 甲·直接校本二。 一·(大)日本大正藏本。 二·(卍)日本卍字藏本。 乙·間接校本四。 一·(麗)高麗藏本。 二·(宋)宋思溪藏本。 三·(元)元普寧藏本。 四·(明)明嘉興藏本。 此四本均據大正·麗本則兼據卍字。 大卍所刊此經·均以麗為原本。故校勘記中·二本文字同處作麗·異處作大與卍。 文旁數字·標校勘記號數。校勘記見經文後。

吳月氏優婆塞支謙譯

佛在羅閱祇者闍崛山中。時有摩訶比丘僧萬二千人·皆淨潔一種類·皆阿羅漢。賢者拘鄰·賢者拔智致·賢者摩訶那彌·賢者合尸·賢者須滿日·賢者維末坻·賢者不迺·賢者迦為拔坻·賢者憂為迦葉·賢者那履迦葉·賢者那翼迦葉·賢者舍利弗·賢者摩訶目犍連·賢者摩訶迦葉·賢者摩訶迦旃延·賢者摩訶揭質·賢者摩訶拘私·賢者摩訶梵提·賢者邠提文陀弗·賢者阿難律·賢者難提·賢者脾坻·賢者須楓·賢者螺越·賢者摩訶羅倪·賢者摩訶波羅延·賢者波鳩螺·賢者難待·賢者滿楓螺·賢者蔡揭·賢者厲越。如是諸比丘僧甚眾多·數千億萬人·悉諸菩薩阿羅漢·無央數不可復計·都共大會坐·皆賢者也。

時佛坐息·思念正道。面有九色光·數千百變。光色甚大明。阿難即起·更被袈裟·前以頭面著佛足。卻長跪叉手·問佛言。今日佛面光色·何以時時更變·明乃爾乎。今

佛面光精·數千百色·上下明好乃如是。我侍佛已來·未曾見佛面有如今日色者。我未曾見三耶三佛光明威神乃爾。獨當有意·願欲聞之。佛言。賢者阿難。有諸天神教汝·若諸佛教汝·今問我者耶。汝自從善意出問佛耶。阿難白佛言。無有諸天神教·亦無諸佛教我。今問佛也。我自從善心知佛意問佛耳。每佛坐起·行來出入·所欲至到·當所作為·諸所教敕者·我輒知佛意。今佛獨當念諸已過去佛·諸當來佛·若他方佛國今現在佛·獨展轉相思念故·佛面色光明乃爾耳。佛言。善哉善哉。賢者阿難。汝所問者·甚深大快·多所度脫。若問佛者·勝於供養一天下阿羅漢辟支佛·布施諸天人民及蜎飛蠕動之類累劫·百千億萬倍也。佛言。阿難。今諸天世間帝王人民·及蜎飛蠕動之類·汝皆度脫之。佛言。佛威神甚重難當也。汝所問者甚深。汝乃慈心於佛所哀諸天帝王人民·若比丘僧比丘尼優婆塞優婆夷大善·當爾皆過度之。佛語阿難。如世間有優曇樹·但有實·無有華也。天下有佛·乃有華出耳。世間有佛·甚難得值也。今我出於天下作佛。若有大德·聖明善心·豫知佛意。若不妄在佛邊侍佛也。

佛告阿難。前已過去事·摩訶僧祇以來·其劫無央數不可復計。乃爾時有過去佛·名提愨竭羅。次復有佛·名旃陀倚。已過去。次復有佛·名須摩扶劫波薩多。已過去。次復有佛·名維末樓。已過去。次復有佛·名阿難那利。已過去。次復有佛·名那竭脾。已過去。次復有佛·名耆梨俱遮波羅夜蔡。已過去。次復有佛·名彌離俱樓。已過去。次復有佛·名輒陀尼。已過去。次復有佛·名朱蹄波。已過去。次復有佛·名凡扶坻。已過去。次復有佛·名墮樓勒耶。已過去。次復有佛·名旃陀扈斯。已過去。次復有佛·名須耶惟于沙。已過去。次復有佛·名拘還彌鉢摩耆。已過去。次

復有佛·名尸利^禮歧·已過去。次復有佛·名摩訶那提·已過去。次復有佛·名耆頭摩提·已過去。次復有佛·名羅鄰祇離·已過去。次復有佛·名俞樓俱路蔡·已過去。次復有佛·名滿呼羣尼鉢賓^注·已過去。次復有佛·名旃陀邀曳^輒悉沙·已過去。次復有佛·名旃陀蔡拘岑·已過去。次復有佛·名潘波螺頻尼·已過去。次復有佛·名輒波悉斯·已過去。次復有佛·名阿術祇陀揭螺·已過去。次復有佛·名勿署提·已過去。次復有佛·名質夜蔡·已過去。次復有佛·名曇摩^憍提·已過去。次復有佛·名篩耶維^頌質·已過去。次復有佛·名樓耶帶·已過去。次復有佛·名僧迦羅彌樓迦帶·已過去。次復有佛·名曇昧摩提阿維難提·已過去。佛告阿難。次復有佛·名樓夷亘羅·在世間教授·壽四十二劫。乃爾時世·有大國王。王聞佛經道·心即歡喜開解。便棄國捐王·行作沙門·字曇摩迦·作菩薩道。為人高才·智慧勇猛·與世人絕異。往到樓夷亘羅佛所。前為佛作禮。卻住長跪叉手·白佛言。我欲求佛·為菩薩道。令我後作佛時·於八方上下諸無央數佛中·最尊智慧勇猛。頭中光明如佛光明所焰照無極。所居國土·自然七寶極自軟好。令我後作佛時·教授名字皆聞八方上下無央數佛國·莫不聞知我名字者。諸無央數天人民及蜎飛蠕動之類·諸來生我國者·悉皆令作菩薩阿羅漢·無央數都勝諸佛國。如是者·甯可得乎。佛語阿難。其樓夷亘羅佛知其高明·所願快善·即為曇摩迦菩薩說經言。譬如天下大海水·一人斗量之·一劫不止·尚可枯盡令空·得其底泥。人至心求道·何如當不可得乎。求索精進不休止·會當得心中所欲願耳。曇摩迦菩薩聞樓夷亘羅佛說經如是·即大歡喜踊躍。其佛即選擇二百一十億佛國土中諸天人民之善惡·國土之好醜·為選擇心中所欲願。樓夷亘佛說經竟·曇摩迦便一其心·即得天眼徹視·

悉自見二百一十億諸佛國中諸天人民之善惡·國土之好醜。即選擇心中所願·便結得是二十四願經·則奉行之。精進勇猛·勤苦求索·如是無央數劫。所師事供養諸已過去佛·亦無央數。其曇摩迦菩薩·至其然後自致得作佛·名阿彌陀佛最尊。智慧勇猛·光明無比。今現在所居國土甚快善。在他方異佛國·教授八方上下諸無央數天人民及蜎飛蠕動之類·莫不得過度解脫憂苦。佛語阿難。阿彌陀佛為菩薩時·常奉行是二十四願。珍寶愛重·保持恭慎·精禪行之。與眾超絕·卓然有異·皆無有能及者。

佛言。何為二十四願。第一願。使某作佛時·令我國中無有泥犁禽獸薜荔蜎飛蠕動之類。得是願·乃作佛。不得是願·終不作佛。

第二願。使某作佛時·令我國中無有婦人。女人欲來生我國中者·即作男子。諸無央數天人民蜎飛蠕動之類來生我國者·皆於七寶水池蓮華中化生長大·皆作菩薩阿羅漢·都無央數。得是願·乃作佛。不得是願·終不作佛。

第三願。使某作佛時·令我國土自然七寶·廣縱甚大·曠蕩無極·自軟好。所居舍宅·被服飲食·都皆自然·比如第六天王所居處。得是願·乃作佛。不得是願·終不作佛。

第四願。使某作佛時·令我名字·皆聞八方上下無央數佛國。皆令諸佛各於比丘僧大坐中·說我功德國土之善。諸天人民蜎飛蠕動之類·聞我名字·莫不慈心歡喜踊躍者·皆令來生我國。得是願·乃作佛。不得是願·終不作佛。

第五願。使某作佛時·令八方上下諸無央數天人民及蜎飛蠕動之類·若前世作惡·聞我名字·欲來生我國者·即便反正自悔過·為道作善·便持經戒·願欲生我國不斷絕·壽

終皆令不復泥犁禽獸薜荔。即生我國。在心所願。得是願。乃作佛。不得是願。終不作佛。

第六願。使某作佛時。令八方上下無央數佛國諸天人民若善男子善女人欲來生我國。用我故益作善。若分檀布施。遶塔燒香。散花然燈。懸雜繒綵。飯食沙門。起塔作寺。斷愛欲。齋戒清淨。一心念我。晝夜一日不斷絕。皆令來生我國作菩薩。得是願。乃作佛。不得是願。終不作佛。

第七願。使某作佛時。令八方上下無央數佛國諸天人民若善男子善女人。有作菩薩道。奉行六波羅蜜經。若作沙門。不毀經戒。斷愛欲。齋戒清淨。一心念欲生我國。晝夜不斷絕。若其人壽欲終時。我即與諸菩薩阿羅漢共飛行迎之。即來生我國。則作阿惟越致菩薩。智慧勇猛。得是願。乃作佛。不得是願。終不作佛。

第八願。使某作佛時。令我國中諸菩薩欲到他方佛國生者。皆令不更泥犁禽獸薜荔。皆令得佛道。得是願。乃作佛。不得是願。終不作佛。

第九願。使某作佛時。令我國中諸菩薩阿羅漢。面目皆端正淨潔姝好。悉同一色。都一種類。比如第六天人。得是願。乃作佛。不得是願。終不作佛。

第十願。使某作佛時。令我國中諸菩薩阿羅漢皆同一心。所念所欲言者。預相知意。得是願。乃作佛。不得是願。終不作佛。第十一願。使某作佛時。令我國中諸菩薩阿羅漢皆無有婬泆之心。終無念婦女意。終無有瞋怒愚癡者。得是願。乃作佛。不得是願。終不作佛。

第十二願。使某作佛時。令我國中諸菩薩阿羅漢皆令心

相敬愛·終無相嫉憎者。得是願·乃作佛。不得是願·終不作佛。

第十三願。使某作佛時·令我國中諸菩薩·欲共供養八方上下無央數諸佛·皆令飛行即到。欲得自然萬種之物·即皆在前。持用供養諸佛悉皆已後·日未中時即飛行還我國。得是願·乃作佛。不得是願·終不作佛。第十四願。使某作佛時·令我國中諸菩薩阿羅漢·欲飯時·即皆自然七寶鉢中有自然百味飯食在前·食已自然去。得是願·乃作佛。不得是願·終不作佛。

第十五願。使某作佛時·令我國中諸菩薩身皆紫磨金色·三十二相·八十種好·皆令如佛。得是願·乃作佛。不得是願·終不作佛。

第十六願。使某作佛時·令我國中諸菩薩阿羅漢·語者如三百鐘聲·說經行道皆如佛。得是願·乃作佛。不得是願·終不作佛。

第十七願。使某作佛時·令我洞視徹聽飛行·十倍勝於諸佛。得是願·乃作佛。不得是願·終不作佛。

第十八願。使某作佛時·令我智慧說經行道·十倍勝於諸佛。得是願·乃作佛。不得是願·終不作佛。

第十九願。使某作佛時·令八方上下無央數佛國諸天人民蜎飛蠕動之類·皆令得人道·悉作辟支佛阿羅漢·皆坐禪一心·共欲計數知我年壽幾千億萬劫歲數·皆令無有能極知壽者。得是願·乃作佛。不得是願·終不作佛。

第二十願者。使某作佛時·令八方上下各千億佛國中諸天人民蜎飛蠕動之類·皆令作辟支佛阿羅漢·皆坐禪一心·

共欲計數我國中諸菩薩阿羅漢知有幾千億萬人。皆令無有能知數者。得是願。乃作佛。不得是願。終不作佛。

第二十一願。使某作佛時。令我國中諸菩薩阿羅漢壽命無央數劫。得是願。乃作佛。不得是願。終不作佛。

第二十二願。使某作佛時。令我國中諸菩薩阿羅漢皆智慧勇猛。自知前世億萬劫時宿命所作善惡。卻知無極。皆洞視徹聽。知十方去來現在之事。得是願。乃作佛。不得是願。終不作佛。

第二十三願。使某作佛時。令我國中諸菩薩阿羅漢皆智慧勇猛。頂中皆有光明。得是願。乃作佛。不得是願。終不作佛。

第二十四願。使某作佛時。令我頂中光明絕好。勝於日月之明百千億萬倍。絕勝諸佛光明。焰照諸無央數天下幽冥之處。皆當大明。諸天人民蜎飛蠕動之類。見我光明。莫不慈心作善者。皆令來生我國。得是願。乃作佛。不得是願。終不作佛。

佛告阿難。阿彌陀為菩薩時。常奉行是二十四願。分檀布施。不犯道業。忍辱精進。一心智慧。志願常勇猛。不毀經法。求索不懈。每獨棄國捐王。絕去財色。精明求願。無所適莫。積功累德無央數劫。今自致作佛。悉皆得之。不亡其功也。佛言。阿彌陀佛光明。最尊第一無比。諸佛光明皆所不及也。八方上下無央數諸佛中。有佛頂中光明照七丈。有佛頂中光明照一里。有佛頂中光明照二里。有佛頂中光明照五里。有佛頂中光明照十里。有佛頂中光明照二十里。有佛頂中光明照四十里。有佛頂中光明照八十里。有佛頂中光明照百六十里。有佛頂中光明照三百二十里。有佛頂中光明

照六百四十里。有佛頂中光明照千三百里。有佛頂中光明照二千六百里。有佛頂中光明照五千二百里。有佛頂中光明照萬四百里。有佛頂中光明照二萬一千里。有佛頂中光明照四萬二千里。有佛頂中光明照八萬四千里。有佛頂中光明照十七萬里。有佛頂中光明照三十五萬里。有佛頂中光明照七十萬里。有佛頂中光明照百五十萬里。有佛頂中光明照三百萬里。有佛頂中光明照六百萬里。有佛頂中光明照一佛國。有佛頂中光明照兩佛國。有佛頂中光明照四佛國。有佛頂中光明照八佛國。有佛頂中光明照十五佛國。有佛頂中光明照三十佛國。有佛頂中光明照六十佛國。有佛頂中光明照百二十佛國。有佛頂中光明照二百四十佛國。有佛頂中光明照五百佛國。有佛頂中光明照千佛國。有佛頂中光明照二千佛國。有佛頂中光明照四千佛國。有佛頂中光明照八千佛國。有佛頂中光明照萬六千佛國。有佛頂中光明照三萬二千佛國。有佛頂中光明照六萬四千佛國。有佛頂中光明照十三萬佛國。有佛頂中光明照二十六萬佛國。有佛頂中光明照五十萬佛國。有佛頂中光明照百萬佛國。有佛頂中光明照二百萬佛國。佛言。諸八方上下無央數佛頂中光明所照。皆如是也。阿彌陀佛頂中光明。所照千萬佛國。所以諸佛光明。所照有近遠者何。本其前世宿命求道為菩薩時。所願功德。各自有大小。至其然後作佛時。各自得之。是故令光明轉不同等。諸佛威神同等耳。自在意所欲作為不預計。阿彌陀佛光明所照最大。諸佛光明皆所不能及也。

佛稱譽阿彌陀佛光明極善。阿彌陀佛光明極善。善中明好。甚快無比。絕殊無極也。阿彌陀佛光明清淨。無瑕穢。無缺減也。阿彌陀佛光明姝好。勝於日月之明百千億萬倍。諸佛光明中之極明也。光明中之極好也。光明中之極雄傑也。光明中之快善也。諸佛中之王也。光明中之極尊也。光

明中之最明無極也。焰照諸無數天下幽冥之處皆常大明。諸有人民蜎飛蠕動之類。莫不見阿彌陀佛光明也。見者莫不慈心歡喜者。世間諸有姪洸瞋怒愚癡者。見阿彌陀佛光明。莫不作善也。諸在泥犁禽獸薜荔拷掠勤苦之處。見阿彌陀佛光明至。皆休止不復治。死後莫不得解脫憂苦者也。阿彌陀佛光明。名聞八方上下無窮無極。無央數諸佛國諸天人民。莫不聞知。聞知者。莫不度脫也。佛言。不獨我稱譽阿彌陀佛光明也。八方上下無央數佛。辟支佛。菩薩。阿羅漢。所稱譽皆如是。佛言。其有人民。善男子善女人。聞阿彌陀佛聲。稱譽光明。朝暮常稱譽其光明好。至心不斷絕。在心所願。往生阿彌陀佛國。可得為眾菩薩阿羅漢所尊敬。若其然後作佛者。亦當復為八方上下諸無央數佛。辟支佛。菩薩。阿羅漢。所稱譽光明如是也。即眾比丘僧。諸菩薩。阿羅漢。諸天帝王人民聞之。皆歡喜踊躍。莫不讚歎者。佛言。我道阿彌陀佛光明。殊好巍巍。稱譽快善。晝夜一劫。尚未竟也。我但為若曹小說之耳。

佛說阿彌陀佛為菩薩。求索得是二十四願時。阿闍世王太子。與五百長者迦羅越子。各持一金華蓋。俱到佛所。前為佛作禮。以頭面著佛足。皆持金華蓋前上佛已。悉卻坐一面聽經。阿闍世王太子及五百長者子。聞阿彌陀佛二十四願。皆大歡喜踊躍。心中俱願言。令我等後作佛時。皆如阿彌陀佛。佛即知之。告諸比丘僧。是阿闍世王太子及五百長者子。卻後無數劫。皆當作佛。如阿彌陀佛。佛言。是阿闍世王太子及五百長者子。住菩薩道已來。無央數劫。皆各供養四百億佛已。今復來供養我。阿闍世王太子。及五百長者子等。皆前世迦葉佛時。為我作弟子。今皆復會。是共相值也。時諸比丘僧聞佛言。皆踊躍。莫不代之歡喜者。

佛告阿難。阿彌陀作佛已來。凡十小劫。所居國土。名須摩題。正在西方。去是閻浮提地界千億萬須彌山佛國。其國地皆自然七寶。其一寶者白銀。二寶者。黃金。三寶者。水精。四寶者。瑠璃。五寶者。珊瑚。六寶者。琥珀。七寶者。磲磔。是為七寶。皆以自共為地。曠蕩甚大無極。皆自相參。轉相入中。各自焜煌參明。極自軟好。甚姝無比。其七寶地。諸八方上下眾寶中精味。自然合會其化生耳。其寶皆比第六天上之七寶也。其國中無有須彌山。其日月星辰。第一四天王。第二忉利天。皆在虛空中。其國土無有大海。亦無有小海水。亦無江河恆水也。亦無有山林溪谷。無有幽冥之處。其國七寶地皆平正。無有泥犁禽獸薜荔蝮飛螻動之類。無有阿須輪諸龍鬼神。終無天雨時。亦無有春夏秋冬。亦無大寒。亦無大熱。常和調中適。甚快善無比。皆有自然萬種之物。百味飯食。意欲有所得。即自然在前。所不用者。即自然去。比如第六天上自然之物。恣若自然。即皆隨意。其國中悉諸菩薩阿羅漢。無有婦女。壽命無央數劫。女人往生。即化作男子。但有諸菩薩阿羅漢無央數。悉皆洞視徹聽。悉遙相見。遙相瞻望。遙相聞語聲。悉皆求道善者。同一種類。無有異人。其諸菩薩阿羅漢。面目皆端正淨潔絕好。悉同一色。無有偏醜惡者也。諸菩薩阿羅漢。皆才猛黠慧。皆衣自然之衣。心中所念道德。其欲語言。皆預相知意所念言。常說正事。所語輒說經道。終不說他餘之惡。其語言音響。如三百鐘聲。皆相敬愛。無相嫉憎者。皆以長幼上下先後言之。以義如禮。轉相敬事。如兄如弟。以仁履義。不妄動作。言語如誠。轉相教令。不相違戾。轉相承受。皆心淨潔。無所貪慕。終無有瞋怒姪泆之心。愚癡之態。無有邪心念婦女意。悉皆智慧勇猛。和心歡樂。好喜經道。自知前世所從來生。億萬劫時。宿命善惡。存亡現在。卻知無

極。阿彌陀佛所可教授講堂精舍。皆復自然七寶。金。銀。水精。瑠璃。白玉。琥珀。碑磔。自共相成。甚殊明好絕無比。亦無作者。不知所從來。亦無持來者。亦無所從去。阿彌陀佛所願德重。其人作善故。論經語義。說經行道。論會其中。自然化生耳。其講堂精舍。皆復有七寶樓觀欄楯。復以金銀水精瑠璃白玉琥珀碑磔為瓔珞。復以白珠。明月珠。摩尼珠。為交露。覆蓋其上。皆自作五音聲。甚好無比。諸菩薩阿羅漢所居舍宅。皆復以七寶金銀水精瑠璃珊瑚琥珀碑磔碼碯化生。轉共相成。其舍宅悉各有七寶樓觀欄楯。復以金銀水精瑠璃白玉琥珀碑磔為瓔珞。復以白珠。明月珠。摩尼珠。為交露。覆蓋其上。皆各復自作五音聲。阿彌陀佛講堂精舍。及諸菩薩阿羅漢所居舍宅中。內外處處。皆復有自然流泉浴池。皆與自然七寶俱生。金銀水精瑠璃琥珀碑磔轉共相成。淳金池者。其水底沙白銀也。淳白銀池者。其水底沙黃金也。淳水精池者。其水底沙瑠璃也。淳瑠璃池者。其水底沙水精也。淳珊瑚池者。其水底沙琥珀也。淳琥珀池者。其水底沙珊瑚也。淳碑磔池者。其水底沙碼碯也。淳碼碯池者。其水底沙碑磔也。淳白玉池者。其水底沙紫磨金也。淳紫磨金池者。其水底沙白玉也。中復有兩寶共作一池者。其水底沙金銀也。中復有三寶共作一池者。其水底沙金銀水精也。中復有四寶共作一池者。其水底沙金銀水精瑠璃也。中有五寶共作一池者。其水底沙金銀水精瑠璃珊瑚也。中有六寶共作一池者。其水底沙金銀水精瑠璃珊瑚琥珀也。中有七寶共作一池者。其水底沙金銀水精瑠璃珊瑚琥珀碑磔也。中有浴池長四十里者。有長八十里者。有長百六十里者。有長三百二十里者。有長六百四十里者。有長千二百八十里者。有長二千五百六十里者。有長五千一百二十里者。有長萬二百四十里者。有長二萬四百八十里者。其池縱廣適

等。是池者。皆諸菩薩阿羅漢常所可浴池。佛言。阿彌陀佛浴池。長四萬八千里。廣亦四萬八千里。其池皆以七寶轉共相成。其水底沙。白珠明月珠摩尼珠也。阿彌陀佛及諸菩薩阿羅漢浴池中。水皆清淨香潔。池中皆有香華。悉自然生百種華。種種異色色異香華。枝皆千華。甚香無比也。香不可言。其華者。亦非世間之華。復非天上之華。此華香都八方上下眾華香中精也。自然化生耳。其池中水流行。轉相灌注。其水流行。亦不遲不駛。皆復作五音聲。佛言。八方上下無央數佛國諸天人民及蜎飛蠕動之類。諸生阿彌陀佛國者。皆於七寶水池蓮華中化生。便自然長大。亦無乳養之者。皆食自然之飲食。其身體亦非世間人之身體。亦非天上人之身體。皆積聚眾善之德。悉受自然虛無之身。無極之體。甚姝好無比。佛語阿難。如世間貧窮乞丐人。令在帝王邊住者。其面目形狀。甯類帝王面目形狀顏色不。阿難言。假使子在帝王邊住者。其面目形狀甚醜惡不好。不如帝王百千億萬倍也。所以者何。乞人貧窮困極。飲食常惡。未嘗有美食時。既惡食。不能得飽食。食纔支命。骨節相掌拄。無以自給。常乏無有儲。飢餓寒凍。怔忡愁苦。但坐前世為人愚癡無智慳貪。不肯慈哀為善博愛施與。但欲唐得。貪惜飲食。獨食嗜美。不信施貸。後得報償。復不信作善。後世當得其福。蒙慳抵很。益作眾惡。如是壽終。財物盡索。素無恩德。無所恃怙。入惡道中。坐之適苦。然後得出解脫。今生為人。作於下賤。為貧家作子。強像人形。狀類甚醜。衣被弊壞。單空獨立。不蔽形體。乞丐生耳。飢寒困苦。面目羸劣。不類人色。坐其前世身之所作。受其殃罰。示眾見之。莫垂哀者。棄捐市道。曝露瘠瘦。黑醜惡極。不及人耳。所以帝王。人中獨尊最好者何。皆其前世為人時作善。信受經道。布恩施德。博愛順義。慈仁喜與。不貪飲食。與

眾共之。無所遺惜。都無違諍。得其善福。壽終德隨。不更惡道。今生為人。得生王家。自然尊貴。獨王典主。攬制人民。為其雄傑。面目潔白。和顏好色。身體端正。眾共敬事。美食好衣。隨心恣意。若樂所欲。自然在前。都無違諍。於人中姝好。無憂快樂。面目光澤。故乃爾耳。佛告阿難。若言是也。帝王雖於人中好無比者。當令在遮迦越王邊住者。其面形類甚醜惡不好。比如乞人在帝王邊住耳。其帝王面目。尚復不如遮迦越王面色姝好百千萬倍。如遮迦越王於天下絕好無比。當令在第二天王邊住者。其面甚醜不好。尚復不如帝釋面類端正姝好百千億萬倍。如天帝釋。令在第六天王邊住者。其面類甚醜不好。尚復不如第六天王面類端正姝好百千億萬倍。如第六天王。令在阿彌陀佛國中諸菩薩阿羅漢邊住者。其面甚醜。尚復不如阿彌陀佛國中菩薩阿羅漢面類端正姝好百千億萬倍。佛言。阿彌陀佛國諸菩薩阿羅漢。面類悉皆端正。絕好無比。次於泥洹之道。阿彌陀佛及諸菩薩阿羅漢講堂精舍。所居處舍宅中內外浴池上。皆有七寶樹。中有淳金樹。淳銀樹。淳水精樹。淳瑠璃樹。淳白玉樹。淳珊瑚樹。淳琥珀樹。淳磈磈樹。種種各自異行。中有兩寶共作一樹者。銀樹。銀根。金莖。銀枝。金葉。銀華。金實。金樹者。金根。銀莖。金枝。銀葉。金華。銀實。水精樹者。水精根。瑠璃莖。水精枝。瑠璃葉。水精華。瑠璃實。瑠璃樹者。瑠璃根。水精莖。瑠璃枝。水精葉。瑠璃華。水精實。是二寶共作一樹。中復有四寶共作一樹者。水精樹。水精根。瑠璃莖。金枝。銀葉。水精華。瑠璃實。瑠璃樹者。瑠璃根。水精莖。金枝。銀葉。水精華。瑠璃實。是四寶樹。轉共相成。各自異行。中復有五寶共作一樹者。銀樹。銀根。金莖。水精枝。瑠璃葉。銀華。金實。金樹者。金根。銀莖。水精枝。瑠璃葉。珊瑚華。銀實。水精樹

者。水精根瑠璃莖。珊瑚枝銀葉。金華瑠璃實。瑠璃樹者。瑠璃根珊瑚莖。水精枝。金葉。銀華。珊瑚實。珊瑚樹者。珊瑚根。瑠璃莖。水精枝。金葉。銀華。瑠璃實。是五寶共作一樹。各自異行。中復有六寶共作一樹者。銀樹。銀根。金莖。水精枝。瑠璃葉。珊瑚華。琥珀實。金樹者。金根。銀莖。水精枝。瑠璃葉。琥珀華。珊瑚實。水精樹者。水精根。瑠璃莖。珊瑚枝。琥珀葉。銀華。金實。瑠璃樹者。瑠璃根。珊瑚莖。琥珀枝。水精葉。金華。銀實。是六寶樹。轉共相成。各自異行。中復有七寶共作一樹者。銀樹。銀根。金莖。水精枝。瑠璃葉。珊瑚華。琥珀實。金樹者。金根。水精莖。瑠璃枝。珊瑚葉。琥珀華。銀實。水精樹者。水精根。瑠璃莖。珊瑚枝。琥珀葉。碑磔華白玉實。珊瑚樹者。珊瑚根。琥珀莖。白玉枝。瑠璃葉。碑磔華。明月珠實。琥珀樹者。琥珀根。白玉莖。珊瑚枝。瑠璃葉。水精華。金實。白玉樹者。白玉根。碑磔莖。珊瑚枝。琥珀葉。金華。摩尼珠寶。是七寶樹。轉共相成。種種各自異行。行行相值。莖莖自相准。枝枝自相值。葉葉自相向。華華自相望。實實自相當。佛言。阿彌陀佛當講堂精舍中內外七寶浴池繞邊上諸七寶樹。及諸菩薩阿羅漢七寶舍宅中內外七寶浴池繞池邊諸七寶樹。數千百重行。皆各如是。各自作五音聲。音聲甚好無比也。佛告阿難。如世間帝王有百種伎樂音聲。不如遮迦越王諸伎樂音聲好百千億萬倍。如遮迦越王萬種伎樂音聲。尚復不如第二忉利天上諸伎樂一音聲百千億萬倍。如忉利天上萬種伎樂之聲。尚復不如第六天上一音聲好百千億萬倍。如第六天上萬種音樂之聲。尚復不如阿彌陀佛國中七寶樹一音聲好百千億萬倍。阿彌陀佛國中。亦有萬種自然伎樂。甚樂無極。阿彌陀佛及諸菩薩阿羅漢欲浴時。便各自可入其七寶池中浴。諸菩薩阿羅漢意欲令水沒足。水即

沒足。意欲令水至膝。水即至膝。意欲令水至腰。水即至腰。意欲令水至腋。水即至腋。意欲令水至頸。水即至頸。意欲令水自灌身上。水即自灌身上。意欲令水還復如故。水即還復如故。恣若隨意所欲好喜。佛言。阿彌陀及諸菩薩阿羅漢皆浴已。悉自於一大蓮華上坐。即四方自然亂風起。其亂風者。亦非世間之風。亦非天上之風。都八方上下眾風中精。自然合會化生耳。不寒不熱。常和調中適。甚清涼好無比也。徐起。不遲不駛。適得中宜。吹七寶樹皆作五音聲。以七寶樹華悉覆其國中。皆散佛及諸菩薩阿羅漢上。華隨墮地。皆厚四寸。極自軟好無比。即自然亂風吹萎華。悉自然去。即復四方自然亂風吹七寶樹。樹皆復作五音聲。樹華皆自然散佛及諸菩薩阿羅漢上。華小萎墮地。即自然去。即復四方亂風起吹七寶樹。如是四返。諸菩薩阿羅漢。中有但欲聞經者。中有但欲聞音樂者。中有但欲聞華香者。有不欲聞經者。有不欲聞音樂聲者。有不欲聞華香者。其所欲聞者。輒即獨聞之。不欲聞者。則獨不聞。隨意所欲喜樂。不違其願也。浴訖。各自去行道。中有在地講經者。誦經者。說經者。口受經者。聽經者。念經者。思道者。坐禪者。經行者。中有在虛空中講經者。誦經者。說經者。口受經者。聽經者。念經者。思道者。坐禪一心者。經行者。未得須陀洹道者。即得須陀洹道。未得斯陀含道者。即得斯陀含道。未得阿那含道者。即得阿那含道。未得阿羅漢道者。即得阿羅漢道。未得阿惟越致菩薩者。即得阿惟越致。各自說經行道。悉皆得道。莫不歡喜踊躍者也。諸菩薩中。有意欲供養八方上下無央數諸佛。即皆俱前為佛作禮。白佛辭行。供養八方上下無央數佛。佛即然可之。即使行。諸菩薩皆大歡喜。數千億萬人。無央數不可復計。皆當智慧勇猛。各自翻輩飛相追。俱共散飛。則到八方上下無央數諸佛所。皆前為

諸佛作禮。即便供養。意欲得萬種自然之物在前。即自然百種雜色華。百種雜繒綵。百種劫波育衣。七寶燈火。萬種伎樂。悉皆在前。其華香萬種自然之物。亦非世間之物。亦非天上之物也。是萬種物都八方上下眾自然合會化生耳。意欲得者。即自然化生。意不用者。即化去。諸菩薩便共持供養諸佛及諸菩薩阿羅漢。邊傍前後。迴遶周帀。在意所欲。即輒皆至。當是之時。快樂不可言也。諸菩薩意各欲得四十里華。即自然在前。便於虛空中。共持散諸佛及菩薩阿羅漢上。皆在虛空中下向。華甚香好。小萎墮地。即自然亂風吹萎華悉自然去。諸菩薩意各復欲得八十里華。即自然在前。共持散諸佛及諸菩薩阿羅漢上。華皆復在虛空中下向。小萎墮地。即自然亂風吹萎華悉自然去。諸菩薩意各復欲得百六十里華。即自然在前。便於虛空中共持散諸佛及諸菩薩阿羅漢上。華皆復於虛空中下向。小萎墮地。即自然亂風吹萎華悉自然去。諸菩薩意各復欲得三百二十里華。即自然在前。復於虛空中持散諸佛及諸菩薩阿羅漢上。華於虛空中下向。小萎墮地。即自然亂風吹萎華悉自然去。諸菩薩意各復欲得六百四十里華。即自然在前。復以散諸佛及諸菩薩阿羅漢上。皆在虛空中下向。小萎墮地。亂風自然吹萎華去。諸菩薩意各復欲得千二百八十里華。即自然在前。復於虛空中共持散諸佛及諸菩薩阿羅漢上。皆在虛空中下向。小萎墮地。亂風自然吹萎華悉自然去。諸菩薩意各復欲得二千五百六十里華。即自然在前。復於虛空中共持散諸佛及諸菩薩阿羅漢上。皆在虛空中下向。小萎墮地。亂風吹萎華悉自然去。諸菩薩意各復欲得五千一百二十里華。即自然在前。復於虛空中共持散諸佛及諸菩薩阿羅漢上。皆在虛空中下向。小萎墮地。亂風吹萎華悉自然去。諸菩薩意各復欲得萬二百四十里華。即皆自然在前。復於虛空中共持散諸佛及諸菩薩阿羅漢

上。小萎墮地。亂風吹萎華悉自然去。諸菩薩意各復欲得二萬四百八十里華。即皆在前。復於虛空中共持散諸佛及諸菩薩阿羅漢上。皆在虛空中下向。小萎墮地。亂風吹萎華悉自然去。諸菩薩意各復欲得五萬里華。即皆在前。復於虛空中共持散諸佛及諸菩薩阿羅漢上。皆在虛空中下向。小萎墮地。亂風吹萎華悉自然去。諸菩薩意各復欲得十萬里華。即皆在前。諸菩薩復於虛空中共持散諸佛及諸菩薩阿羅漢上。皆在虛空中下向。小萎墮地。亂風吹萎華悉自然去。諸菩薩意各復欲得二十萬里華。即皆在前。復於虛空中共持散諸佛及諸菩薩阿羅漢上。小萎墮地。亂風吹萎華悉自然去。諸菩薩意各復欲得四十萬里華。即皆在前。復於虛空中共持散諸佛及諸菩薩阿羅漢上。皆在虛空中下向。小萎墮地。亂風吹萎華悉自然去。諸菩薩意各復欲得八十萬里華。即皆在前。復於虛空中共持散諸佛及諸菩薩阿羅漢上。皆在虛空中下向。小萎墮地。亂風吹萎華悉自然去。諸菩薩意各欲得百六十萬里華。即皆在前。共持散諸佛及諸菩薩阿羅漢上。小萎墮地。亂風吹萎華悉自然去。諸菩薩意各欲得三百萬里華。即皆在前。共持散諸佛及諸菩薩阿羅漢上。小萎墮地。亂風吹萎華自然去。諸菩薩意各欲得六百萬里華。即皆在前。共持散諸佛及諸菩薩阿羅漢上。都自然合為一華。華正端圓。周帀各適等。華轉倍前華。極自軟好。勝於前華數千百倍。色色異香。香不可言。諸菩薩皆大歡喜。俱於虛空中大共作眾音自然伎樂。樂諸佛及諸菩薩阿羅漢。當此之時。快樂不可言。諸菩薩皆悉卻坐聽經。聽經竟。即悉諷誦通利。知經道。益明智慧。即諸佛國中。從第一四天上至三十三天上。諸天人皆共持天上萬種自然之物。來下供養諸菩薩阿羅漢。天人皆復於虛空中。大共作眾音伎樂。諸天人前來者。轉去避後來者。後來者轉復供養如前。更相開避。諸天人歡喜聽

經·大共作音樂。當是時·快樂無極。諸菩薩供養聽經訖竟·便皆起為佛作禮而去。即復飛到八方上下無央數諸佛所·供養聽經·皆各如前。悉徧已後·日未中時·各飛還其國·為阿彌陀佛作禮。皆卻坐聽經竟·大歡喜。佛言。阿彌陀佛及諸菩薩阿羅漢欲食時·即自然七寶几·劫波育鬘毼以為座。佛及菩薩皆坐。前悉有自然七寶鉢。鉢中有百味飲食。飲食者·亦不類世間·亦非天上。此百味飲食·八方上下眾自然飲食中精味·甚香美無比·自然化生耳。欲得甜醋·在所欲得。諸菩薩阿羅漢中·有欲得金鉢者·有欲得銀鉢者·有欲得水精鉢者·有欲得珊瑚鉢者·有欲得琥珀鉢者·有欲得白玉鉢者·有欲得碑磔鉢者·有欲得碼碯鉢者·有欲得明月珠鉢者·有欲得摩尼珠鉢者·有欲得紫磨金鉢者·隨意即至。亦無所從來·亦無供養者·自然化生耳。諸菩薩阿羅漢

皆食。食亦不多·亦不少·悉平等。亦不言美惡·亦不言美故喜。食訖·諸飯具鉢几座自然化去。欲食時·乃復化生耳。諸菩薩阿羅漢皆心淨潔·所飲食但用作氣力耳。皆自然消散靡盡化去。佛告阿難。阿彌陀佛為諸菩薩阿羅漢說經時·都悉大會講堂上。諸菩薩阿羅漢及諸天人民·無央數都不可復計·皆飛到阿彌陀佛所·為佛作禮·卻坐聽經。其佛廣說道智大經。皆悉聞知·莫不歡喜踊躍心開解者。即四方自然亂風起·吹七寶樹·皆作五音聲。七寶樹華覆蓋其國·皆在虛空中下向。其華之香徧一國中。皆散阿彌陀佛及諸菩薩阿羅漢上。華墮地皆厚四寸。小萎·即亂風吹萎華自然去。四方亂風吹七寶樹華·如是四返。即第一四天王第二忉利天上至三十三天上諸天人·皆持天上萬種自然之物·百種雜色華·百種雜香·百種雜繒綵·百種劫波育鬘衣·萬種伎樂·轉倍好相勝·各持來下·為阿彌陀佛作禮·供養佛及諸

菩薩阿羅漢。諸天人皆復大作伎樂。樂阿彌陀佛及諸菩薩阿羅漢。當是時。快樂不可言。諸天更相開避。後來者轉復供養如前。即東方無央數佛國。其數不可復計。如恆水邊流沙。一沙一佛。其數如是。諸佛各遣諸菩薩。無央數不可復計。皆飛到阿彌陀佛所。作禮聽經。皆大歡喜。悉起為作禮而去。西方北方南方四角諸佛。其數各如恆水邊流沙。各遣諸菩薩無央數飛到阿彌陀佛所。作禮聽經。亦復如是。即下方上方諸佛。其數各如恆水邊流沙。皆遣諸菩薩都不可復計。飛到阿彌陀佛所。作禮聽經。更相開避。如是終無休絕時也。佛言。所以諸佛以恆水邊流沙為數者。八方上下無央數佛甚大眾多。都各不復可計。故以恆水邊流沙為數耳。佛語阿難。阿彌陀佛為諸菩薩阿羅漢說經竟。諸天人民中有未得道者。即得道。未得須陀洹者。即得須陀洹。未得斯陀含者。即得斯陀含。未得阿那含者。即得阿那含。未得阿羅漢者。即得阿羅漢。未得阿惟越致菩薩者。即得阿惟越致菩薩。阿彌陀佛。輒隨其宿命時。求道心所喜願大小。隨意為說經典授與之。即令疾開解得。皆悉明慧。各自好喜所願經道。莫不喜樂誦習之者。自諷誦通利。無厭無極。諸菩薩阿羅漢。中有誦經者。其音如三百鐘聲。中有說經者。如疾風暴雨時。如是盡一劫竟。終無懈倦時。皆悉智慧勇猛。身體輕便。終無痛癢極時。行步坐起。悉皆才健勇猛。如師子中王在深山中。有所趣向時。無有敢當者。無有疑難之意。在心所作為不可預計。百千億萬倍。是猛師子中王百千億萬倍。尚復不如我第二弟子摩訶目犍連勇猛百千億萬倍。如摩訶目犍連於諸國菩薩阿羅漢中。最為無比。飛行進止。智慧勇猛。洞視徹聽。知八方上下去來現在之事。百千億萬倍。共合為一智慧。當令在阿彌陀佛國中諸羅漢邊。其德尚復不及百千億萬倍。阿逸菩薩。即起前長跪叉手問佛言。阿彌陀佛國

中諸阿羅漢·甯頗有般泥洹去者無。願欲聞之。佛言。若欲知者·如是四天下星·若見之不。阿逸菩薩言。唯然·見之。佛言。如我第二弟子摩訶目犍連飛上天上·一晝一夜徧數知星有幾枚。此四天下星甚眾多·不可得計·尚復百千億萬倍是星也。如天下大海水減去一滴·甯能令海水為減知少不耶。對曰。減去百千億萬斗石·尚不能令減知少也。佛言。阿彌陀佛國諸阿羅漢中·雖有般泥洹去者·如大海減一滴水耳。不能令在諸阿羅漢為減知少也。佛言。大海減去一溪水。甯能令減少不。對曰。減去百千億萬溪水·尚不能減知少也。佛言。減大海一恆水·甯能令減知少不。對曰。減去百千億萬恆水·不能令減知少也。佛言。阿彌陀佛國諸阿羅漢般泥洹去者無央數·其在者新得道者亦無央數·都不為增減也。佛言。令天下諸水都流入大海水中·甯能令海水增多不。對曰·不能令增多也。所以者何。是大海為天下諸水中王·故能爾耳。佛言。阿彌陀佛國亦如是。悉令八方上下無央數佛國諸無央數天人民蜎飛蠕動之類都往生·甚大眾多·不可復計。阿彌陀佛國諸菩薩阿羅漢眾比丘僧·故如常一法不異為增多。所以者何。阿彌陀佛國為最快。八方上下無央數諸佛國中眾善之王·諸佛國中之雄·諸佛國中之寶·諸佛國中壽之極長久也·諸佛國中之眾傑也·諸佛國中之廣大也·諸佛國中之都自然之無為·最快明好甚樂之無極。所以者何。阿彌陀佛本為菩薩時·所願勇猛·精進不懈·累德所致·故能爾耳。阿逸菩薩即大歡喜。長跪叉手言。佛說阿彌陀佛國土快善明好最殊無比·乃獨爾乎。佛言。阿彌陀佛國諸菩薩阿羅漢所居七寶舍宅·中有在虛空中者·有在地者。中有欲令舍宅最高者·舍宅即高。中有欲令舍宅最大者·舍宅即大。中有欲令舍宅在虛空中者·舍宅即在虛空中。皆自然隨意在所作為。中有殊不能令舍宅隨意者。所以者何。中

有能令舍宅隨意者。皆是前世宿命求道時。慈心精進。益作諸善。德重所致。中有殊不能者。皆是前世宿命求道時。不慈心精進。益作諸善。德薄所致。其所衣被飲食。俱自然平等。德有大小別。知其勇猛。令眾見之耳。佛言。若見第六天王所居處不。唯然。見之。佛言。阿彌陀佛國講堂舍宅。都復勝第六天王所居處百千億萬倍。諸菩薩阿羅漢悉皆洞視徹聽。見知八方上下去來現在之事。復無數天上天下人民及蜎飛蠕動之類心意所念善惡。口所欲言。皆知當何歲何劫得度脫得人道。往生阿彌陀佛國。知當作菩薩阿羅漢。皆預知之。諸菩薩阿羅漢頂中。皆悉自有光明。所照有大小。諸菩薩中有最尊兩菩薩。常在佛左右坐侍正論。佛常與是兩菩薩。共對坐議八方上下去來現在之事。若欲使是兩菩薩到八方上下無央數諸佛所。即便飛行。隨心所欲至到。飛行駛疾。如佛勇猛無比。其一菩薩名盧樓亘。其一菩薩名摩訶那鉢。光明智慧最第一。頂中光明各焰照他方千須彌山佛國中常大明。其諸菩薩頂中光明各照千億萬里。諸阿羅漢頂中光明各照七丈。佛言。世間人民。若善男子善女人。若有急恐怖縣官事者。但自歸命是盧樓亘菩薩摩訶那鉢菩薩所。無不得解脫者。

佛告阿逸菩薩。阿彌陀佛頂中光明極大明。其日月星辰。皆在虛空中住止。不可復迴轉運行。亦無有精光。其明皆蔽不復見。佛光明照國中及焰照他方佛國常大明。終無有冥時。其國無有一日二日。亦無五日十日。亦無十五日一月。亦無五月十月五歲十歲。亦無百歲千歲。亦無萬歲億萬歲。無百千億萬歲。無有一劫十劫百劫千劫。無萬劫百萬劫。無千萬劫百億萬劫。阿彌陀佛光明。明無有極。劫後無數劫無數劫。重復無數劫無數劫無央數。終無有當冥時。國土及諸天。終無壞敗時。所以者何。阿彌陀佛壽命極長。國

土甚好。故能爾耳。其佛尊壽。卻後無數劫。重復無數劫。尚未欲般泥洹也。於世間教授。意欲過度八方上下諸無央數佛國諸天人民及蜎飛蠕動之類。皆欲使往生其國。悉令得泥洹之道。其作菩薩者。皆欲令悉作佛。作佛已。轉復教授八方上下諸天人民及蜎飛蠕動之類。皆復欲令作佛。作佛已。復教授諸無央數天人民蜎飛蠕動之類。皆令得泥洹道去。諸可教授弟子者。展轉復相教授。轉相度脫。至令得須陀洹。斯陀含。阿那含。阿羅漢。辟支佛道。轉相度脫。皆得泥洹之道。悉如是。尚未欲般泥洹。阿彌陀佛所度脫展轉如是。復住止無數劫無數劫。不可復計劫。終無般泥洹時。八方上下諸無央數天人民蜎飛蠕動之類。其生阿彌陀佛國當作佛者。不可復勝數。諸作阿羅漢。得泥洹道者。亦無央數。都不可復計。阿彌陀佛恩德諸所布施。八方上下無窮無極。甚深無量快善不可言。其智慧教授所出經道。布告八方上下諸無央數天上天下。甚不原也。其經卷數甚眾多。不可復計。都無有極。佛告阿逸菩薩。若欲知阿彌陀佛壽命無極時不。對曰。願皆欲聞知之。佛言。明聽。悉令八方上下諸無央數佛國中諸天人民蜎飛蠕動之類。皆使得人道。悉令作辟支佛阿羅漢。共坐禪一心。都合其智慧為一勇猛。共欲計知阿彌陀佛壽命幾千億萬劫歲數。皆無有能計知者。復令他方面各千須彌山佛國中諸天人民蜎飛蠕動之類。皆復使得人道。悉令作辟支佛阿羅漢。皆令坐禪一心。合其智慧為一勇猛。共欲數阿彌陀佛國中諸菩薩阿羅漢知有幾千億萬人。皆無有能知數者。阿彌陀佛年壽甚長久。浩浩皓皓。昭昭明善。甚深無極無底。無有能知信其者。獨佛自信知耳。阿逸菩薩聞佛言。大歡喜。長跪叉手言。佛說阿彌陀佛壽命甚長。威神尊大。智慧光明巍巍快善。乃獨如是。佛言。阿彌陀佛至其然後般泥洹者。其盧樓亘菩薩便當作佛。總領道智。典主教

授。世間及八方上下所過度諸天人民蜎飛蠕動之類。皆令得佛泥洹之道。其善福德。當復如大師阿彌陀佛。住止無央數劫無央數劫不可復計劫。惟法大師。爾乃般泥洹。其次摩訶那鉢菩薩當復作佛。典主智慧。總領教授。所過度福德。當復如大師阿彌陀佛。止住無央數劫。尚復不般泥洹。展轉相承受。經道甚明。國土極善。其法如是。終無有斷絕。不可極也。

阿難長跪叉手問佛言。阿彌陀佛國中無有須彌山。其第一四天第二忉利天皆依因何等住止。願欲聞之。佛告阿難。若有疑意於佛所耶。八方上下。無窮無極。無邊無幅。諸天下大海水。一人斗量之。尚可枯盡。得見底泥。佛智亦如是。佛言。我所見知。諸已過去佛如我名字釋迦文佛者。復如恒水邊流沙。一沙一佛。諸當來佛如我名字。亦如恒水邊流沙。甫始欲求作佛者。如我名字。亦如恒水邊流沙。佛正坐直南向。視見南方今現在佛如我名字者。復如恒水邊流沙。八方上下去來現在諸佛如我名字者。各如十恒水邊流沙。一沙一佛。其數如是。佛皆悉預見知之。佛言。往昔過去無數劫已來。一劫十劫百劫千劫萬劫億劫億萬億劫。劫中有佛。諸已過去佛。一佛十佛百佛千佛萬佛億佛億萬億佛。各各自有名字不同。無有如我名字者。甫始當來劫。一劫十劫百劫千劫萬劫億劫億萬億劫。劫中有佛。一佛十佛百佛千佛萬佛億佛億萬億佛。各各自有名字不同。時時乃有一佛如我名字耳。諸八方上下無央數佛國。今現在佛。次他方異佛國。一佛國十佛國百佛國千佛國萬佛國億佛國億萬億佛國。中有佛。各各自有名字甚多復不同。無如我名字者。八方上下無央數諸佛中。時時乃有如我名字耳。八方上下去來現在。其中間曠絕甚遠。悠悠迢迢。無窮無極。佛智亘然甚明。探古知今。前知無窮。卻觀未然。預知無極。都不可復

計·甚無央數。佛威神尊明·皆悉知之。佛智慧道德合明。都無能問佛經道窮極者。佛智慧終不可稱量盡也。阿難聞佛言·即大恐怖·衣毛皆起。白佛言。我不敢有疑意於佛所。所以問佛者。他方佛國皆有須彌山。第一四天·第二忉利天·皆依因之住止。我恐佛般泥洹後·儻有諸天人民若比丘僧比丘尼優婆塞優婆夷來問我·阿彌陀佛國何以獨無有須彌山·其第一四天王第二忉利天皆依因何等住止·我當應答之。今不問佛者·佛去後當持何等語報答之。獨佛自知之耳。其餘人無有能為我解者。以是故問佛耳。佛言。阿難。是第三焰天·其第四兜術天·上至第七梵天·皆依因何等住止乎。阿難言。是諸天皆自然在虛空中住。在虛空中住止·無所依因。佛威神甚重·自然所欲作為。意欲有所作為。不預計。是諸天皆尚在虛空中住止。何況佛威神尊重·欲有所作為耶。阿難聞佛言·即大歡喜。長跪叉手言。佛智慧知八方上下去來現在之事·無窮無極·無有邊幅·甚高大妙·絕快善·極明好·甚無比·威神尊重·不可當也。

佛說阿彌陀三耶三佛薩樓佛檀過度人道經卷上

佛說阿彌陀三耶三佛薩樓佛檀過度人道經卷下

吳月氏優婆塞支謙譯

佛告阿逸菩薩。其世間人民·若善男子善女人·願欲往生阿彌陀佛國者·有三輩。作德有大小·轉不相及。佛言。何等為三輩。最上第一輩者·當去家·捨妻子·斷愛欲·行作沙門·就無為之道·當作菩薩道·奉行六波羅蜜經者·作沙門不虧經戒·慈心精進·不當瞋怒·不當與女人交通·齋戒清淨·心無所貪慕·至誠願欲往生阿彌陀佛國·常念至心

不斷絕者。其人便於今世求道時。即自然於其臥止中。夢見阿彌陀佛及諸菩薩阿羅漢。其人壽命欲終時。阿彌陀佛。即自與諸菩薩阿羅漢。共翻輦飛行迎之。則往生阿彌陀佛國。便於七寶水池蓮華中化生。即自然受身長大。則作阿惟越致菩薩。便即與諸菩薩。共翻輦飛行。供養八方上下諸無央數佛。即逮智慧勇猛。樂聽經道。其心歡樂。所居七寶舍宅。在虛空中。恣隨其意。在所欲作為。去阿彌陀佛近。佛言。諸欲往生阿彌陀佛國者。當精進持經戒。奉行如是上法者。則得往生阿彌陀佛國。可得為眾所尊敬。是為上第一輩。

佛言。其中輩者。其人願欲往生阿彌陀佛國。雖不能去家捨妻子斷愛欲行作沙門者。當持經戒無得虧失。益作分檀布施。常信受佛經語深。當作至誠中信。飯食諸沙門。作佛寺起塔。散華燒香然燈。懸雜繒綵。如是法者。無所適莫。不當瞋怒。齋戒清淨。慈心精進。斷愛欲念。欲往生阿彌陀佛國。一日一夜不斷絕者。其人便於今世。亦復於臥止夢中。見阿彌陀佛。其人壽命欲終時。阿彌陀佛。即化令其人目自見阿彌陀佛及其國土。往至阿彌陀佛國者。可得智慧勇猛。佛言。其人奉行施與如是者。若其人然後復中悔。心中狐疑。不信分檀布施作諸善後世得其福。不信有彌陀佛國。不信有往生其國。雖爾者。其人續念不絕。暫信暫不信。意志猶豫。無所專據。續其善願為本。故得往生。其人壽命病欲終時。阿彌陀佛即自化作形像。令其人目自見之。口不能復言。但心中歡喜踊躍。意念言。我悔不知益齋戒作善。今當往生阿彌陀佛國。其人即心自悔過。悔過者小差少。無所復及。其人壽命終盡。即往生阿彌陀佛國。不能得前至阿彌陀佛所。便道見阿彌陀佛國界邊自然七寶城中。心便大歡喜。便止其城中。即於七寶水池蓮華中化生。則受身自然長大。在城中於是間五百歲。其城廣縱各二千里。城中亦有七

寶舍宅。中外內皆有七寶浴池。浴池中亦有自然華香。繞浴池上。亦有七寶樹重行。亦皆復作五音聲。其欲飲食時。前有自然食具。百味飲食。在所欲得。應意皆至。其人於城中亦快樂。其城中比如第二忉利天上自然之物。雖爾。其人城中不能得出。復不能得見阿彌陀佛。但見其光明。心自悔責。踊躍喜耳。亦復不能得聞經。亦復不能得見諸比丘僧。亦復不能得見知阿彌陀佛國中。諸菩薩阿羅漢狀貌何等類。其人愁苦如是比如小適耳。佛亦不使爾身行所作自然得之。皆心自趣向。道入其城中。其人本宿命求道時。心口各異。言念無誠信。狐疑佛經。復不信向之。當自然入惡道中。阿彌陀佛哀愍。威神引之去耳。其人於城中五百歲乃得出。往至阿彌陀佛所。聞經心不開解。亦復不得在諸菩薩阿羅漢比丘僧中聽經以去。所居處舍宅在地。不能令舍宅隨意高大。在虛空中。復去阿彌陀佛甚大遠。不能得近附阿彌陀佛。其人智慧不明。知經復少。心不歡喜。意不開解。其人久久。亦自當智慧開解知經。明健勇猛。心當歡喜。次當復如上第一輩。所以者何。其人但坐前世宿命求道時。不大持齋戒。毀失經法。意志狐疑。不信佛語。不信佛經深。不信分檀布施作善後世當得其福。復坐中悔。不信往生阿彌陀佛國。作功德不至心。用是故耳。是為第二中輩。

佛言。其三輩者。其人願欲往生阿彌陀佛國。若無所用分檀布施。亦不能燒香散華。然燈懸雜繒綵。作佛寺起塔。飲食諸沙門者。當斷愛欲。無所貪慕。得經疾慈心精進。不當瞋怒。齋戒清淨。如是法者。當一心念欲往生阿彌陀佛國。晝夜十日不斷絕者。壽命終。即往生阿彌陀佛國。可得尊敬。智慧勇猛。佛言。其人作是以後。若復中悔。心意狐疑。不信作善後世當得其福。不信往生阿彌陀佛國。其人雖爾。續得往生。其人壽命病欲終時。阿彌陀佛。即令其人於

臥止夢中·見阿彌陀佛國土。心中大歡喜。意自念言。我悔不知益作諸善·今當往生阿彌陀佛國。其人但念是。口不能復言。即自悔過。悔過者差減少·悔無所復及。其人命終·即生阿彌陀佛國·不能得前至。便道見二千里七寶城中·心獨歡喜·便止其中。亦復於七寶浴池蓮華中化生。即自然受身長大。其城亦復如前城法·比如第二忉利天上自然之物。其人亦復於城中五百歲竟·乃得出至阿彌陀佛所·心中大歡喜。其人聽聞經·心不開解·意不歡樂·智慧不明·知經復少。所居舍宅在地。不能令舍宅·隨意高大·在處空中。復去阿彌陀佛大遠·不能得近附阿彌陀佛。亦復如是第二中輩狐疑者也。其人久久·亦當智慧開解·知經勇猛·心當歡樂·次如上第一輩也。所以者何。皆坐前世宿命求道時·中悔狐疑·暫信暫不信·不信作善得其福德·皆自然得之耳。隨其功德有所鉉不鉉·各自然趣向。說經行道百千億萬·超絕不相及。佛言。其欲求作菩薩道·生阿彌陀佛國者·其人然後皆當得阿惟越致菩薩。阿惟越致菩薩者·皆當有三十二相·紫磨金色·八十種好·皆當作佛。隨所願在所求欲於他方佛國作佛·終不復更泥犁禽獸薜荔。隨其精進求道·早晚之事同等耳。求道不休·會當得之·不失其所欲願也。

佛告阿逸菩薩等·諸天帝王人民。我皆語汝曹。諸欲往生阿彌陀佛國者·雖不能大精進禪定持經戒者·大要當作善。一者不得殺生。二者不得盜竊。三者不得婬泆·姦愛他人婦女。四者不得調欺。五者不得飲酒。六者不得兩舌。七者不得惡口。八者不得妄言。九者不得嫉妒。十者不得貪饕。不得心中有所慳惜。不得瞋怒。不得愚癡。不得隨心嗜欲。不得心中悔。不得狐疑。當作孝順。當作至誠忠信。當信受佛經語深。當信作善後世得其福。奉持如其法不虧失者·在心所願·可得往生阿彌陀佛國。至要當齋戒一心清

淨·晝夜常念·欲往生阿彌陀佛國·十日十夜不斷絕。我皆
慈哀之。悉令生阿彌陀佛國。佛言。世間人以欲慕及賢明·
居家修善為道者·與妻子共居·在恩好愛欲之中·憂念苦
多·家事忽務·不暇大齋一心清淨。雖不能得去家棄欲·有
空閑時·自端心意·念身作善·專精行道。十日十夜者殊使
不能·念自思惟熟校計·欲度脫身者·下當絕念去憂·勿念
家事·莫與婦人同床·自端正身心·斷於愛欲·一心齋戒清
淨·至意念生阿彌陀佛國。一日一夜不斷絕者·壽終皆往生
其國·在七寶浴池蓮華中化生·可得智慧勇猛·所居七寶舍
宅自在意所欲作為·可次如上第一輩。佛語阿逸菩薩言。諸
八方上下無央數諸天人民·比丘僧比丘尼·優婆塞優婆夷·
往生阿彌陀佛國眾等大會·皆共於七寶浴池水中·都共人人
悉自於一大蓮華上坐。皆悉自陳道德行善·人人各自說其前
世宿命求道時·持戒所作善法·所從來生本末·其所好喜經
道·知經智慧·所施行功德。從上次下·轉皆徧已。知經有
明不明·智有深淺大小·德有優劣厚薄·自然之道。別知才
能·智慧健猛·眾相觀照·禮義和順。皆自歡喜踊躍。智慧
有勇猛·各不相屬逮。佛言。其人殊不預作德為善·輕戲不
信使然·徒倚懈怠為用可爾。至時都集說經道·自然迫促·
應答遲晚。道智卓殊超絕·才能高猛。獨於邊羸·臨事乃
悔。悔者已出·其後當復何益。但心中恢廓慕及等耳。

佛言。阿彌陀佛國諸菩薩阿羅漢眾等大聚會·自然都
集。拘心制意·端身正行。遊戲洞達。俱相隨飛行·翻輩
出·供養無極·歡心喜樂。樂共觀經行道·和好久習。才猛
智慧·志若虛空。精進求願·心終不復中徊·意終不復轉·
終無有懈極時。雖求道外若遲緩·內獨急疾。容容虛空·適
得其中。中表相應·自然嚴整·檢斂端直。身心清潔·無有
愛欲·無所適貪·無有眾惡瑕穢。其志願皆各安定殊好·無

增缺減。求道愆正。不誤傾邪。准望道法。隨經約令。不敢
 蹉跌。若於八方上下。無有邊幅。自在所欲至到。無窮無
 極。咸然為道。恢廓慕及曠蕩念道。無他之念。無有憂思。
 自然無為。虛無空立。淡安無欲。作得善願。盡心求索。含
 哀慈愍精進。中表禮義都合。通洞無違。和順副稱。包羅表
 裏。過度解脫。能升入泥洹。長與道德合明。自然相保守。
 快意之滋。真滋真了。潔白志願。無上清淨之安定靜樂之無
 有極。善好無有比。巍巍之耀照。照一旦開達明徹。自然中
 自然相然之有根本。自然成五光。五光至九色。九色參迴
 轉。數百千更變。鬱單之自然。自然成七寶。橫攬成萬物。
 光精參明俱出。好甚殊無有極。其國土甚若此。何不力為
 善。念道之自然。著於無上下。洞達無邊幅。捐志虛空中。
 何不各精進。努力自求索。可得超絕去。往生阿彌陀佛國。
 橫截於五惡。惡道自然閉塞。升道之無極。易往無有人。其
 國土不逆違。自然之隨牽。何不棄世事。行求道德。可得極
 長生。壽樂無有極。何為著世事。饒饒共憂思無常。世人薄
 俗。共爭不急之事。共於是處劇惡極苦之中。勤身治生。用
 相給活。無尊無卑。無富無貧。無老無少。無男無女。皆當
 共憂錢財。有無同然。憂思適等。屏營愁苦。累念思慮。為
 心使走。無有安時。有田憂田。有宅憂宅。有牛憂牛。有馬
 憂馬。有六畜憂六畜。有奴婢憂奴婢。有衣被錢財金銀寶
 物。復共憂之。重思累息。憂念愁毒。橫為非常水火盜賊怨
 主債家所漂燒擊。搪揆沒溺。憂毒怔怔。無有解時。結憤胸
 中。穢氣恚怒。病在胸腹。憂苦不離。心堅固意。適無縱
 捨。或坐摧藏。終身亡命。棄捐之去。莫誰隨者。尊卑豪貴
 貧富有是憂懼。勤苦如此。結眾寒熱。與痛共居。小家貧
 者。窮困苦乏。無田亦憂欲有田。無宅亦憂欲有宅。無牛亦
 憂欲有牛。無馬亦憂欲有馬。無六畜亦憂欲有六畜。無奴婢

亦憂欲有奴婢·無衣被錢財什物飲食之屬亦憂欲有之。適有一·復少一。有是少是。思有齊等。適小具有·便復餽盡。如是苦生·當復求索。思想無益·不能時得。身心俱勞·坐起不安。憂意相隨·勤苦如此。焦心不離·恚恨獨怒。亦結眾寒熱·與痛同居。或時坐之·終身天命。亦不肯作善為道。壽命終盡死·皆當獨遠去。有所趣向·善惡之道·莫能知之。或時世人·父子兄弟·夫婦家室·中外親屬·居天地之間·當相敬愛·不當相憎。有無當相給與·不當有貪惜。言色當和·莫相違戾。或儻心諍·有所恚怒。今世恨意·微相嫉憎。後世轉劇·致成大怨。所以者何。如今之事·更欲相害。雖不臨時·應急相破。然之愁毒結憤精神·自然剋識·不得相離。皆當對相生值·更相報復。人在世間愛欲之中·獨往獨來·獨死獨生。當行至苦樂之處·身自當之·無有代者。善惡變化·殃咎異處·宿預嚴待·當獨升入·遠到他處·莫能見去在何所。善惡自然追逐行生。窈窈冥冥·別離久長。道路不同·會見無期。甚難得復相值。何不棄家事·各勵強健時·努力為善力·精進求度世·可得極長壽。殊不肯求於道·復欲須待·欲何樂乎。如是世人不信作善得善·不信為道得道·不信死後世復生·不信施與得其福德·都不信之爾。以謂不然·終無有是。但坐是故·且自見之。更相代聞·前後相續·轉相承受·父餘教令。先人祖父·素不作善·本不為道。身愚神闇·心塞意閉·不見大道。殊無有能見人死生有所趣向·亦莫能知者。適無有見善惡之道·復無語者·為用作善惡福德·殃咎禍罰·各自競作為之用·殊無有怪也。至於死生之道·轉相續立。或子哭父·或父哭子。或弟哭兄·或兄哭弟。或婦哭夫·或夫哭婦。顛倒上下·無常根本·皆當過去·不可常得。教語開導·信道者少。皆當死生·無有休止。如是曹人·朦冥抵揆·不信經

語。各欲快意。心不計慮。愚癡於愛欲。不解於道德。迷惑於瞋怒。貪狼於財色。坐之不得道。當更勤苦極。在惡處生。終不得止休息。痛之甚可傷。或時家室中外。父子兄弟夫婦。至於死生之義。更相哭淚。轉相思慕。憂念憤結。恩愛繞續。心意著痛。對相顧戀。晝夜縛礙。無有解時。教視道德。心不開明。思想思好。情欲不離。閉塞蒙蒙。交錯覆蔽。不能思計。心自端正。決斷世事。專精行道。便旋至竟。壽終命盡。不能得道。無可奈何。總猥慣謔。皆貪愛欲。如是之法。不解道者多。得道者少。世間忽忽。無可聊賴。尊卑上下。豪貴貧富。男女大小。各自忽務。勤苦躬身。懷怨殺毒。惡氣窈冥。莫不惆悵。為妄作事。惡逆天地。不從人心。道德非惡。先隨與之。恣聽所為。其壽未至。便頓奪之。下入惡道。累世勤苦。展轉愁毒。數千萬億億歲。無有止期。痛不可言。甚可憐愍。

佛告阿逸菩薩等。諸天帝王人民。我皆語汝曹。世間之事。人用是故。坐不得道。汝曹熟思惟之。惡者。當縱捨遠離之去。從其善者。當堅持。勿妄為非。益作諸善。大小多少。愛欲之榮。皆不可常得。由當別離。無可樂者。曼佛世時。其有信受佛經語深。奉行道德。皆是我小弟也。其有欲甫學佛經戒者。皆是我弟子。其有欲出身去家。捨妻子。絕去財色。欲作沙門。為佛作比丘者。皆是我子孫。我世甚難得值。其有願欲生阿彌陀佛國者。可得智慧勇猛。為眾所尊敬。勿得隨心所欲。虧負經戒。在於人後。儻有疑意不解經者。復前問佛。為汝解之。阿逸菩薩長跪叉手言。佛威神尊重。所說經快善。我曹聽經語。皆心貫之。世人實爾。如佛所語無有異。今佛慈哀我曹。開示大道。教語生路。耳目聰明。長得度脫。今若得更生。我曹聽佛經語。莫不慈心歡喜踊躍開解者。及諸天帝王人民。蜎飛蠕動之類。皆蒙恩。無不

解脫憂苦者。佛語教誡。甚深甚善。無極無底。佛智慧所見。知八方上下去來現在之事。無上無下。無邊無幅。佛甚難得值。我曹皆慈心於佛所。令我曹得度脫者。皆是佛前世求道時。勤苦學問精明所致。恩德普覆所施行。福德相祿巍巍。光明徹照。洞虛無極。貫入泥洹。教授攬典。制威消化。愍動八方上下。無窮無極。佛為師法。尊絕羣聖。都無能及佛者。佛為八方上下諸天帝王人民作師。隨其心所欲願大小。皆令得道。今我曹得與佛相見。得聞阿彌陀佛聲。我曹甚喜。莫不得點慧開明者。佛告阿逸菩薩。若言是實當爾。若有慈心於佛所者大善。實當念佛。天下久久。乃復有佛耳。今我於苦世作佛。所出經道。教授洞達。截斷狐疑。端心正行。拔諸愛欲。絕眾惡根本。遊步無拘。典總智慧。眾道表裏。攬持維綱。照然分明。開示五道。決正生死泥洹之道。佛言。若曹從無數劫已來。不可復計劫。若曹作菩薩道。欲過度諸天人民及蜎飛蠕動之類。已來甚久遠。人從若得道度者無央數。至得泥洹之道者亦無央數。若曹及八方上下諸天帝王人民。若比丘比丘尼優婆塞優婆夷。若曹宿命從無數劫已來。展轉是五道中。死生呼嗟。更相哭淚。轉相貪慕。憂思愁毒。痛苦不可言。至今世死生不絕。乃今日與佛相見共會。值是乃聞阿彌陀佛聲。甚快善哉。助汝曹喜。亦可自厭死生痛癢。生時甚痛甚苦甚極。至年長大。亦痛亦苦亦極。飢時亦痛亦苦亦極。病時亦痛亦苦亦極。死時亦痛亦苦亦極。甚惡臭處不淨潔。了無有可者。佛故悉語若曹。若曹亦可自決斷臭處惡露。若曹亦可端心正身。益作諸善。於是常端中外。潔淨身體。洒除心垢。自相約檢。表裏相應。言行忠信。人能自度脫。轉相扶接。拔諸愛欲。精明至心。求願不轉。結其善道根本。雖精苦一世。須臾間耳。今世為善。後世生阿彌陀佛國。快樂甚無極。長與道德合明。然善

相保守。長去離惡道痛癢之憂惱。拔勤苦諸惡根本。斷諸愛欲恩好。長生阿彌陀佛國。亦無有諸痛癢。亦無復有諸惡臭處。亦無復有勤苦。亦無婬泆瞋怒愚癡。亦無有憂思愁毒。生於阿彌陀佛國。欲壽一劫十劫百劫千劫萬劫億劫。自恣意。欲住上壽無央數劫不可復計數劫。恣汝隨意。皆可得之。欲食不食。恣若其意。都悉自然皆可得之。次於泥洹之道。皆各自精明求索心所欲願。勿得狐疑心中悔欲往生者。無得坐其過失。在阿彌陀佛國界邊。自然七寶城中。謫五百歲。阿逸菩薩言。受佛嚴明重教。皆當精進一心求索。請奉行之。不敢疑怠。

佛告阿逸菩薩等。若曹於是世。能自制心正意。身不作惡者。是為大德善。都有一輩。為八方上下最無有比。所以者何。八方上下無央數佛國中。諸天人民。皆自然作善。不大為惡。易教化。今我於是世間作佛。為於五惡五痛五燒之中作佛。為最劇。教語人民。令縱捨五惡。令去五痛。令去五燒之中。降化其心。令持五善。得其福德度世長壽泥洹之道。佛言。何等為五惡。何等為五痛。何等為五燒中者。何等為消化五惡。令得五善者。何等為持五善。得其福德長壽度世泥洹之道。佛言。其一惡者。諸天人民。下至禽獸蝸飛蠕動之屬。欲為眾惡。強者服弱。轉相剋賊。自相殺傷。更相食噉。不知作善。惡逆不道。受其殃罰。道之自然。當往趣向。神明記識。犯之不貫。轉相承續。故有貧窮下賤。乞丐孤獨。故有聾盲瘖瘂。愚癡弊惡。下有尪狂不及逮之屬。故有尊卑豪貴。高才明達。智慧勇猛。皆其前世宿命。為善慈孝。布施恩德。故有官事王法牢獄。不肯畏慎。作惡入法。受其過謫。重罰致劇。求望解脫。難得度出。今世有是。目前現在。壽終尤劇。入其窈冥。受身更生。比若王法。劇苦極刑。故有自然泥犁禽獸薜荔。蝸飛蠕動之類。轉

貿身形·改惡易道·壽命短長。魂神精識·自然入趣·受於形壽。當獨值向·相從共生。轉相報償·當相還復。殃惡禍罰·眾事未盡·終不得離。展轉其中·世世累劫·無有出期·難得解脫·痛不可言。天地之間·自然有是。雖不臨時·卒暴應時。但取自然之道·皆當善惡歸之。是為一大惡·為一痛·為一燒·勤苦如是。愁毒呼嗟·比若劇火起燒人身。人能自於其中·一心制意·端身正行·獨作諸善·不為眾惡者·身獨度脫·得其福德·可得長壽度世上天泥洹之道·是為一大善。

佛言。其二惡者。世間帝王長吏人民·父子兄弟·家室夫婦·略無義理·不從正令。奢婬嬌慢。各欲快意。恣心自在·更相欺調·殊不懼死。心口各異·言念無實。佞諂不忠·諛媚巧辭。行不端緒·更相憎嫉。轉相讒惡·陷人冤枉。主上不明·心不察照·任用臣下。臣下存在·踐度能行·知其形勢。在位不正·為其所調·妄損忠良賢善。不當天心·甚違道理。臣欺其君·子欺其父·弟欺其兄·婦欺其夫。家室中外·知識相訟。各懷貪婬·心毒瞋怒·矇聾愚癡殺盜。無有尊卑上下·無男無女·無大無小·心俱同然·欲自厚己。破家亡身·不顧念前後。家室親屬·坐之破族。或時家中內外知識·朋友鄉黨·市里愚民野人·轉更從事。共相利害·爭財鬪訟。怒忿成仇·轉爭勝負。慳富焦心·不肯施與。祝祝守惜·愛保貪重。坐之思念·心勞身苦。如是至竟·無所恃怙。獨來獨去·無一隨者。善惡福德·殃禍謫罰·追念所生。或在樂處·或人毒苦·然後乃悔·當復何及。或時世人·愚心少智。見善誹謗恚之·不肯慕及。但欲為惡·妄作不道。但欲盜竊·常懷毒心。欲得他人財物·用自供給。消散靡盡·餽復求索。邪心不正·常獨恐怖·畏人有色。臨時不計·事至乃悔。今世現在·長吏牢獄·自然趣

向·受其殃咎。世間貧窮乞丐孤獨·但坐前世宿命不信道德·不肯為善。今世為惡·天神別籍·壽終入惡道。故有自然泥犁禽獸薜荔·蝸飛蠕動之屬。展轉其中·世世累劫·無有出期·難得解脫·痛不可言。是為二大惡·為二痛·為二燒·勤苦如是。比若火起·劇於燒人身。人能自於其中·一心制意·端身正行·獨作諸善·不為眾惡者·身獨度脫·得其福德·可得長壽度世上天泥洹之道·是為二大善。

佛言。其三惡者。諸世間人民·寄生相因。其依居天地之間·處年壽命無能幾歲。至有豪貴長者·賢明善人。下有貧賤尪羸愚者。中有不良之人·但懷念毒惡·身心不正。常念婬泆·煩滿胸中。愛欲交錯·坐起不安。貪意慳惜·欲橫唐得。眇眇細色·惡態婬泆。有婦厭憎·私妄出入。持家所有·相給為非。聚會飲食·專共作惡。興兵作賊·攻城格鬪。劫殺截斷·強奪不道。取人財物·偷竊趣得。不肯治生。所當求者·不肯為之。惡心在外·不能專作。欲繫成事·恐勢迫脅。持歸給家·共相生活。恣心快意·極行作樂。婬亂他人婦女。或於其親屬·不避尊卑長老。眾共憎惡。家室中外·患而患之。亦復不畏縣官法令·無所避錄。如是之惡·自然牢獄。日月照識·神明記取·諸神攝錄。故有自然泥犁禽獸薜荔·蝸飛蠕動之屬。展轉其中·世世累劫·無有出期·難得解脫·痛不可言。是為三大惡·為三痛·為三燒·勤苦如是。比若火起燒人身。人能自於其中·一心制意·端身正行·獨作諸善·不為眾惡者·身獨度脫·得其福德·可得長壽度世上天泥洹之道·是為三大善。

佛言。其四惡者。諸人不能作善·自相壞敗。轉相教令·共作眾惡。主為傳言。但欲兩舌·惡口罵詈·妄語相嫉。更相鬪亂·憎嫉善人。敗壞賢善·於傍快之。復不孝順

供養父母·輕易師友·知識無信·難得誠實·自大尊貴·橫行威武·加權力勢·侵剋易人·不能自知為惡·不自羞慙·自用頗健·欲令人承事畏敬之·復不畏敬天地神明日月·亦不可教令作善·不可降化·自用偃蹇常當爾·亦復無憂畏心·不知恐懼·恣意憍慢·如是天神記之·賴其前世宿命頗作福德·小善扶接·營護助之·今世作惡盡傷·諸善日去·見惡追之·身獨空立·無所復依·受重殃謫·壽命終身·眾惡繞歸·自然迫促·當往追逐·不得止息·自然眾惡共趣頓乏·有其名籍·在神明所·殃咎引牽·當值相得·自然趣向·受過謫罰·身心摧碎·神形苦極·不得離卻·但得前行·入其火鑊·當是之時·悔復何益·當復何及·天道自然·不得蹉跌·故有自然泥犁禽獸薜荔·蜎飛蠕動之屬·展轉其中·世世累劫·無有出期·難得解脫·痛不可言·是為四大惡·為四痛·為四燒·勤苦如是·比若火起燒人身·人能自於其中·一心制意·端身正行·獨作諸善·不為眾惡者·身獨度脫·得其福德·可得長壽度世上天泥洹之道·是為四大善。

佛言·其五惡者·世人徒倚懈惰·不肯作善·不念治生·妻子飢寒·父母俱然·欲訶教其子·其子惡心·瞋目應怒·言令不從·違戾反逆·劇於野人·比若怨家·不如無子·妄徧假貸·眾共患厭·尤無復有報償之心·窮貧困乏·不能復得·辜較諧聲·放縱遊散·串數唐得·自用賑給·不畏防禁·飲食無極·喫酒嗜美·出入無有期度·魯扈抵揆·不知人情·睚眦強制·見人有善·憎妬恚之·無義無禮·自用識當·不可諫曉·亦復不憂念父母妻子有無·又復不念卒報父母之德·亦復不念師之恩好·心常念惡·口常言惡·身常行惡·日不成就·不信道德·不信有賢明先聖·不信作善為道·可得度世·不信世間有佛·欲殺羅漢·鬪比丘僧·常

欲殺人。欲殺父母兄弟妻子宗親朋友。父母兄弟妻子宗親朋友。憎惡見之。欲使之死。不信佛經語。不信人壽命終盡死。後世復生。不信作善得善。不信作惡得惡。如是曹人。男子女人。心意俱然。違戾反逆。愚癡蒙籠。瞋怒嗜欲。無所識知。自用快善。大為智慧。亦不知所從來生。死所趣向。不肯慈孝。惡逆天地。於其中間。望求僥倖。欲得長生。躬得不死。會當歸就生死勤苦善惡之道。身所作惡。殃咎眾趣。不得度脫。亦不可降化令作善。慈心教語。開道死生善惡所趣向有是。復不信之。然苦心與語。欲令度脫。無益其人。心中閉塞。意不開解。大命將至。至時皆悔。其後乃悔。當復何及。不預計作善。臨窮何益。天地之間。五道各明。恢曠窈窕。浩浩汗汗。轉相承受。善惡毒痛。身自當之。無有代者。道之自然。隨其所行。追命所生。不得縱捨。善人行善慈孝。從樂入樂。從明入明。惡人行惡。從苦入苦。從冥入冥。誰能知者。獨佛見知耳。教語人民。信用者少。死生不休。惡道不絕。如是世人。不可悉道說。故有自然泥犁禽獸薜荔。蜎飛蠕動之屬。展轉其中。世世累劫。無有出期。難得解脫。痛不可言。是為五大惡。為五痛。為五燒。勤苦如是。此若火起燒人身。人能自於其中。一心制意。端身正行。言行相副。所作至誠。所語如語。心口不轉。獨作諸善。不為眾惡者。身獨度脫。得其福德。可得長壽度世上天泥洹之道。是為五大善。

佛告阿逸菩薩等。我皆語若曹。是世五惡。勤苦如是。令起五痛。令起五燒。展轉相生。世間人民。不肯為善。欲作眾惡。敢有犯此諸惡事者。皆悉自然當具更歷入惡道中。或其今世先被病殃。死生不得。示眾見之。壽終趣入。至極大苦。愁憂酷毒。自相焦然。轉相燒滅。至其然後。共作怨家。更相傷殺。從小微起。至大困劇。皆從貪婬財色。不肯

忍辱施與。各欲自快。無復曲直。欲得健名。為癡欲所迫。隨心思想。不能復得。結憤胸中。財色縛束。無有解脫。不知厭足。厚己爭欲。無所省錄。富貴榮華。當時快意。不能忍辱。不知施善。威勢無幾。隨惡名燹。身坐勞苦。久後大劇。自然隨逐。無有解已。王法施張。自然糾舉。上下相應。羅網綱紀。瑩瑩忪忪。當入其中。古今有是。痛哉可傷。都無義理。不知正道。佛告阿逸菩薩等。若世有是。佛皆慈愍哀之。威神摧動。眾惡諸事皆消化之。令得去惡就善。棄捐所思。奉持經戒。莫不承受施行經法。不敢違失。度世無為泥洹之道。快善極樂。佛言。若曹諸天帝王人民。及後世人。得佛經語。熟思惟之。能自於其中端心正行。其主上為善率化。檢御其下。教眾轉相敕令。轉共為善。轉相度脫。各自端守。慈仁愍哀。終身不怠。尊聖敬孝。通洞博愛。佛語教令。無敢虧負。當憂度世泥洹之道。當憂斷截死生痛癢。拔惡根本。當憂斷絕泥犁禽獸薜荔。蝸飛蠕動惡苦之道。當遇佛世。堅持經道。無敢違失。佛言。若曹當信者。云何第一急。當自端身。當自端心。當自端目。當自端耳。當自端鼻。當自端口。當自端手。當自端足。能自檢斂。莫妄動作。身心淨潔。俱善相應。中外約束。勿隨嗜欲。不犯諸惡。言色當和。身行當專。行步坐起。所作當安。作事所為。當先熟思慮計之。揆度才能。視瞻圖規。安定徐作為之。作事倉卒。不預計熟。為之不諦。亡其功夫。敗悔在後。唐苦亡身。至誠忠信。得道絕去。佛言。若曹於是益作諸善。布恩施德。能不犯道禁忌。忍辱精進。一心智慧。展轉復相教化。作善為德。如是經法。慈心專一。齋戒清淨。一日一夜者。勝於在阿彌陀佛國作善者百歲。所以者何。阿彌陀佛國。皆積德眾善。無為自然。在所求索。無有諸惡大如毛髮。佛言。於是作善十日十夜者。其德勝於他方

佛國中人民作善千歲。所以者何。他方佛國。皆悉作善。作善者多。為惡者少。皆有自然之物。不行求作。便自得之。是間為惡者多。作善者少。不行求作。不能令得。世人能自端制作善。至心求道。故能爾耳。是間無有自然。不能自給。當行求索。勤苦治生。轉相欺給。調詐好惡。得其財物。歸給妻子。勞心苦身。如是至竟。心意不專。惚恫不安。人能自安靜為善。精進作德。故能爾耳。佛言。我皆哀若曹。及諸天帝王人民。皆教令作諸善。不為眾惡。隨其所能。輒授與道。教戒開導。悉奉行之。則君率化為善。教令臣下。父教其子。兄教其弟。夫教其婦。家室內外。親屬朋友。轉相教語。作善為道。奉經持戒。各自端守。上下相檢。無尊無卑。無男無女。齋戒清淨。莫不歡喜。和順義理。歡樂慈孝。自相約束。其有得佛經語。悉持思之。不當所作而犯為之。即自悔過。去惡就善。棄邪為正。朝聞夕改。奉持經戒。劇貧得寶。佛所行處。所在郡國。輒授與經戒。諸天日月星辰。諸國王傍臣長吏人民。諸龍鬼神。泥犁禽獸薜荔。蜎飛蠕動之屬。莫不慈心開解者。皆悉敬事從佛。稽受經道。承奉行之。即君改化為善。齋戒精思。淨自湔洒。端心正行。居位嚴慄。教敕率眾為善。奉行道禁。令言令正。臣事其君。忠直受令。不敢違負。父子言令。孝順承受。兄弟夫婦。宗親朋友。上下相令。順言和理。尊卑大小。轉相敬事。以禮如義。不相違負。莫不改往修來。洒心易行。端正中表。自然作善。所願輒得。感善降化。自然之道。求欲不死。則可得長壽。求欲度世。則可得泥洹之道。佛言。佛威神尊重。消惡化善。莫不度脫。今我出於天下。在是惡中。於苦世作佛。慈愍哀傷。教語開導。諸天帝王。傍臣左右。長吏人民。隨其心所願樂。皆令得道。佛諸所行處。所經過歷郡國縣邑。丘聚市里。莫不豐熟。天下太平。

日月運照·倍益明好。風雨時節。人民安寧。強不臨弱·各得其所。無惡穢疾疫·無病瘦者。兵革不起。國無盜賊。無有冤枉。無有拘閉者。君臣人民·莫不喜踊。忠慈至誠·各自端守。皆自守國。雍和孝順·莫不歡喜。有無相與·布恩施德·心歡喜樂。與得皆敬·受推義讓。謙遜前後·以禮敬事。如父如子·如兄如弟。莫不仁賢·和順禮節。都無違諍·快善無極。佛言。我哀若曹子·欲度脫之·劇父母念子。今八方上下諸天帝王人民·及蜎飛蠕動之類·得佛經戒·奉行佛道·皆得明慧·心悉開解·莫不得過度解脫憂苦者。今我作佛·在於五惡五痛五燒之中。降化五惡·消盡五痛·絕滅五燒·以善攻惡·拔去毒苦。令得五道·令得五善明好·燒惡不起。我般泥洹去後·經道稍斷絕。人民諛諂·稍復為眾惡·不復作善。五燒復起。五痛劇苦·復如前法·自然還復。久後轉劇·不可悉說。我但為若曹小道之耳。佛告阿逸菩薩等。若曹各思持之。展轉相教誡·如佛經法·無敢違犯。阿逸菩薩長跪叉手言。佛道說甚苦痛。世人為惡·甚劇如是。佛皆慈哀·悉度脫之。皆言受佛重教·請展轉相教·不敢違犯。

佛告阿難。我哀若曹·令悉見阿彌陀佛·及諸菩薩阿羅漢·所居國土。若欲見之不。阿難即大歡喜。長跪叉手言。願皆欲見之。佛言。若起·更被袈裟·西向拜·當日所沒處·為阿彌陀佛作禮·以頭腦著地·言南無阿彌陀三耶三佛檀。阿難言。諾·受教。即起更被袈裟·西向拜·當日所沒處·為彌陀佛作禮·以頭腦著地·言南無阿彌陀三耶三佛檀。阿難未起·阿彌陀佛便大放光明威神·則徧八方上下諸無央數佛國。諸無央數諸天地·即皆為大震動。諸無央數天地須彌山羅寶·摩訶須彌大山羅寶·諸天地大界小界·其中諸大泥犁小泥犁·諸山林溪谷幽冥之處·即皆大明·悉大開

闢。即時阿難諸菩薩阿羅漢等。諸天帝王人民。悉皆見阿彌陀佛及諸菩薩阿羅漢國土七寶已。心大歡喜踊躍。悉起為阿彌陀佛作禮。以頭腦著地。皆言南無阿彌陀三耶三佛檀。阿彌陀佛放大光明威神已。無央數諸天人民。及蜎飛蠕動之類。皆悉見阿彌陀佛光明。莫不慈心歡喜者。諸有泥犁禽獸薜荔。諸有拷治勤苦之處。即皆休止。不復拷治。莫不解脫憂苦者也。諸有盲者。即皆得視。諸有聾者。即皆得聽。諸有瘖瘂。即皆能語。諸有僂者。即皆得伸。諸跛躄蹇者。即皆走行。諸有病者。即皆愈起。諸尪者。則皆強健。愚者。皆點慧。諸有姪者。皆修梵行。瞋怒者。悉皆慈心作善。諸有被毒者。毒皆不行。鍾磬琴瑟。箏篪樂器。諸伎不鼓。皆自作五音聲。婦女珠環。皆自作聲。百鳥畜獸。皆自悲鳴。當于是時。莫不歡喜善樂。得過度者。即爾時諸佛國中諸天人民。莫不持天上華香來下。於虛空中。悉皆供養。散諸佛及阿彌陀佛上。諸天各共大作萬種自然伎。樂諸佛及諸菩薩阿羅漢。當是之時。甚快樂不可言。佛告阿難阿逸菩薩等。我說阿彌陀佛及諸菩薩阿羅漢國土自然七寶。儻無有異乎。阿難長跪叉手言。佛說阿彌陀佛國土快善。如佛所言。無有一異。佛言。我說阿彌陀佛功德國土快善。晝夜盡一劫。尚復未竟。我但為若曹小說之耳。阿逸菩薩即長跪叉手問佛言。今佛國土。從是間當有幾何阿惟越致菩薩往生阿彌陀佛國。願欲聞之。佛言。汝欲知者。明聽著心中。阿逸菩薩言。受教。佛言。從我國。當有七百二十億阿惟越致菩薩。皆當往生阿彌陀佛國。一阿惟越致菩薩者。前後供養無央數諸佛。以次如彌勒。皆當作佛。及其餘諸小菩薩輩者。無央數不可復計。皆當往生阿彌陀佛國。佛告阿逸菩薩。不但我國中諸菩薩。當往生阿彌陀佛國。他方異國復有佛。亦復如是。第一佛。名頭樓和斯。其國有百八十億菩薩。皆當往生

阿彌陀佛國。他方異國第二佛。名羅鄰那阿竭。其國有九十億菩薩。皆當往生阿彌陀佛國。他方異國第三佛。名朱蹄彼會蔡。其國有二百二十億菩薩。皆當往生阿彌陀佛國。他方異國第四如來。名阿密蔡羅薩。其國有二百五十億菩薩。皆當往生阿彌陀佛國。他方異國第五佛。名樓波黎波蔡際。其國有六百億菩薩。皆當往生阿彌陀佛國。他方異國第六佛。名那惟于蔡。其國有萬四千菩薩。皆當往生阿彌陀佛國。他方異國第七佛。名維黎波羅潘蔡際。其國有十五菩薩。皆當往生阿彌陀佛國。他方異國第八佛。名和阿蔡。其國有八菩薩。皆當往生阿彌陀佛國。他方異國第九佛。名尸利羣蔡。其國有八百一十億菩薩。皆當往生阿彌陀佛國。他方異國第十佛。名那他蔡。其國有萬億菩薩。皆當往生阿彌陀佛國。他方異國第十一佛。名和羅那惟于蔡際。其國有萬二千菩薩。皆當往生阿彌陀佛國。他方異國第十二佛。名沸霸圖耶蔡。其國有諸菩薩無央數不可復計。皆阿惟越致。皆智慧勇猛。各供養無央數諸佛已。一時俱心願欲往生。皆當生阿彌陀佛國。他方異國第十三佛。名隨阿閱祇波多蔡。其國有七百九十億菩薩。皆當往生阿彌陀佛國。佛言。是諸菩薩。皆阿惟越致。諸比丘僧中及小菩薩輩無央數。皆當往生阿彌陀佛國。不獨是十四佛國中諸菩薩當往生也。都八方上下無央數佛國諸菩薩輩。各各在是。皆當往生阿彌陀佛國。甚無央數都共往會阿彌陀佛國。大眾多不可計。我但說八方上下無央數諸佛名字。晝夜一劫尚未竟。我但復說諸佛國諸比丘僧眾菩薩。當往生阿彌陀佛國人數。說之一劫不休止。尚未竟。我但為若曹總攬。都小說之耳。佛語阿難阿逸菩薩等。其世間帝王人民。善男子善女人。前世宿命作善所致。相祿巍巍。乃當聞阿彌陀佛聲者。甚快善。我代之喜。佛言。其有善男子善女人。聞阿彌陀佛聲。慈心歡喜。一時踊躍。心

意淨潔·衣毛為起·淚即出者·皆前世宿命作佛道·若他方佛·故菩薩·非凡人。其有人民男子女人·聞阿彌陀佛聲不信有者·不信經佛語·不信有比丘僧·心中狐疑·都無所信者·皆故從惡道中來生·愚癡不解·宿命殃惡未盡·尚未當度脫·故心中狐疑·不信向耳。佛言。我語若曹。若曹所當作善法·皆當奉行信之·無得狐疑。我般泥洹去後·汝曹及後世人·無得復言我不信有阿彌陀佛國。我故令若曹悉見阿彌陀佛國土。所當為者各求之。我具為若曹·道說經戒慎法。若曹當如佛法持之·無得毀失。我持是經·以累若曹。若曹當堅持之·無得為妄增減是經法。我般泥洹去後·經道留止千歲。千歲後·經道斷絕。我皆慈哀·特留是經法·止住百歲。百歲中竟·乃休止斷絕。在心所願·皆可得道。佛言。師開道人耳目·智慧明達。度脫人·令得善合泥洹之道。常當孝慈於佛如父母·常當念師恩。常念不絕·即得道疾。佛言。天下有佛者·甚難值。若有沙門若師·為人說經者·甚難值。佛說是經時·即萬二千億諸天人民·皆得天眼徹視·悉一心皆為菩薩道。即二百億諸天人民·皆得阿那含道。即八百沙門·皆得阿羅漢道。即四十億菩薩·皆得阿惟越致。佛說經已·諸菩薩阿羅漢·諸天帝王人民·皆大歡喜·起為佛作禮·遶三匝·前以頭面著佛足而去。

佛說阿彌陀三耶三佛薩樓佛檀過度人道經卷下

佛說無量壽經

佛說無量壽經卷上

原本為(清)清龍藏本。 甲·直接校本四。 一·(磧)宋磧砂藏補本影印本。 二·(甯)金陵刻經處本。 三·(大)日本大正藏本。 四·(卍)日本卍字藏本。 乙·間接校本五。 一·(麗)高麗藏本。 二·(宋)宋思溪藏本。 三·(元)元普寧藏本。 四·(明)明嘉興藏本。 五·(流)日本流布本。 此五本均據大正·麗本則兼據卍字。 大卍所刊此經·均以麗為原本。故校勘記中·二本文字同處作麗·異處作大與卍。 文旁數字標校勘記號數。校勘記見經文後。

曹魏康僧鎧譯

我聞如是。一時·佛住王舍城耆闍崛山中。與大比丘眾萬二千人俱。一切大聖·神通已達。其名曰·尊者了本際·尊者正願·尊者正語·尊者大號·尊者仁賢·尊者離垢·尊者名聞·尊者善實·尊者具足·尊者牛王·尊者優樓頻螺迦葉·尊者伽耶迦葉·尊者那提迦葉·尊者摩訶迦葉·尊者舍利弗·尊者大目犍連·尊者劫賓那·尊者大住·尊者大淨志·尊者摩訶周那·尊者滿願子·尊者離鄣·尊者流灌·尊者堅伏·尊者面王·尊者異乘·尊者仁性·尊者嘉樂·尊者善來·尊者羅云·尊者阿難·皆如斯等上首者也。又與大乘眾菩薩俱。普賢菩薩·妙德菩薩·慈氏菩薩等·此賢劫中一切菩薩。又賢護等十六正士·善思議菩薩·信慧菩薩·空無菩薩·神通華菩薩·光英菩薩·慧上菩薩·智幢菩薩·寂根菩薩·願慧菩薩·香象菩薩·寶英菩薩·中住菩薩·制行菩薩·解脫菩薩。皆遵普賢大士之德。具諸菩薩無量行願。安

住一切功德之法。遊步十方。行權方便。入佛法藏。究竟彼岸。於無量世界。現成等覺。處兜術天。弘宣正法。捨彼天宮。降神母胎。從右脅生。現行七步。光明顯耀。普照十方。無量佛土。六種震動。舉聲自稱。吾當於世為無上尊。釋梵奉侍。天人歸仰。示現算計文藝射御。博綜道術。貫練羣籍。遊於後園。講武試藝。現處宮中色味之間。見老病死。悟世非常。棄國財位。入山學道。服乘白馬。寶冠瓔珞。遣之令還。捨珍妙衣。而著法服。剃除鬚髮。端坐樹下。勤苦六年。行如所應。現五濁剎。隨順羣生。示有塵垢。沐浴金流。天案樹枝。得攀出池。靈禽翼從。往詣道場。吉祥感徵。表章功祚。哀受施草。敷佛樹下。跏趺而坐。奮大光明。使魔知之。魔率官屬。而來逼試。制以智力。皆令降伏。得微妙法。成最正覺。釋梵祈勸。請轉法輪。以佛遊步。佛吼而吼。扣法鼓。吹法螺。執法劍。建法幢。震法雷。曜法電。澍法雨。演法施。常以法音覺諸世間。光明普照無量佛土。一切世界六種震動。總攝魔界。動魔宮殿。眾魔懼怖。莫不歸伏。搥裂邪網。消滅諸見。散諸塵勞。壞諸欲塹。嚴護法城。開闡法門。洗濯垢污。顯明清白。光融佛法。宣流正化。入國分衛。獲諸豐饒。貯功德。示福田。欲宣法。現欣笑。以諸法藥。救療三苦。顯現道意。無量功德。授菩薩記。成等正覺。示現滅度。拯濟無極。消除諸漏。植眾德本。具足功德。微妙難量。遊諸佛國。普現道教。其所修行。清淨無穢。譬如幻師。現眾異像。為男為女。無所不變。本學明了。在意所為。此諸菩薩。亦復如是。學一切法。貫綜縷練。所住安諦。靡不感化。無數佛土。皆悉普現。未曾慢恣。愍傷眾生。如是之法。一切具足。菩薩經典。究暢要妙。名稱普至。道御十方。無量諸佛。咸共護念。佛所住者。皆已得住。大聖所立。而皆已

立。如來道化。各能宣布。為諸菩薩。而作大師。以甚深禪慧。開導眾生。通諸法性。達眾生相。明了諸國。供養諸佛。化現其身。猶如電光。善學無畏之網。曉了幻化之法。壞裂魔網。解諸纏縛。超越聲聞緣覺之地。得空無相無願三昧。善立方便。顯示三乘。於此化終。而現滅度。亦無所作。亦無所有。不起不滅。得平等法。具足成就無量總持。百千三昧。諸根智慧。廣普寂定。深入菩薩法藏。得佛華嚴三昧。宣揚演說一切經典。住深定門。悉觀現在無量諸佛。一念之頃。無不周徧。濟諸劇難。諸閑不閑。分別顯示真實之際。得諸如來辯才之智。入眾言音。開化一切。超過世間諸所有法。心常諦住度世之道。於一切萬物。而隨意自在。為諸庶類。作不請之友。荷負羣生。為之重擔。受持如來甚深法藏。護佛種性。常使不絕。興大悲。愍眾生。演慈辯。授法眼。杜三趣。開善門。以不請之法。施諸黎庶。如純孝之子愛敬父母。於諸眾生。視若自己。一切善本。皆度彼岸。悉獲諸佛無量功德。智慧聖明。不可思議。如是之等菩薩大士。不可稱計。一時來會。

爾時世尊。諸根悅豫。姿色清淨。光顏巍巍。尊者阿難。承佛聖旨。即從座起。偏袒右肩。長跪合掌。而白佛言。今日世尊。諸根悅豫。姿色清淨。光顏巍巍。如明鏡淨。影暢表裏。威容顯耀。超絕無量。未嘗瞻觀殊妙如今。唯然大聖。我心念言。今日世尊住奇特之法。今日世尊住諸佛所住。今日世尊住導師之行。今日世尊住最勝之道。今日天尊行如來之德。去來現在佛佛相念。得無今佛念諸佛耶。何故威神光光乃爾。於是世尊告阿難曰。云何阿難。諸天教汝來問佛耶。自以慧見問威顏乎。阿難白佛。無有諸天來教我者。自以所見問斯義耳。佛言。善哉阿難。所問甚快。發深智慧。真妙辯才。愍念眾生。問斯慧義。如來以無盡大

悲·矜哀三界。所以出興於世·光闡道教。欲拯濟羣萌·惠以真實之利。無量億劫·難值難見。猶靈瑞華·時時乃出。今所問者·多所饒益·開化一切諸天人民。阿難當知。如來正覺·其智難量。多所導御·慧見無礙·無能遏絕。以一餐之力·能住壽命億百千劫·無數無量復過於此。諸根悅豫·不以毀損。姿色不變·光顏無異。所以者何。如來定慧·究暢無極。於一切法·而得自在。阿難諦聽。今為汝說。對曰。唯然。願樂欲聞。

佛告阿難。乃往過去久遠無量不可思議無央數劫·錠光如來興出於世。教化度脫無量眾生·皆令得道·乃取滅度。次有如來·名曰光遠。次名月光。次名旃檀香。次名善山王。次名須彌天冠。次名須彌等曜。次名月色。次名正念。次名離垢。次名無著。次名龍天。次名夜光。次名安明頂。次名不動地。次名瑠璃妙華。次名瑠璃金色。次名金藏。次名炎光。次名炎根。次名地種。次名月像。次名日音。次名解脫華。次名莊嚴光明。次名海覺神通。次名水光。次名大香。次名離塵垢。次名捨厭意。次名寶炎。次名妙頂。次名勇立。次名功德持慧。次名蔽日月光。次名日月瑠璃光。次名無上瑠璃光。次名最上首。次名菩提華。次名月明。次名日光。次名華色王。次名水月光。次名除癡冥。次名度蓋行。次名淨信。次名善宿。次名威神。次名法慧。次名鸞音。次名師子音。次名龍音。次名處世。如此諸佛·皆悉已過。

爾時次有佛·名世自在王·如來·應供·等正覺·明行足·善逝·世間解·無上士·調御丈夫·天人師·佛·世尊。時有國王·聞佛說法·心懷悅豫。尋發無上正真道意。棄國捐王·行作沙門·號曰法藏。高才勇哲·與世超異。詣

世自在王如來所。稽首佛足。右繞三匝。長跪合掌。以頌讚曰。

光顏巍巍。威神無極。如是炎明。無與等者。日月摩尼。珠光燄耀。皆悉隱蔽。猶如聚墨。如來顏容。超世無倫。正覺大音。響流十方。戒聞精進。三昧智慧。威德無侶。殊勝希有。深諦善念。諸佛法海。窮深盡奧。究其涯底。無明欲怒。世尊永無。人雄師子。神德無量。功勳廣大。智慧深妙。光明威相。震動大千。願我作佛。齊聖法王。過度生死。靡不解脫。布施調意。戒忍精進。如是三昧。智慧為上。吾誓得佛。普行此願。一切恐懼。為作大安。假令有佛。百千億萬。無量大聖。數如恆沙。供養一切。斯等諸佛。不如求道。堅正不卻。譬如恆沙。諸佛世界。復不可計。無數剎土。光明悉照。徧此諸國。如是精進。威神難量。令我作佛。國土第一。其眾奇妙。道場超絕。國如泥洹。而無等雙。我當愍哀。度脫一切。十方來生。心悅清淨。已至我國。快樂安隱。幸佛明信。是我真證。發願於彼。力精所欲。十方世尊。智慧無礙。常令此尊。知我心行。假使身止。諸苦毒中。我行精進。忍終不悔。

佛告阿難。法藏比丘說此頌已。而白佛言。唯然世尊。我發無上正覺之心。願佛為我廣宣經法。我當修行。攝取佛國清淨莊嚴無量妙土。令我於世速成正覺。拔諸生死勤苦之本。佛告阿難。時世自在王佛語法藏比丘。如所修行。莊嚴佛土。汝自當知。比丘白佛。斯義弘深。非我境界。唯願世尊。廣為敷演諸佛如來淨土之行。我聞此已。當如說修行。成滿所願。爾時世自在王佛。知其高明。志願深廣。即為法藏比丘而說經言。譬如大海。一人斗量。經歷劫數。尚可窮底。得其妙寶。人有至心精進。求道不止。會當剋果。何願

不得。於是世自在王佛。卽為廣說二百一十億諸佛剎土天人之善惡。國土之粗妙。應其心願。悉現與之。時彼比丘。聞佛所說嚴淨國土。皆悉覩見。起發無上殊勝之願。其心寂靜。志無所著。一切世間。無能及者。具足五劫。思惟攝取莊嚴佛國清淨之行。阿難白佛。彼佛國土。壽量幾何。佛言。其佛壽命四十二劫。時法藏比丘。攝取二百一十億諸佛妙土清淨之行。如是修已。詣彼佛所。稽首禮足。繞佛三匝。合掌而住。白佛言。世尊。我已攝取莊嚴佛土清淨之行。佛告比丘。汝今可說。宜知是時。發起悅可一切大眾。菩薩聞已。修行此法。緣致滿足無量大願。比丘白佛。唯垂聽察。如我所願。當具說之。

設我得佛。國有地獄餓鬼畜生者。不取正覺。

設我得佛。國中天人壽終之後。復更三惡道者。不取正覺。

設我得佛。國中天人不悉真金色者。不取正覺。

設我得佛。國中天人形色不同。有好醜者。不取正覺。

設我得佛。國中天人不識宿命。下至知百千億那由他諸劫事者。不取正覺。

設我得佛。國中天人不得天眼。下至見百千億那由他諸佛國者。不取正覺。

設我得佛。國中天人不得天耳。下至聞百千億那由他諸佛所說。不悉受持者。不取正覺。

設我得佛。國中天人不得見他心智。下至知百千億那由他諸佛國中眾生心念者。不取正覺。

設我得佛·國中天人不得神足·於一念頃·下至不能超過百千億那由他諸佛國者·不取正覺。

設我得佛·國中天人若起想念貪計身者·不取正覺。

設我得佛·國中天人不住定聚必至滅度者·不取正覺。

設我得佛·光明有限量·下至不照百千億那由他諸佛國者·不取正覺。

設我得佛·壽命有限量·下至百千億那由他劫者·不取正覺。

設我得佛·國中聲聞有能計量·乃至三千大千世界眾生悉成緣覺·於百千劫悉共計校·知其數者·不取正覺。

設我得佛·國中天人壽命無能限量·除其本願脩短自在·若不爾者·不取正覺。

設我得佛·國中天人乃至聞有不善名者·不取正覺。

設我得佛·十方世界無量諸佛不悉咨嗟稱我名者·不取正覺。

設我得佛·十方眾生至心信樂欲生我國·乃至十念·若不生者·不取正覺·唯除五逆誹謗正法。

設我得佛·十方眾生發菩提心·修諸功德·至心發願欲生我國·臨壽終時·假令不與大眾圍繞現其人前者·不取正覺。

設我得佛·十方眾生聞我名號·繫念我國·植眾德本·至心迴向欲生我國·不果遂者·不取正覺。

設我得佛·國中天人不知成滿三十二大人相者·不取正

覺。

設我得佛·他方佛土諸菩薩眾來生我國·究竟必至一生補處。除其本願自在所化·為眾生故被弘誓鎧·積累德本度脫一切·遊諸佛國修菩薩行·供養十方諸佛如來·開化恆沙無量眾生·使立無上正真之道·超出常倫諸地之行·現前修習普賢之德。若不爾者·不取正覺。

設我得佛·國中菩薩承佛神力供養諸佛·一食之頃·不能徧至無數無量億那由他諸佛國者·不取正覺。

設我得佛·國中菩薩在諸佛前現其德本·諸所求欲供養之具·若不如意者·不取正覺。

設我得佛·國中菩薩不能演說一切智者·不取正覺。

設我得佛·國中菩薩不得金剛那羅延身者·不取正覺。

設我得佛·國中天人一切萬物·嚴淨光麗·形色殊特·窮微極妙·無能稱量。其諸眾生·乃至逮得天眼·有能明了辨其名數者·不取正覺。

設我得佛·國中菩薩·乃至少功德者·不能知見其道場樹無量光色·高四百萬里者·不取正覺。

設我得佛·國中菩薩·若受讀經法諷誦持說·而不得辯才智慧者·不取正覺。

設我得佛·國中菩薩智慧辯才若可限量者·不取正覺。

設我得佛·國土清淨·皆悉照見十方一切無量無數不可思議諸佛世界·猶如明鏡觀其面像。若不爾者·不取正覺。

設我得佛·自地以上至於虛空·宮殿樓觀·池流華樹·

國土所有一切萬物·皆以無量雜寶百千種香而共合成。嚴飾奇妙·超諸天人。其香普薰十方世界。菩薩聞者·皆修佛行。若不如是·不取正覺。

設我得佛·十方無量不可思議諸佛世界眾生之類·蒙我光明觸其身者·身心柔軟·超過天人。若不爾者·不取正覺。

設我得佛·十方無量不可思議諸佛世界眾生之類·聞我名字·不得菩薩無生法忍諸深總持者·不取正覺。

設我得佛·十方無量不可思議諸佛世界·其有女人·聞我名字·歡喜信樂·發菩提心·厭惡女身·壽終之後復為女像者·不取正覺。

設我得佛·十方無量不可思議諸佛世界諸菩薩眾·聞我名字·壽終之後·常修梵行·至成佛道。若不爾者·不取正覺。

設我得佛·十方無量不可思議諸佛世界諸天人民·聞我名字·五體投地·稽首作禮·歡喜信樂·修菩薩行·諸天世人莫不致敬。若不爾者·不取正覺。

設我得佛·國中天人欲得衣服·隨念卽至。如佛所讚應法妙服·自然在身。有求裁縫擣染浣濯者·不取正覺。

設我得佛·國中天人所受快樂·不如漏盡比丘者·不取正覺。

設我得佛·國中菩薩隨意欲見十方無量嚴淨佛土·應時如願。於寶樹中皆悉照見。猶如明鏡覩見其面像。若不爾者·不取正覺。

設我得佛·他方國土諸菩薩眾·聞我名字·至於得佛·諸根缺陋不具足者·不取正覺。

設我得佛·他方國土諸菩薩眾·聞我名字·皆悉逮得清淨解脫三昧·住是三昧·一發意頃·供養無量不可思議諸佛世尊·而不失定意·若不爾者·不取正覺。

設我得佛·他方國土諸菩薩眾·聞我名字·壽終之後·生尊貴家·若不爾者·不取正覺。

設我得佛·他方國土諸菩薩眾·聞我名字·歡喜踊躍·修菩薩行·具足德本·若不爾者·不取正覺。

設我得佛·他方國土諸菩薩眾·聞我名字·皆悉逮得普等三昧·住是三昧·至於成佛·常見無量不可思議一切諸佛·若不爾者·不取正覺。

設我得佛·國中菩薩·隨其志願所欲聞法·自然得聞·若不爾者·不取正覺。

設我得佛·他方國土諸菩薩眾·聞我名字·不即得至不退轉者·不取正覺。

設我得佛·他方國土諸菩薩眾·聞我名字·不即得至第一忍·第二第三法忍·於諸佛法不能即得不退轉者·不取正覺·佛告阿難·爾時法藏比丘說此願已·以偈頌曰。

我建超世願·必至無上道·斯願不滿足·誓不成等覺

我於無量劫·不為大施主·普濟諸貧苦·誓不成等覺

我至成佛道·名聲超十方·究竟靡所聞·誓不成等覺

離欲深正念·淨慧修梵行·志求無上尊·為諸天人師

神力演大光。普照無際土。消除三垢冥。明濟眾厄難
開彼智慧眼。滅此昏盲暗。閉塞諸惡道。通達善趣門
功祚成滿足。威曜朗十方。日月戢重暉。天光隱不現
為眾開法藏。廣施功德寶。常於大眾中。說法師子吼
供養一切佛。具足眾德本。願慧悉成滿。得為三界雄
如佛無礙智。通達靡不照。願我功德力。等此最勝尊
斯願若剋果。大千應感動。虛空諸天神。當雨珍妙華

佛語阿難。法藏比丘說此頌已。應時普地六種震動。天
雨妙華以散其上。自然音樂空中讚言。決定必成無上正覺。
於是法藏比丘。具足修滿如是大願。誠諦不虛。超出世間。
深樂寂滅。阿難。法藏比丘於其佛所。諸天魔梵龍神八部大
眾之中。發斯弘誓。建此願已。一向專志莊嚴妙土。所修佛
國。開廓廣大。超勝獨妙。建立常然。無衰無變。於不可思
議兆載永劫。積植菩薩無量德行。不生欲覺瞋覺害覺。不起
欲想瞋想害想。不著色聲香味觸法。忍力成就。不計眾苦。
少欲知足。無染恚癡。三昧常寂。智慧無礙。無有虛偽諂曲
之心。和顏愛語。先意承問。勇猛精進。志願無倦。專求清
白之法。以惠利羣生。恭敬三寶。奉事師長。以大莊嚴具
足眾行。令諸眾生功德成就。住空無相無願之法。無作無
起。觀法如化。遠離粗言。自害害彼。彼此俱害。修習善
語。自利利人。人我兼利。棄國捐王。絕去財色。自行六波
羅蜜。教人令行。無央數劫。積功累德。隨其生處。在意所
欲。無量寶藏。自然發應。教化安立無數眾生。住於無上正
真之道。或為長者居士豪姓尊貴。或為剎利國君轉輪聖帝。
或為六欲天主乃至梵王。常以四事供養恭敬一切諸佛。如是

功德·不可稱說。口氣香潔·如優鉢羅華。身諸毛孔·出旃檀香。其香普熏無量世界。容色端正·相好殊妙。其手常出無盡之寶·衣服飲食·珍妙華香·繒蓋幢幡·莊嚴之具。如是等事·超諸天人。於一切法而得自在。阿難白佛。法藏菩薩·為已成佛而取滅度。為未成佛·為今現在。佛告阿難。法藏菩薩今已成佛。現在西方·去此十萬億剎。其佛世界·名曰安樂。阿難又問。其佛成道已來·為經幾時。佛言。成佛已來·凡歷十劫。其佛國土·自然七寶·金銀琉璃珊瑚琥珀磔磔碼碯·合成為地。恢廓廣蕩·不可限極。悉相雜廁·轉相間入。光赫煜爍·微妙奇麗·清淨莊嚴·超踰十方一切世界眾寶中精。其寶猶如第六天寶。又其國土無須彌山·及金剛圍一切諸山。亦無大海小海·溪渠井谷。佛神力故·欲見則見。亦無地獄餓鬼畜生諸難之趣。亦無四時·春夏秋冬夏。不寒不熱·常和調適。爾時阿難白佛言。世尊。若彼國土無須彌山·其四天王及忉利天·依何而住。佛語阿難。第三炎天乃至色究竟天·皆依何住。阿難白佛。行業果報不可思議。佛語阿難。行業果報不可思議·諸佛世界亦不可思議。其諸眾生功德善力·住行業之地·故能爾耳。阿難白佛。我不疑此法。但為將來眾生·欲除其疑惑·故問斯義。

佛告阿難。無量壽佛威神光明最尊第一。諸佛光明所不能及。或照百佛世界。或千佛世界。取要言之·乃照東方恆沙佛剎。南西北方四維上下·亦復如是。或有佛光照於七尺。或一由旬·二三四五由旬。如是轉倍·乃至照一佛剎。是故無量壽佛·號無量光佛·無邊光佛·無礙光佛·無對光佛·炎王光佛·清淨光佛·歡喜光佛·智慧光佛·不斷光佛·難思光佛·無稱光佛·超日月光佛。其有眾生遇斯光者·三垢消滅·身意柔軟·歡喜踴躍·善心生焉。若在三塗極苦之處·見此光明·皆得休息·無復苦惱。壽終之後·皆

蒙解脫。無量壽佛光明顯赫。照耀十方。諸佛國土。莫不聞焉。不但我今稱其光明。一切諸佛聲聞緣覺諸菩薩眾。咸共歎譽。亦復如是。若有眾生。聞其光明威神功德。日夜稱說。至心不斷。隨意所願。得生其國。為諸菩薩聲聞之眾所共歎譽。稱其功德。至其然後得佛道時。普為十方諸佛菩薩歎其光明。亦如今也。佛言。我說無量壽佛光明威神巍巍殊妙。晝夜一劫。尚未能盡。

佛語阿難。又無量壽佛壽命長久不可稱計。汝寧知乎。假使十方世界無量眾生皆得人身。悉令成就聲聞緣覺。都共集會。禪思一心。竭其智力。於百千萬劫。悉共推算。計其壽命長遠之數。不能窮盡知其限極。聲聞菩薩天人之眾壽命長短。亦復如是。非算數譬喻所能知也。又聲聞菩薩。其數難量。不可稱說。神智洞達。威力自在。能於掌中持一切世界。佛語阿難。彼佛初會聲聞眾數不可稱計。菩薩亦然。如大目犍連百千萬億無量無數。於阿僧祇那由他劫乃至滅度。悉共計校。不能究了多少之數。譬如大海深廣無量。假使有人析其一毛以為百分。以一分毛沾取一滂。於意云何。其所滂者。於彼大海。何所為多。阿難白佛。彼所滂水。比於大海多少之量。非巧曆算數言辭譬類所能知也。佛語阿難。如目連等。百千萬億那由他劫。計彼初會聲聞菩薩。所知數者。猶如一滂。其所不知。如大海水。又其國土。七寶諸樹。周滿世界。金樹。銀樹。瑠璃樹。玻瓈樹。珊瑚樹。碼碯樹。碑磔之樹。或有二寶三寶。乃至七寶。轉共合成。或有金樹。銀葉華果。或有銀樹。金葉華果。或瑠璃樹。玻瓈為葉。華果亦然。或水精樹。瑠璃為葉。華果亦然。或珊瑚樹。瑪瑙為葉。華果亦然。或碼碯樹。瑠璃為葉。華果亦然。或碑磔樹。眾寶為葉。華果亦然。或有寶樹。紫金為本。白銀為莖。瑠璃為枝。水精為條。珊瑚為葉。碼碯為

華。碑磔為實。或有寶樹。白銀為本。瑠璃為莖。水精為枝。珊瑚為條。碼碯為葉。碑磔為華。紫金為實。或有寶樹。瑠璃為本。水精為莖。珊瑚為枝。碼碯為條。碑磔為葉。紫金為華。白銀為實。或有寶樹。水精為本。珊瑚為莖。碼碯為枝。碑磔為條。紫金為葉。白銀為華。瑠璃為實。或有寶樹。珊瑚為本。碼碯為莖。碑磔為枝。紫金為條。白銀為葉。瑠璃為華。水精為實。或有寶樹。碼碯為本。碑磔為莖。紫金為枝。白銀為條。瑠璃為葉。水精為華。珊瑚為實。或有寶樹。碑磔為本。紫金為莖。白銀為枝。瑠璃為條。水精為葉。珊瑚為華。碼碯為實。行行相值。莖莖相望。枝枝相准。葉葉相向。華華相順。實實相當。榮色光曜。不可勝視。清風時發。出五音聲。微妙宮商。自然相和。又無量壽佛。其道場樹。高四百萬里。其本周圍五千由旬。枝葉四布二十萬里。一切眾寶。自然合成。以月光摩尼持海輪寶。眾寶之王。而莊嚴之。周帀條間。垂寶瓔珞。百千萬色。種種異變。無量光炎。照曜無極。珍妙寶網。羅覆其上。一切莊嚴。隨應而現。微風徐動。吹諸寶樹。演出無量妙法音聲。其聲流布。徧諸佛國。聞其音者。得深法忍。住不退轉。至成佛道。耳根清徹。不遭苦患。目覩其色。鼻知其香。口嘗其味。身觸其光。心以法緣。皆得甚深法忍。住不退轉。至成佛道。六根清徹。無諸惱患。阿難。若彼國土天人。見此樹者。得三法忍。一者音響忍。二者柔順忍。三者無生法忍。此皆無量壽佛威神力故。本願力故。滿足願故。明了願故。堅固願故。究竟願故。佛告阿難。世間帝王。有百千音樂。自轉輪聖王。乃至第六天上。伎樂音聲。展轉相勝千億萬倍。第六天上萬種樂音。不如無量壽國諸七寶樹一種音聲千億倍也。亦有自然萬種伎樂。又其樂聲。無非法音。清暢哀亮。微妙和雅。十方世界音聲之

中·最為第一。其講堂精舍宮殿樓觀·皆七寶莊嚴·自然化成。復以真珠明月摩尼眾寶·以為交絡·覆蓋其上。內外左右·有諸浴池。或十由旬。或二十三十·乃至百千由旬。縱廣深淺·皆各一等。八功德水·湛然盈滿。清淨香潔·味如甘露。黃金池者·底白銀沙。白銀池者·底黃金沙。水精池者·底琉璃沙。琉璃池者·底水精沙。珊瑚池者·底琥珀沙。琥珀池者·底珊瑚沙。碑磔池者·底碼碯沙。碼碯池者·底碑磔沙。白玉池者·底紫金沙。紫金池者·底白玉沙。或有二寶三寶·乃至七寶·轉共合成。其池岸上·有旃檀樹。華葉垂布·香氣普熏。天優鉢羅華·鉢曇摩華·拘牟頭華·分陀利華·雜色光茂·彌覆水上。彼諸菩薩及聲聞眾·若入寶池·意欲令水沒足·水即沒足。欲令至膝·即至於膝。欲令至腰·水即至腰。欲令至頸·水即至頸。欲令灌身·自然灌身。欲令還復·水輒還復。調和冷暖·自然隨意。開神悅體·蕩除心垢。清明澄潔·淨若無形。寶沙映徹·無深不照。微瀾迴流·轉相灌注。安詳徐逝·不遲不疾。波揚無量自然妙聲。隨其所應·莫不聞者。或聞佛聲·或聞法聲·或聞僧聲·或寂靜聲·空無我聲·大慈悲聲·波羅蜜聲·或十力無畏不共法聲·諸通慧聲·無所作聲·不起滅聲·無生忍聲·乃至甘露灌頂眾妙法聲。如是等聲稱其所聞·歡喜無量。隨順清淨離欲寂滅真實之義。隨順三寶力無所畏不共之法。隨順通慧菩薩聲聞所行之道。無有三塗苦難之名·但有自然快樂之音。是故其國名曰安樂。阿難。彼佛國土諸往生者·具足如是清淨色身·諸妙音聲·神通功德。所處宮殿·衣服飲食·眾妙華香·莊嚴之具·猶第六天自然之物。若欲食時·七寶鉢器自然在前。金銀琉璃碑磔碼碯珊瑚琥珀明月真珠·如是諸鉢·隨意而至。百味飲食·自然盈滿。雖有此食·無食者。但見色聞香·意以為食。自然飽

足·身心柔軟。無所味著。事已化去·時至復現。彼佛國土清淨安隱微妙快樂·次於無為泥洹之道。其諸聲聞菩薩天人·智慧高明·神通洞達。咸同一類·形無異狀。但因順餘方·故有天人之名。顏貌端正·超世希有。容色微妙·非天非人。皆受自然虛無之身·無極之體。佛告阿難。譬如世間貧窮乞人在帝王邊。形貌容狀寧可類乎。阿難白佛。假令此人在帝王邊·羸陋醜惡無以為喻·百千萬億不可計倍。所以然者。貧窮乞人·底極斯下。衣不蔽形·食趣支命。飢寒困苦·人理殆盡。皆坐前世不植德本。積財不施·富有益慳。但欲唐得·貪求無厭。不信修善·犯惡山積。如是壽終·財寶消散。苦身聚積·為之憂惱。於己無益·徒為他有。無善可怙·無德可恃。是故死墮惡趣·受此長苦。罪畢得出·生為下賤。愚鄙斯極·示同人類。所以世間帝王人中獨尊·皆由宿世積德所致。慈惠博施·仁愛兼濟。履信修善·無所違爭。是以壽終福應·得升善道。上生天上·享茲福樂。積善餘慶·今得為人。乃生王家·自然尊貴。儀容端正·眾所敬事。妙衣珍饈·隨心服御。宿福所追·故能致此。佛告阿難。汝言是也。計如帝王·雖人中尊貴·形色端正。比之轉輪聖王·甚為鄙陋·猶彼乞人在帝王邊也。轉輪聖王·威相殊妙·天下第一。比之忉利天王·又復醜惡·不得相喻·萬億倍也。假令天帝比第六天王·百千億倍不相類也。設第六天王·比無量壽佛國菩薩聲聞·光顏容色不相及逮·百千萬億不可計倍。佛告阿難。無量壽國·其諸天人·衣服飲食·華香瓔珞。繒蓋幢幡·微妙音聲·所居舍宅宮殿樓閣·稱其形色高下大小或一寶二寶·乃至無量眾寶·隨意所欲·應念即至。又以眾寶妙衣·徧布其地。一切天人·踐之而行。無量寶網·彌覆佛土。皆以金縷真珠·百千雜寶·奇妙珍異·莊嚴校飾。周帀四面·垂以寶鈴。光色晃曜·盡極嚴麗。自

然得風·徐起微動。其風調和·不寒不暑。溫涼柔軟·不遲不疾。吹諸羅網及眾寶樹·演發無量微妙法音·流布萬種溫雅德香。其有聞者·塵勞垢習·自然不起。風觸其身·皆得快樂·譬如比丘得滅盡三昧。又風吹散華·徧滿佛土。隨色次第·而不雜亂。柔軟光澤·馨香芬烈。足履其上·蹈下四寸。隨舉足已·還復如故。華用已訖·地輒開裂。以次化沒·清淨無遺。隨其時節·風吹散華·如是六反。又眾寶蓮華·周滿世界。一一寶華·百千億葉。其華光明·無量種色。青色青光。白色白光。玄黃朱紫·光色赫然。煒燁煥爛·明曜日月。一一華中·出三十六百千億光。一一光中·出三十六百千億佛。身色紫金·相好殊特。一一諸佛·又放百千光明·普為十方說微妙法。如是諸佛·各各安立無量眾生於佛正道。

佛說無量壽經卷上

佛說無量壽經卷下

曹魏康僧鎧譯

佛告阿難。其有眾生生彼國者皆悉住於正定之聚。所以者何。彼佛國中·無諸邪聚·及不定聚。十方恆沙諸佛如來·皆共讚歎無量壽佛威神功德不可思議。諸有眾生聞其名號·信心歡喜·乃至一念至心迴向·願生彼國·即得往生·住不退轉。唯除五逆誹謗正法。佛告阿難。十方世界諸天人人民·其有至心願生彼國·凡有三輩。其上輩者·捨家棄欲而作沙門·發菩提心·一向專念·無量壽佛·修諸功德·願生彼國。此等眾生臨壽終時·無量壽佛與諸大眾現其人前。即隨彼佛往生其國·便於七寶華中自然化生·住不退轉。智慧

勇猛·神通自在。是故阿難。其有眾生欲於今世見無量壽佛·應發無上菩提之心·修行功德·願生彼國。佛告阿難。其中輩者·十方世界諸天

人民·其有至心願生彼國·雖不能行作沙門·大修功德·當發無上菩提之心·一向專念無量壽佛·多少修善·奉持齋戒·起立塔像·飯食沙門·懸繒然燈·散華燒香·以此迴向願生彼國。其人臨終·無量壽佛化現其身·光明相好具如真佛·與諸大眾現其人前。即隨化佛往生其國·住不退轉。功德智慧·次如上輩者也。佛告阿難。其下輩者·十方世界諸天人民·其有至心欲生彼國·假使不能作諸功德·當發無上菩提之心·一向專意·乃至十念·念無量壽佛·願生其國。若聞深法·歡喜信樂·不生疑惑。乃至一念念於彼佛·以至誠心願生其國。此人臨終·夢見彼佛·亦得往生。功德智慧·次如中輩者也。

佛告阿難。無量壽佛威神無極。十方世界無量無邊不可思議諸佛如來·莫不稱歎。於彼東方恆河沙佛國·無量無數諸菩薩眾·皆悉往詣無量壽佛所·恭敬供養·及諸菩薩聲聞之眾·聽受經法·宣布道化。南西北方四維上下·亦復如是。爾時世尊而說頌曰。

東方諸佛國。其數如恆沙。彼土菩薩眾。往覲無量覺
南西北四維。上下亦復然。彼土菩薩眾。往覲無量覺
一切諸菩薩。各賣天妙華。寶香無價衣。供養無量覺
咸然奏天樂。暢發和雅音。歌歎最勝尊。供養無量覺
究達神通慧。遊入深法門。具足功德藏。妙智無等倫

慧日朗世間。消除生死雲。恭敬繞三帀。稽首無上尊
見彼嚴淨土。微妙難思議。因發無量心。願我國亦然
應時無量尊。動容發欣笑。口出無數光。徧照十方國
迴光圍繞身。三帀從頂入。一切天人眾。踊躍皆歡喜
大士觀世音。整服稽首問。白佛何緣笑。唯然願說意
梵聲猶雷震。八音暢妙響。當授菩薩記。今說仁諦聽
十方來正士。吾悉知彼願。志求嚴淨土。受決當作佛
覺了一切法。猶如夢幻響。滿足諸妙願。必成如是剎
知法如電影。究竟菩薩道。具諸功德本。受決當作佛
通達諸法性。一切空無我。專心淨佛土。必成如是剎
諸佛告菩薩。令覲安養佛。聞法樂受行。疾得清淨處
至彼嚴淨國。便速得神通。必於無量尊。受記成等覺
其佛本願力。聞名欲往生。皆悉到彼國。自致不退轉
菩薩興至願。願己國無異。普念度一切。名顯滿十方
奉事億如來。飛化徧諸剎。恭敬歡喜去。還到安養國
若人無善心。不得聞此經。清淨有戒者。乃獲聞正法
曾更見世尊。則能信此事。謙敬聞奉行。踊躍大歡喜
憍慢弊懈怠。難以信此法。宿世見諸佛。樂聽如是教
聲聞或菩薩。莫能究聖心。譬如從生盲。欲行開導人

如來智慧海。深廣無涯底。二乘非所測。唯佛獨明了。
假使一切人。具足皆得道。淨慧知本空。億劫思佛智。
窮力極講說。盡壽猶不知。佛慧無邊際。如是致清淨。
壽命甚難得。佛世亦難值。人有信慧難。若聞精進求。
聞法能不忘。見敬得大慶。則我善親友。是故當發意。
設滿世界火。必過要聞法。會當成佛道。廣度生死流。

佛告阿難。彼國菩薩。皆當究竟一生補處。除其本願為
眾生故。以弘誓功德而自莊嚴。普欲度脫一切眾生。阿難。
彼佛國中諸聲聞眾身光一尋。菩薩光明照百由旬。有二菩薩
最尊第一。威神光明普照三千大千世界。阿難白佛。彼二菩
薩。其號云何。佛言。一名觀世音。二名大勢至。此二菩
薩。於是國土修菩薩行。命終轉化。生彼佛國。阿難。其有
眾生生彼國者。皆悉具足三十二相。智慧成滿。深入諸法。
究暢要妙。神通無礙。諸根明利。其鈍根者。成就二忍。其
利根者。得不可計無生法忍。又彼菩薩。乃至成佛。不受惡
趣。神通自在。常識宿命。除生他方五濁惡世。示現同彼。
如我國也。佛語阿難。彼國菩薩承佛威神。一食之頃。往詣
十方無量世界。恭敬供養諸佛世尊。隨心所念。華香伎樂。
衣蓋幢幡。無數無量供養之具。自然化生。應念即至。珍妙
殊特。非世所有。輒以奉散諸佛。及諸菩薩聲聞之眾。在虛
空中化成華蓋。光色昱爍。香氣普熏。其華周圓四百里者。
如是轉倍。乃覆三千大千世界。隨其前後。以次化沒。其諸
菩薩僉然欣悅。於虛空中共奏天樂。以微妙音歌歎佛德。聽
受經法。歡喜無量。供養佛已。未食之前。忽然輕舉。還其
本國。佛語阿難。無量壽佛。為諸聲聞菩薩天人頒宣法時。

都悉集會七寶講堂。廣宣道教。演暢妙法。莫不歡喜。心解得道。即時四方自然風起。吹七寶樹。出五音聲。無量妙華。隨風四散。自然供養。如是不絕。一切諸天。皆賚天上百千華香。萬種伎樂。供養其佛及諸菩薩聲聞之眾。普散華香。奏諸音樂。前後來往。更相開避。當斯之時。熙怡快樂。不可勝言。佛語阿難。生彼佛國諸菩薩等。所可講說。常宣正法。隨順智慧。無違無失。於其國土所有萬物。無我所心。無染著心。去來進止。情無所係。隨意自在。無所適莫。無彼無我。無競無訟。於諸眾生。得大慈悲饒益之心。柔潤調伏。無忿恨心。離蓋清淨。無厭怠心。等心。勝心。深心。定心。愛法樂法喜法之心。滅諸煩惱。離惡趣心。究竟一切菩薩所行。具足成就無量功德。得深禪定。諸通明慧。遊志七覺。修心佛法。肉眼清徹。靡不分了。天眼通達。無量無限。法眼觀察。究竟諸道。慧眼見真。能度彼岸。佛眼具足。覺了法性。以無礙智。為人演說。等觀三界空無所有。志求佛法。具諸辯才。除滅眾生煩惱之患。從如來生。解法如如。善知集滅音聲方便。不欣世語。樂在正論。修諸善本。志崇佛道。知一切法皆悉寂滅。生身煩惱。二餘俱盡。聞甚深法。心不疑懼。常能修行其大悲者。深遠微妙。靡不覆載。究竟一乘。至於彼岸。決斷疑網。慧由心出。於佛教法。該羅無外。智慧如大海。三昧如山王。慧光明淨。超踰日月。清白之法。具足圓滿。猶如雪山。照諸功德等一淨故。猶如大地。淨穢好惡無異心故。猶如淨水。洗除塵勞諸垢染故。猶如火王。燒滅一切煩惱薪故。猶如大風。行諸世界無障礙故。猶如虛空。於一切有無所著故。猶如蓮華。於諸世間無染汙故。猶如大乘。運載羣萌出生死故。猶如重雲。震大法雷覺未覺故。猶如大雨。雨甘露法潤眾生故。如金剛山。眾魔外道不能動故。如梵天王。於諸善

法最上首故。如尼拘類樹。普覆一切故。如優曇鉢華。希有難遇故。如金翅鳥。威伏外道故。如眾遊禽。無所藏積故。猶如牛王。無能勝故。猶如象王。善調伏故。如師子王。無所畏故。曠若虛空。大慈等故。摧滅嫉心。不忌勝故。專樂求法。心無厭足。常欲廣說。志無疲倦。擊法鼓。建法幢。曜慧日。除癡闇。修六和敬。常行法施。志勇精進。心不退弱。為世燈明。最勝福田。常為師導。等無憎愛。唯樂正道。無餘欣戚。拔諸欲刺。以安羣生。功慧殊勝。莫不尊敬。滅三垢障。遊諸神通。因力。緣力。意力。願力。方便之力。常力。善力。定力。慧力。多聞之力。施戒忍辱精進禪定智慧之力。正念止觀諸通明力。如法調伏諸眾生力。如是等力。一切具足。身色相好。功德辯才。具足莊嚴。無與等者。恭敬供養無量諸佛。常為諸佛所共稱歎。究竟菩薩諸波羅蜜。修空無相無願三昧。不生不滅諸三昧門。遠離聲聞緣覺之地。阿難。彼諸菩薩成就如是無量功德。我但為汝略言之耳。若廣說者。百千萬劫不能窮盡。

佛告彌勒菩薩諸天人等。無量壽國聲聞菩薩功德智慧。不可稱說。又其國土微妙安樂清淨若此。何不力為善。念道之自然。著於無上下。洞達無邊際。宜各勤精進。努力自求之。必得超絕去。往生安樂國。橫截五惡道。惡道自然閉。昇道無窮極。易往而無人。其國不逆違。自然之所牽。何不棄世事。勤行求道德。可得極長生。壽樂無有極。然世人薄俗。共諍不急之事。於此劇惡極苦之中。勤身營務。以自給濟。無尊無卑。無貧無富。少長男女。共憂錢財。有無同然。憂思適等。屏營愁苦。累念積慮。為心走使。無有安時。有田憂田。有宅憂宅。牛馬六畜。奴婢錢財。衣食什物。復共憂之。重思累息。憂念愁怖。橫為非常水火盜賊。怨家債主。焚漂劫奪。消散磨滅。憂毒忪忪。無有解時。結

憤心中·不離憂惱。心堅意固·適無縱捨。或坐摧碎·身亡命終·棄捐之去·莫誰隨者。尊貴豪富·亦有斯患。憂懼萬端·勤苦若此。結眾寒熱·與痛共居。貧窮下劣·困乏常無。無田亦憂欲有田。無宅亦憂欲有宅。無牛馬六畜奴婢錢財衣食什物·亦憂欲有之。適有一·復少一。有是少是。思有齊等。適欲具有·便復糜散。如是憂苦·當復求索。不能時得·思想無益。身心俱勞·坐起不安。憂念相隨·勤苦若此。亦結眾寒熱·與痛共居。或時坐之終身天命。不肯為善行道進德。壽終身死·當獨遠去。有所趣向善惡之道·莫能知者。世間人民·父子兄弟·夫婦家室·中外親屬·當相敬愛·無相憎嫉。有無相通·無得貪惜。言色常和·莫相違戾。或時心諍·有所恚怒。今世恨意·微相憎嫉。後世轉劇·至成大怨。所以者何。世間之事·更相患害。雖不即時·應急想破。然含毒畜怒·結憤精神·自然剋識·不得相離。皆當對生·更相報復。人在世間愛欲之中·獨生獨死·獨去獨來。當行至趣·苦樂之地·身自當之·無有代者。善惡變化·殃福異處。宿豫嚴待·當獨趣入。遠到他所·莫能見者。善惡自然追行所生。窈窈冥冥·別離久長。道路不同·會見無期。甚難甚難·今得相值。何不棄眾事·各遇強健時·努力勤修善·精進願度世。可得極長生·如何不求道。安所須待·欲何樂乎。如是世人·不信作善得善·為道得道。不信人死更生·惠施得福。善惡之事·都不信之。謂之不然·終無有是。但坐此故·且自見之。更相瞻視·先後同然。轉相承受父餘教令。先人祖父·素不為善·不識道德。身愚神闇·心塞意閉。死生之趣·善惡之道·自不能見·無有語者。吉凶禍福·競各作之·無一怪也。生死常道·轉相嗣立。或父哭子·或子哭父。兄弟夫婦·更相哭泣。顛倒上下·無常根本。皆當過去·不可常保。教語開

導·信之者少。是以生死流轉·無有休止。如此之人·蒙冥抵突·不信經法。心無遠慮·各欲快意。癡惑愛欲·不達於道德。迷沒於瞋怒。貪狼於財色。坐之不得道。當更惡趣苦。生死無窮已。哀哉甚可傷。或時室家父子兄弟夫婦·一死一生·更相哀愍。恩愛思慕·憂念結縛。心意痛著·迭相顧戀。窮日卒歲·無有解已。教語道德·心不開明。思想思好·不離情欲。昏蒙闇塞·愚惑所覆。不能深思熟計·心自端正·專精行道·決斷世事。便旋至竟·年壽終盡。不能得道·無可奈何。總猥憤擾·皆貪愛欲。惑道者眾·悟之者少。世間忽忽·無可聊賴。尊卑上下·貧富貴賤·勤苦忽務·各懷殺毒。惡氣窈冥·為妄興事。違逆天地·不從人心。自然非惡·先隨與之。恣聽所為·待其罪極。其壽未終盡·便頓奪之。下入惡道·累世勤苦。展轉其中·數千億劫·無有出期。痛不可言·甚可哀愍。佛告彌勒菩薩諸天人等。我今語汝世間之事。人用是故·坐不得道。當熟思計·遠離眾惡。擇其善者·勤而行之。愛欲榮華·不可常保。皆當別離·無可樂者。遇佛在世·當勤精進。其有至願生安樂國者·可得智慧明達·功德殊勝。勿得隨心所欲·虧負經戒·在人後也。儻有疑意不解經者·可具問佛·當為說之。彌勒菩薩長跪白言。佛威神尊重·所說快善。聽佛經語·貫心思之。世人實爾·如佛所言。今佛慈愍·顯示大道。耳目開明·長得度脫。聞佛所說·莫不歡喜。諸天人民蠕動之類·皆蒙慈恩·解脫憂苦。佛語教戒·甚深甚善。智慧明見八方上下去來今事·莫不究暢。今我眾等·所以蒙得度脫·皆佛前世求道之時·謙苦所致。恩德普覆·福祿巍巍。光明徹照·達空無極。開入泥洹·教授典攬。威制消化·感動十方·無窮無極。佛為法王·尊超眾聖·普為一切天人之師。隨心所願·皆令得道。今得值佛·復聞無量壽聲·靡不歡

喜·心得開明。

佛告彌勒。汝言是也。若有慈敬於佛者·實為大善。天下久久·乃復有佛。今我於此世作佛。演說經法·宣布道教·斷諸疑網。拔愛欲之本·杜眾惡之源。遊步三界·無所罣礙。典攬智慧·眾道之要。執持綱維·昭然分明。開示五趣·度未度者·決正生死泥洹之道。彌勒當知。汝從無數劫來·修菩薩行·欲度眾生·其已久遠。從汝得道至於泥洹·不可稱數。汝及十方諸天人民一切四眾·永劫已來·展轉五道。憂畏勤苦·不可具言。乃至今世·生死不絕。與佛相值·聽受經法。又復得聞無量壽佛。快哉甚善。吾助爾喜。汝今亦可自厭生死老病痛苦·惡露不淨·無可樂者。宜自決斷·端身正行·益作諸善。修己潔淨·洗除心垢。言行忠信·表裏相應。人能自度·轉相拯濟。精明求願·積累善本。雖一世勤苦·須臾之間。後生無量壽國·快樂無極。長與道德合明。永拔生死根本。無復貪恚愚癡苦惱之患。欲壽一劫百劫千億萬劫·自在隨意皆可得之。無為自然·次於泥洹之道。汝等宜各精進·求心所願。無得疑惑中悔·自為過咎。生彼邊地七寶宮殿。五百歲中受諸厄也。彌勒白言。受佛重誨·專精修學·如教奉行·不敢有疑。

佛告彌勒。汝等能於此世·端心正意·不作眾惡·甚為至德。十方世界·最無倫匹。所以者何。諸佛國土天人之類·自然作善·不大為惡·易可開化。今我於此世間作佛。處於五惡五痛五燒之中·為最劇苦。教化羣生·令捨五惡·令去五痛·令離五燒。降化其意·令持五善·獲其福德度世長壽泥洹之道。佛言。何等五惡。何等五痛。何等五燒。何等消化五惡·令持五善·獲其福德度世長壽泥洹之道。其一惡者。諸天人民蠕動之類·欲為眾惡·莫不皆然。強者伏

弱。轉相剋賊。殘害殺戮。迭相吞噬。不知修善。惡逆無道。後受殃罰。自然趣向。神明記識。犯者不赦。故有貧窮下賤。乞丐孤獨。聾盲瘖瘂。愚癡弊惡。至有尫狂不逮之屬。又有尊貴豪富。高才明達。皆由宿世慈孝。修善積德所致。世有常道。王法牢獄。不肯畏慎。為惡入罪。受其殃罰。求望解脫。難得勉出。世間有此目前現事。壽終後世。尤深尤劇。入其幽冥。轉生受身。譬如王法。痛苦極刑。故有自然三塗。無量苦惱。轉貿其身。改形易道。所受壽命。或長或短。魂神精識。自然趣之。當獨值向。相從共生。更相報復。無有止已。殃惡未盡。不得相離。展轉其中。無有出期。難得解脫。痛不可言。天地之間。自然有是。雖不卽時卒暴應至。善惡之道。會當歸之。是為一大惡一痛一燒。勤苦如是。譬如大火焚燒人身。人能於中一心制意。端身正行。獨作諸善。不為眾惡者。身獨度脫。獲其福德。度世上天泥洹之道。是為一大善也。佛言。其二惡者。世間人民。父子兄弟。室家夫婦。都無義理。不順法度。奢淫僥縱。各欲快意。任心自恣。更相欺惑。心口各異。言念無實。佞諂不忠。巧言諛媚。嫉賢謗善。陷入冤枉。主上不明。任用臣下。臣下自在。機偽多端。踐度能行。知其形勢。在位不正。為其所欺。妄損忠良。不當天心。臣欺其君。子欺其父。兄弟夫婦。中外知識。更相欺誑。各懷貪欲。瞋恚愚癡。欲自厚己。欲貪多有。尊卑上下。心俱同然。破家亡身。不顧前後。親屬內外。坐之滅族。或時室家知識。鄉黨市里。愚民野人。轉共從事。更相利害。忿成怨結。富有慳惜。不肯施與。愛保貪重。心勞身苦。如是至竟。無所恃怙。獨來獨去。無一隨者。善惡禍福。追命所生。或在樂處。或入苦毒。然後乃悔。當復何及。世間人民。心愚少智。見善憎謗。不思慕及。但欲為惡。妄作非法。常懷盜心。悵望他

利。消散磨盡。而復求索。邪心不正。懼人有色。不豫思計。事至乃悔。今世現有王法牢獄。隨罪趣向。受其殃罰。因其前世不信道德。不修善本。今復為惡。天神剋識。別其名籍。壽終神逝。下入惡道。故有自然三塗。無量苦惱。展轉其中。世世累劫。無有出期。難得解脫。痛不可言。是為二大惡二痛二燒。勤苦如是。譬如大火焚燒人身。人能於中一心制意。端身正行。獨作諸善。不為眾惡者。身獨度脫。獲其福德度世上天泥洹之道。是為二大善也。佛言。其三惡者。世間人民。相因寄生。共居天地之間。處年壽命。無能幾何。上有賢明長者尊貴豪富。下有貧窮斯賤尪劣愚夫。中有不善之人。常懷邪惡。但念姪佚。煩滿胸中。愛欲交亂。坐起不安。貪意守惜。但欲唐得。眇眇細色。邪態外逸。自妻厭憎。私妄出入。費損家財事為非法。交結聚會。興師相伐。攻劫殺戮。強奪無道。惡心在外。不自修業。盜竊趣得。欲擊成事。恐勢迫脅。歸給妻子。恣心快意。極身作樂。或於親屬。不避尊卑。家室中外。患而苦之。亦復不畏王法禁令。如是之惡。著於人鬼。日月照見。神明記識。故有自然三塗。無量苦惱。展轉其中。世世累劫。無有出期。難得解脫。痛不可言。是為三大惡三痛三燒。勤苦如是。譬如大火焚燒人身。人能於中一心制意。端身正行。獨作諸善。不為眾惡者。身獨度脫。獲其福德度世上天泥洹之道。是為三大善也。

佛言。其四惡者。世間人民。不念修善。轉相教令。共為眾惡。兩舌惡口。妄言綺語。讒賊鬪亂。憎嫉善人。敗壞賢明。於傍快喜。不孝二親。輕慢師長。朋友無信。難得誠實。尊貴自大。謂己有道。橫行威勢。侵易於人。不能自知。為惡無恥。自以強健。欲人敬難。不畏天地神明日月。不肯作善。難可降化。自用偃蹇。謂可常爾。無所憂懼。常

懷憍慢。如是眾惡。天神記識。賴其前世頗作福德。小善扶接。營護助之。今世為惡。福德盡滅。諸善鬼神。各去離之。身獨空立。無所復依。壽命終盡。諸惡所歸。自然迫促。共趣奪之。又其名籍。記在神明。殃咎牽引。當往趣向。罪報自然。無從捨離。但得前行。入於火鑊。身心摧碎。精神痛苦。當斯之時。悔復何及。天道罔然。不得蹉跌。故有自然三塗。無量苦惱。展轉其中。世世累劫。無有出期。難得解脫。痛不可言。是為四大惡四痛四燒。勤苦如是。譬如大火焚燒人身。人能於中一心制意。端身正行。獨作諸善。不為眾惡。身獨度脫。獲其福德度世上天泥洹之道。是為四大善也。佛言。其五惡者。世間人民。徙倚懈惰。不肯作善治身修業。家室眷屬。飢寒困苦。父母教誨。瞋目怒應。言令不和。違戾反逆。譬如怨家。不如無子。取與無節。眾共患厭。負恩違義。無有報償之心。貧窮困乏。不能復得。辜較縱奪。放恣遊散。串數唐得。用自賑給。耽酒嗜美。飲食無度。肆心蕩逸。魯扈抵突。不識人情。強欲抑制。見人有善。妬嫉惡之。無義無禮。無所顧難。自用識當。不可諫曉。六親眷屬。所資有無。不能憂念。不惟父母之恩。不存師友之義。心常念惡。口常言惡。身常行惡。曾無一善。不信先聖諸佛經法。不信行道可得度世。不信死後神明更生。不信作善得善。為惡得惡。欲殺真人。鬪亂眾僧。欲害父母兄弟眷屬。六親憎惡。願令其死。如是世人。心意俱然。愚癡蒙昧。而自以智慧。不知生所從來。死所趣向。不仁不順。惡逆天地。而於其中。悵望僥倖。欲求長生。會當歸死。慈心教誨。令其念善。開示生死善惡之趣。自然有是。而不肯信之。苦心與語。無益其人。心中閉塞。意不開解。大命將終。悔懼交至。不豫修善。臨窮方悔。悔之於後。將何及乎。天地之間。五道分明。恢廓窈冥。浩浩

茫茫。善惡報應。禍福相承。身自當之。無誰代者。數之自然。應期所行。殃咎追命。無得縱捨。善人行善。從樂入樂。從明入明。惡人行惡。從苦入苦。從冥入冥。誰能知者。獨佛知耳。教語開示。信用者少。生死不休。惡道不絕。如是世人。難可具盡。故有自然三塗。無量苦惱。展轉其中。世世累劫。無有出期。難得解脫。痛不可言。是為五大惡五痛五燒。勤苦如是。譬如大火焚燒人身。人能於中一心制意。端身正念。言行相副。所作至誠。所語如語。心口不轉。獨作諸善。不為眾惡。身獨度脫。獲其福德。度世上天泥洹之道。是為五大善也。佛告彌勒。吾語汝等。是世五惡勤苦若此。五痛五燒。展轉相生。但作眾惡。不修善本。皆悉自然入諸惡趣。或其今世先被殃病。求死不得。求生不得。罪惡所招。示眾見之。身死隨行。入三惡道。苦毒無量。自相焦然。至其久後。共作怨結。從小微起。遂成大惡。皆由貪著財色。不能施惠。癡欲所迫。隨心思想。煩惱結縛。無有解已。厚己諍利。無所省錄。富貴榮華。當時快意。不能忍辱。不務修善。威勢無幾。隨以磨滅。身坐勞苦。久後大劇。天道施張。自然糾舉。網維羅網。上下相應。兢兢忪忪。當入其中。古今有是。痛哉可傷。

佛語彌勒。世間如是。佛皆哀之。以威神力。摧滅眾惡。悉令就善。棄捐所思。奉持經戒。受行道法。無所違失。終得度世泥洹之道。佛言。汝今諸天人民。及後世人。得佛經語。當熟思之。能於其中端心正行。主上為善。率化其下。轉相勅令。各自端守。尊聖敬善。仁慈博愛。佛語教誨。無敢虧負。當求度世。拔斷生死眾惡之本。當離三塗無量憂怖苦痛之道。汝等於是廣植德本。布恩施惠。勿犯道禁。忍辱精進。一心智慧。轉相教化。為德立善。正心正意。齋戒清淨。一日一夜。勝在無量壽國為善百歲。所以者

何。彼佛國土。無為自然。皆積眾善。無毛髮之惡。於此修善十日十夜。勝於他方諸佛國中為善千歲。所以者何。他方佛國。為善者多。為惡者少。福德自然。無造惡之地。唯此間多惡。無有自然。勤苦求欲。轉相欺殆。心勞形困。飲苦食毒。如是惡務。未嘗寧息。吾哀汝等天人之類。苦心誨喻。教令修善。隨宜開導。授與經法。莫不承用。在意所願。皆令得道。佛所遊履國邑丘聚。靡不蒙化。天下和順。日月清明。風雨以時。災厲不起。國豐民安。兵戈無用。崇德興仁。務修禮讓。佛言。我哀愍汝等諸天人民。甚於父母念子。今我於此世作佛。降化五惡。消除五痛。絕滅五燒。以善攻惡。拔生死之苦。令獲五德。生無為之安。吾去世後。經道漸滅。人民諂偽。復為眾惡。五燒五痛。還如前法。久後轉劇。不可悉說。我但為汝略言之耳。佛語彌勒。汝等各善思之。轉相教誡。如佛經法。無得犯也。於是彌勒菩薩合掌白言。佛所說甚善。世人實爾。如來普慈哀愍。悉令度脫。受佛重誨。不敢違失。

佛告阿難。汝起更整衣服。合掌恭敬。禮無量壽佛。十方國土諸佛如來。常共稱揚讚歎彼佛無著無礙。於是阿難起整衣服。正身西面。恭敬合掌。五體投地。禮無量壽佛。白言。世尊。願見彼佛安樂國土。及諸菩薩聲聞大眾。說是語已。即時無量壽佛放大光明。普照一切諸佛世界。金剛圍山。須彌山王。大小諸山。一切所有。皆同一色。譬如劫水彌滿世界。其中萬物。沉沒不現。澆濇浩汗。唯見大水。彼佛光明。亦復如是。聲聞菩薩一切光明。皆悉隱蔽。唯見佛光。明耀顯赫。爾時阿難。即見無量壽佛威德巍巍。如須彌山王。高出一切諸世界上。相好光明。靡不照耀。此會四眾。一時悉見。彼見此土。亦復如是。爾時佛告阿難及慈氏菩薩。汝見彼國從地已上至淨居天。其中所有微妙嚴淨自然

之物。為悉見不。阿難對曰。唯然。已見。汝寧復聞無量壽佛大音宣布一切世界化眾生不。阿難對曰。唯然。已聞。彼國人民乘百千由旬七寶宮殿。無所障礙。徧至十方供養諸佛。汝復見不。對曰。已見。彼國人民有胎生者。汝復見不。對曰。已見。其胎生者所處宮殿。或百由旬。或五百由旬。各於其中受諸快樂。如忉利天上亦皆自然。爾時慈氏菩薩白佛言。世尊。何因何緣。彼國人民。胎生化生。佛告慈氏。若有眾生。以疑惑心修諸功德。願生彼國。不了佛智。不思議智。不可稱智。大乘廣智。無等無倫最上勝智。於此諸智。疑惑不信。然猶信罪福。修習善本。願生其國。此諸眾生。生彼宮殿。壽五百歲。常不見佛。不聞經法。不見菩薩聲聞聖眾。是故於彼國土。謂之胎生。若有眾生。明信佛智。乃至勝智。作諸功德。信心迴向。此諸眾生。於七寶華中。自然化生。跏趺而坐。須臾之頃。身相光明。智慧功德。如諸菩薩具足成就。復次慈氏。他方諸大菩薩。發心欲見無量壽佛。恭敬供養。及諸菩薩聲聞聖眾。彼菩薩等。命終得生無量壽國。於七寶華中自然化生。彌勒當知。彼化生者。智慧勝故。其胎生皆無智慧。於五百歲中。常不見佛。不聞經法。不見菩薩諸聲聞眾。無由供養於佛。不知菩薩法式。不得修習功德。當知此人宿世之時。無有智慧。疑惑所致。佛告彌勒。譬如轉輪聖王。有七寶牢獄。種種莊嚴。張設牀帳。懸諸繒蓋。若有諸小王子。得罪於王。輒內彼獄中。繫以金鎖。供養飯食。衣服牀蓐。華香伎樂。如轉輪王無所乏少。於意云何。此諸王子寧樂彼處不。對曰。不也。但種種方便。求諸大力。欲自勉出。佛告彌勒。此諸眾生。亦復如是。以疑惑佛智故。生彼七寶宮殿。無有刑罰。乃至一念惡事。但於五百歲中不見三寶。不得供養修諸善本。以此為苦。雖有餘樂。猶不樂彼處。若此眾生識其本罪。深自

悔責。求離彼處。即得如意。往詣無量壽所。恭敬供養。亦得徧至無量無數諸餘佛所。修諸功德。彌勒當知。其有菩薩生疑惑者。為失大利。是故應當明信諸佛無上智慧。彌勒菩薩白佛言。世尊。於此世界。有幾所不退菩薩。生彼佛國。佛告彌勒。於此世界。六十七億不退菩薩。往生彼國。一一菩薩。已曾供養無數諸佛。次如彌勒者也。諸小行菩薩。及修習少功德者。不可稱計。皆當往生。佛告彌勒。不但我剎諸菩薩等往生彼國。他方佛土亦復如是。其第一佛名曰遠照。彼有百八十億菩薩。皆當往生。其第二佛名曰寶藏。彼有九十億菩薩。皆當往生。其第三佛名曰無量音。彼有二百二十億菩薩。皆當往生。其第四佛名曰甘露味。彼有二百五十億菩薩。皆當往生。其第五佛名曰龍勝。彼有十四億菩薩。皆當往生。其第六佛名曰勝力。彼有萬四千菩薩。皆當往生。其第七佛名曰師子。彼有五百菩薩。皆當往生。其第八佛名曰離垢光。彼有八十億菩薩。皆當往生。其第九佛名曰德首。彼有六十億菩薩。皆當往生。其第十佛名曰妙德山。彼有六十億菩薩。皆當往生。其第十一佛名曰人王。彼有十億菩薩。皆當往生。其第十二佛名曰無上華。彼有無數不可稱計諸菩薩眾。皆不退轉。智慧勇猛。已曾供養無量諸佛。於七日中即能攝取百千億劫大士所修堅固之法。斯等菩薩。皆當往生。其第十三佛名曰無畏。彼有七百九十億大菩薩眾。諸小菩薩及比丘等不可稱計。皆當往生。佛語彌勒。不但此十四佛國中諸菩薩等當往生也。十方世界無量佛國。其往生者。亦復如是甚多無數。我但說十方諸佛名號。及菩薩比丘生彼國者。晝夜一劫。尚未能盡。我今為汝略說之耳。

佛告彌勒。其有得聞彼佛名號。歡喜踊躍。乃至一念。當知此人為得大利。則是具足無上功德。是故彌勒。設有大

火充滿三千大千世界。要當過此聞是經法。歡喜信樂。受持讀誦。如說修行。所以者何。多有菩薩欲聞此經而不能得。若有眾生聞此經者。於無上道終不退轉。是故應當專心信受。持誦說行。吾今為諸眾生說此經法。令見無量壽佛及其國土一切所有。所當為者。皆可求之。無得以我滅度之後。復生疑惑。當來之世。經道滅盡。我以慈悲哀愍。特留此經。止住百歲。其有眾生值斯經者。隨意所願。皆可得度。

佛語彌勒。如來興世。難值難見。諸佛經道。難得難聞。菩薩勝法。諸波羅蜜。得聞亦難。遇善知識。聞法能行。此亦為難。若聞斯經信樂受持。難中之難。無過此難。是故我法。如是作。如是說。如是教。應當信順。如法修行。爾時世尊說此經法。無量眾生。皆發無上正覺之心。萬二千那由他人。得清淨法眼。二十二億諸天人民。得阿那含果。八十萬比丘。漏盡意解。四十億菩薩。得不退轉。以弘誓功德而自莊嚴。於將來世當成正覺。爾時三千大千世界六種震動。大光普照十方國土。百千音樂自然而作。無量妙華芬芬而降。佛說經已。彌勒菩薩。及十方來諸菩薩眾。長老阿難。諸大聲聞。一切大眾。靡不歡喜。

佛說無量壽經卷下

大寶積經無量壽如來會

大寶積經無量壽如來會卷上

大寶積經卷第十七 原本為(甯)金陵刻經處本。 甲。直接校本四。 一。(磧)宋磧砂藏影本。 二。(清)清龍藏本。 三。(大)日本大正藏本。 四。(卍)日本卍字藏本。

乙·間接校本四。 一·(麗)高麗藏本。 二·(宋)宋思溪藏本。 三·(元)元普寧藏本。 四·(明)明嘉興藏本。 此四本均據大正·麗本則兼據卍字。 大卍所刊此經·均以麗為原本。 故校勘記中·二本文字同處作麗·異處作大與卍。 文旁數字·標校勘記號數。 校勘記見經文後。

唐三藏法師菩提流志奉詔譯

法會聖眾第一 (楊文會分章)

如是我聞。一時·佛住王舍城耆闍崛山中。與大比丘眾萬二千人俱。皆是諸大聲聞·眾所知識。其名曰·尊者阿若憍陳如·馬勝·大名·有賢·無垢·須跋陀羅·善稱圓滿·憍梵鉢提·優樓頻伽葉·那提迦葉·伽耶迦葉·摩訶迦葉·舍利弗·大目犍連·摩訶迦旃延·摩訶劫賓那·摩訶注那·滿慈子·阿尼樓駄·離波多·上首王·住彼岸·摩俱羅·難陀·有光善來·羅睺羅·阿難陀等·而為上首。復有菩薩摩訶薩眾。所謂普賢菩薩·文殊師利菩薩·彌勒菩薩·及賢劫中諸菩薩摩訶薩眾·前後圍遶。又與賢護等十六丈夫眾俱。所謂善思惟義菩薩·慧辯才菩薩·觀無住菩薩·善華神通菩薩·光幢菩薩·智上菩薩寂根菩薩·慧願菩薩·香象菩薩·寶幢菩薩等·而為上首。咸共遵修普賢之道。滿足菩薩一切行願。安住一切功德法中。到諸佛法究竟彼岸。願於一切世界之中·成等正覺。又願生彼兜率陀天。於彼壽終·降生右脅。見行七步·放大光明。普佛世界·六種震動。而自唱言。我於一切世間·最為尊貴。釋梵諸天·咸來親奉。又現習學書計·曆數·聲明·技巧·醫方·養生·符印·及餘博戲·擅美過人。身處王宮·厭諸欲境。見老病死·悟世非常。捐捨國位·踰城學道。解諸瓔珞·及迦尸迦。被服袈裟·六年苦行。能於五濁剎中·作斯示現。順世間故·浴尼

連河。行趣道場。龍王迎讚。諸菩薩眾。右遶稱揚。菩薩爾時。受草自敷菩提樹下。結跏趺坐。又見魔眾合圍。將加危害。菩薩以定慧力降伏魔怨。成無上覺。梵王勸請。轉於法輪。勇猛無畏。佛音震吼。擊法鼓。吹法螺。建大法幢。然正法炬。攝受正法。及諸禪定。雨大法雨。澤潤含生。震大法雷。開悟一切。諸佛刹土。普照大光。世界之中。地皆震動。魔宮摧毀。驚怖波旬。破煩惱城。墮諸見網。遠離黑法。生諸白法。於信施食。能受能消。為調眾生。宣揚妙理。或現微笑。放百千光。昇灌頂階。受菩提記。或成佛道。現入涅槃。使無量有情皆得漏盡。成熟菩薩無邊善根。如是諸佛刹中。皆能示見。譬如幻師。善知幻術。而能示現男女等相。於彼相中實無可得。如是如是諸菩薩等。善學無邊幻術功德。故能示現變化相應。能善了知變化之道。故示諸佛土。現大慈悲。一切羣生。普皆饒益。菩薩願行。成就無疆。無量義門。通達平等。一切善法。具足修成。諸佛刹中。平等趣入。常為諸佛。勸進加威。一切如來。識知印可。為教菩薩。作阿闍梨。常習相應無邊諸行。通達一切法界所行。能善了知有情及土。亦常發趣供諸如來。見種種身。猶如影像。善學因陀羅網。能破魔網。壞諸見網。入有情網。能超煩惱眷屬。及魔侶魔人。遠出聲聞辟支佛地。入空無相無願法門。而能安住方便善巧。初不樂入二乘涅槃。得無生無滅諸三摩地。及得一切陀羅尼門。廣大諸根。辯才決定。於菩薩藏法。善能了知。佛華三昧。隨時悟入。具一切種甚深禪定。一切諸佛。皆悉見前。於一念中。徧遊佛土。周旋往返。不異其時。於難非難邊。能了諸邊。敷演實際。差別善知。得佛辯才。住普賢行。善能分別眾生語言。超過世間一切之法。善知一切出世間法。得資具自在波羅蜜多。荷擔有情。為不請友。能持一切如來法藏。安住不斷一

切佛種。哀愍有情。能開法眼。閉諸惡趣。開善趣門。普觀有情。能作父母兄弟之想。又觀眾生。如己身想。證得一切讚歎功德波羅蜜多。能善了知讚歎如來一切功德。及餘稱讚諸功德法。如是菩薩摩訶薩眾。無量無邊。皆來集會。

阿難啓請第二

爾時尊者阿難。從坐而起。整理衣服。偏袒右肩。右膝著地。合掌向佛。白言。大德世尊。身色諸根。悉皆清淨。威光赫奕。如融金聚。又如明鏡。凝照光暉。從昔已來。初未曾見。喜得瞻仰。生希有心。世尊今者。入大寂定。行如來行。皆悉圓滿。善能建立大丈夫行。思惟去來現在諸佛。世尊何故住斯念耶。爾時佛告阿難。汝今云何能知此義。為有諸天來告汝耶。為以見我及自知耶。阿難白佛言。世尊。我見如來光瑞希有。故發斯念。非因天等。

佛許宣說第三

佛告阿難。善哉善哉。汝今快問。善能觀察微妙辯才。能問如來如是之義。汝為一切如來應正等覺。及安住大悲利益羣生。如優曇華希有大士出現世間。故問斯義。又為哀愍利樂諸眾生故。能問如來如是之義。阿難。如來應正等覺。善能開示無量知見。何以故。如來知見。無有障礙。阿難。如來應正等覺欲樂住世。能於念頃。住無量無數百千億那由他劫。若復增過如上數量。而如來身及以諸根。無有增減。何以故。如來得三昧自在。到於彼岸。於一切法。最勝自在。是故阿難諦聽。善思念之。吾當為汝分別解說。阿難白佛言。唯然世尊。願樂欲聞。

古佛出興第四

爾時佛告阿難。往昔過阿僧祇無數大劫。有佛出現。號曰然燈。於彼佛前。極過數量。有苦行佛出興於世。苦行佛前。復有如來。號為月面。月面佛前。過於數量。有旃檀香佛。於彼佛前。有蘇迷盧積佛。盧積佛前。復有妙高劫佛。如是展轉。有離垢面佛。不染汙佛。龍天佛。山聲王佛。蘇迷盧積佛。金藏佛。照曜光佛。光帝佛。大地種性佛。光明熾盛琉璃金光佛。月像佛。開敷華莊嚴光佛。妙海勝覺遊戲神通佛。金剛光佛。大阿伽陀香光佛。捨離煩惱心佛。寶增長佛。勇猛積佛。勝積佛。持大功德法施神通佛。映蔽日月光佛。照曜琉璃佛。心覺華佛。月光佛。日光佛。華纓珞色王開敷神通佛。水月光佛。破無明暗佛。真珠珊瑚蓋佛。底沙佛。勝華佛。法慧吼佛。有師子吼鵝鴈聲佛。梵音龍吼佛。如是等佛出現於世。相去劫數。皆過數量。彼龍吼佛未出世前無央數劫。有世主佛。世主佛前無邊劫數。有佛出世。號世間自在王如來。應正等覺。明行圓滿。善逝。世間解。無上丈夫。調御士。天人師。佛。世尊。

法處讚佛第五

阿難。彼佛法中。有一比丘。名曰法處。有殊勝行願。及念慧力。增上其心。堅固不動。福智殊勝。人相端嚴。阿難。彼法處比丘。往詣世間自在王如來所。偏袒右肩。頂禮佛足。向佛合掌。以偈讚曰。

如來無量無邊光。舉世無光可能喻。一切日月摩尼寶。
佛之光威皆映蔽

世尊能演一音聲。有情各各隨類解。又能現一妙色身。
普使眾生隨類見

戒定慧進及多聞。一切有情無與等。心流覺慧如大海。

善能了知甚深法

感盡過亡應受供。如是聖德唯世尊。佛有殊勝大威光。
普照十方無量刹

我今稱讚諸功德。冀希福慧等如來。能救一切諸世間。
生老病死眾苦惱

願當安住三摩地。演說施戒諸法門。忍辱精勤及定慧。
庶當成佛濟羣生

為求無上大菩提。供養十方諸妙覺。百千俱胝那由他。
極彼恒沙之數量

又願當獲大神光。倍照恒沙億佛刹。及以無邊勝進力。
感得殊勝廣淨居

如是無等佛刹中。安處羣生當利益。。十方最勝之大
士。彼皆當往生喜心

唯佛聖智能證知。我今希求堅固力。縱沈無間諸地獄。
如是願心終不退

一切世間無礙智。應當了知如是心

攝受淨刹第六

復次阿難。法處比丘讚佛德已。白言。世尊。我今發阿
耨多羅三藐三菩提心。惟願如來。為我演說如是等法。令於
世間得無等等成大菩提。具攝清淨莊嚴佛土。佛告比丘。汝
應自攝清淨佛國。法處白佛言。世尊。我無威力堪能攝受。
惟願如來。說餘佛土清淨莊嚴。我等聞已。誓當圓滿。爾時
世尊為其廣說二十一億清淨佛土具足莊嚴。說是法時。經于
億歲。阿難。法處比丘。於彼二十一億諸佛土中所有嚴淨之

事·悉皆攝受。既攝受已·滿足五劫·思惟修習。阿難白佛言。世尊。彼世間自在王如來壽量幾何。世尊告曰。彼佛壽量滿四十劫。阿難。彼二十一俱胝佛剎·法處比丘所攝佛國·超過於彼。既攝受已·往詣世間自在王如來所。頂禮雙足·右遶七匝·卻住一面。白言。世尊。我已攝受具足功德嚴淨佛土。佛言。今正是時·汝應具說·令眾歡喜·亦令大眾皆當攝受圓滿佛土。

發大誓願第七

法處白言。惟願世尊·大慈留聽。我今將說殊勝之願。

若我證得無上菩提·國中有地獄餓鬼畜生趣者·我終不取無上正覺。 一 國無惡趣。

若我成佛·國中眾生有墮三惡趣者·我終不取正覺。 二 不墮惡趣。

若我成佛·國中有情·若不皆同真金色者·不取正覺。 三 身同金色。

若我成佛·國中有情·形貌差別有好醜者·不取正覺。 四 形無好醜。

若我成佛·國中有情·不得宿命·乃至不知億那由他百千劫事者·不取正覺。 五 宿命智通。

若我成佛·國中有情·若無天眼·乃至不見億那由他百千佛國土者·不取正覺。 六 天眼普見。

若我成佛·國中有情·不獲天耳·乃至不聞億那由他百千踰繕那外佛說法者·不取正覺。 七 天耳普聞。

若我成佛·國中有情·無他心智·乃至不知億那由他百

千佛國土中有情心行者·不取正覺。 八 他心悉知。

若我成佛·國中有情·不獲神通自在波羅蜜多·於一念頃不能超過億那由他百千佛剎者·不取正覺。 九 神通自在。

若我成佛·國中有情·起於少分我我所想者·不取菩提。 十 不起我見。

若我成佛·國中有情·若不決定成等正覺·證大涅槃者·不取菩提。 十一 決定證果。

若我成佛·光明有限·下至不照億那由他百千及算數佛剎者·不取菩提。 十二 光明無限。

若我成佛·壽量有限·乃至俱胝那由他百千及算數劫者·不取菩提。 十三 壽量無限。

若我成佛·國中聲聞·無有知其數者。假使三千大千世界滿中有情及諸緣覺·於百千歲盡其智算·亦不能知。若有知者·不取正覺。 十四 聲聞無數。

若我成佛·國中有情·壽量有限齊者·不取菩提。唯除願力而受生者。 十五 人壽隨願。

若我成佛·國中眾生·若有不善名者·不取正覺。 十六 無有惡名。

若我成佛·彼無量剎中無數諸佛·不共咨嗟稱歎我國者·不取正覺。 十七 諸佛稱歎。

若我證得無上覺時·餘佛剎中諸有情類·聞我名已·所有善根·心心迴向·願生我國·乃至十念·若不生者·不取菩提。唯除造無間惡業·誹謗正法及諸聖人。 十八 十念必

生。

若我成佛·於他剎土·有諸眾生發菩提心·及於我所起清淨念·復以善根迴向願生極樂·彼人臨命終時·我與諸比丘眾現其人前。若不爾者·不取正覺。 十九 臨終接引。

若我成佛·無量國中所有眾生·聞說我名·以己善根迴向極樂·若不生者·不取菩提。 二十 迴向得生。

若我成佛·國中菩薩·皆不成就三十二相者·不取菩提。 二十一 三十二相。

若我成佛·於彼國中所有菩薩·於大菩提咸悉位階一生補處。唯除大願諸菩薩等。為諸眾生·被精進甲·勤行利益·修大涅槃。徧諸佛國行菩薩行·供養一切諸佛如來。安立恆沙眾生住無上覺·所修諸行復勝於前·行普賢道而得出離。若不爾者·不取菩提。 二十二 一生補處。

若我成佛·國中菩薩·每於晨朝·供養他方乃至無量億那由他百千諸佛。以佛威力·即以食前還到本國。若不爾者·不取菩提。 二十三 供他方佛。

若我成佛·於彼剎中諸菩薩眾·所須種種供具·於諸佛所植諸善根·如是色類不圓滿者·不取菩提。 二十四 供具隨意。

若我當成佛時·國中菩薩說諸法要·不善順入一切智者·不取菩提。 二十五 說法順智。

若我成佛·彼國所生諸菩薩等·若無那羅延堅固力者·不取正覺。 二十六 那羅延力。

若我成佛·周徧國中諸莊嚴具·無有眾生能總演說。乃

至有天眼者·不能了知所有雜類形色光相。若有能知及總宣說者·不取菩提。 二十七 莊嚴無盡。

若我成佛·國中具有無量色樹·高百千由旬。諸菩薩中·有善根劣者·若不能了知·不取正覺。 二十八 無量色樹。

若我成佛·國中眾生·讀誦經典·教授敷演·若不獲得勝辯才者·不取菩提。 二十九 誦經演說。

若我成佛·國中菩薩·有不成就無邊辯才者·不取菩提。 三十 無邊辯才。

若我成佛·國土光淨·徧無與等·徹照無量無數不可思議諸佛世界·如明鏡中現其面像。若不爾者·不取菩提。 三十一 國土徹照。

若我成佛·國界之內·地及虛空·有無量種香·復有百千億那由他數眾寶香爐。香氣普熏·徧虛空界。其香殊勝·超過人天珍奉如來及菩薩眾。若不爾者·不取菩提。 三十二 香氣普熏。

若我成佛·周徧十方無量無數不可思議無等界眾生之輩·蒙佛威光所照觸者·身心安樂·超過人天。若不爾者·不取正覺。 三十三 蒙光安樂。

若我成佛·無量不可思議無等界諸佛剎中菩薩之輩·聞我名已·若不證得離生·獲陀羅尼者·不取正覺。 三十四 獲陀羅尼。

若我成佛·周徧無數不可思議無有等量諸佛國中·所有女人·聞我名已·得清淨信·發菩提心·厭患女身·若於來

世不捨女人身者·不取菩提。 三十五 捨離女身。

若我成佛·無量無數不可思議無等佛剎菩薩之眾·聞我名已·得離生法·若不修行殊勝梵行·乃至到於大菩提者·不取正覺。 三十六 修勝梵行。

若我成佛·周徧十方無有等量諸佛剎中·所有菩薩·聞我名已·五體投地·以清淨心修菩薩行·若諸天人不禮敬者·不取正覺。 三十七 天人禮敬。

若我成佛·國中眾生所須衣服·隨念卽至。如佛命善來比丘·法服自然在體。若不爾者·不取菩提。 三十八 衣服隨念。

若我成佛·諸眾生類·纔生我國中·若不皆獲資具·心淨安樂·如得漏盡諸比丘者·不取菩提。 三十九 樂如漏盡。

若我成佛·國中羣生·隨心欲見諸佛淨國殊勝莊嚴·於寶樹間悉皆出現·猶如明鏡見其面像。若不爾者·不取菩提。 四十 樹中現剎。

若我成佛·餘佛剎中所有眾生·聞我名已·乃至菩提·諸根有關·德用非廣者·不取菩提。 四十一 根全用廣。

若我成佛·餘佛剎中所有菩薩·聞我名已·若不皆善分別勝三摩地名字語言·菩薩住彼三摩地中·於一剎那言說之頃·不能供養無量無數不可思議無等諸佛·又不現證六三摩地者·不取正覺。 四十二 定中供佛。

若我成佛·餘佛土中有諸菩薩·聞我名已·壽終之後·若不得生豪貴家者·不取正覺。 四十三 聞名得福。

若我成佛·餘佛剎中所有菩薩·聞我名已·若不應時修菩薩行·清淨歡喜·得平等住·具諸善根者·不取正覺。
四十四 修諸善根。

若我成佛·他方菩薩·聞我名已·皆得平等三摩地門。住是定中·常供無量無等諸佛·乃至菩提終不退轉。若不爾者·不取正覺。 四十五 平等三昧。

若我成佛·國中菩薩·隨其志願·所欲聞法·自然得聞。若不爾者·不取正覺。 四十六 隨願聞法。

若我證得無上菩提·餘佛剎中所有菩薩·聞我名已·於阿耨多羅三藐三菩提有退轉者·不取正覺。 四十七 聞名不退。

若我成佛·餘佛國中所有菩薩·若聞我名·應時不獲一二三忍·於諸佛法不能現證不退轉者·不取菩提。 四十八 獲忍現證。

說頌自要第八

爾時佛告阿難·彼法處比丘·於世間自在王如來前發此願已·承佛威神而說頌曰。

今對如來發弘誓·當證無上菩提日·若不滿足諸上願·不取十力無等尊

心或不堪常行施·廣濟貧窮免諸苦·利益世間使安樂·不成救世之法王

我證菩提坐道場·名聞不徧十方界·無量無邊異佛剎·不取十力世中尊

方趣無上大菩提·出家為捨於欲境·於彼念慧行無有。

不作調御天人師

願獲如來無量光。普照十方諸佛土。能滅一切貪恚癡。
亦斷世間諸惡趣

願得光開淨慧眼。於諸有中破冥暗。除滅諸難使無餘。
安處天人大威者

修習本行已清淨。獲得無量勝威光。日月諸天摩尼火。
所有光暉皆映蔽

最勝丈夫修行已。於彼貧窮為伏藏。圓滿善法無等倫。
於大眾中師子吼

往昔供養自然智。多劫勤修諸苦行。為求最勝諸慧蘊。
滿足本願天人尊

如來知見無所礙。一切有為皆能了。願我當成無與等。
最勝智者真導師

我若當證大菩提。如斯弘誓實圓滿。願動三千大千界。
天眾空中皆雨華

是時大地咸震動。天華鼓樂滿虛空。并雨栴檀細末香。
唱言未來當作佛

修菩薩行第九

佛告阿難。彼法處比丘。於世間自在王如來及諸天人魔
梵沙門婆羅門等前。廣發如是大弘誓願。皆已成就。世間希
有。發是願已。如實安住。種種功德。具足莊嚴威德廣大清
淨佛土。修習如是菩薩行時。經於無量無數不可思議無有等
等億那由他百千劫內。初未曾起貪瞋及癡欲害恚想。不起色
聲香味觸想。於諸眾生。常樂愛敬。猶如親屬。其性溫和。

易可同處。有來求者。不逆其意。善言勸諭。無不從心。資養所須。取支身命。少欲知足。常樂虛閑。稟識聰明。而無矯妄。其性調順。無有暴惡。於諸有情。常懷慈忍。心不詐諂。亦無懈怠。善言策進。求諸白法。普為羣生。勇猛無退。利益世間。大願圓滿。奉事師長。敬佛法僧。於菩薩行。常被甲冑。志樂寂靜。離諸染著。為令眾生常修白法。於善法中而為上首。住空無相無願。無作無生。不起不滅。無有憍慢。而彼正士行菩薩道時。常護語言。不以語言害他及己。常以語業利己及人。若入王城及諸村落。雖見諸色。心無所染。以清淨心。不愛不恚。菩薩爾時。於檀波羅蜜起自行已。又能令他行於惠施。於尸波羅蜜。乃至般若波羅蜜。起前二行。皆悉圓滿。由成如是諸善根故。所生之處。有無量億那由他百千伏藏。自然涌出。復令無量無數不可思議無等無邊諸眾生類。安住阿耨多羅三藐三菩提。如是無邊諸菩薩眾。起諸妙行。供養奉事諸佛世尊。乃至成佛。皆不可以語言分別之所能知。或作輪王。帝釋。蘇餞摩天。兜率陀天。善化天。他化自在天。大梵天王。皆能奉事供養諸佛。及能請佛轉於法輪。若作閻浮提王。及諸長者。宰官。婆羅門。刹帝利等。諸種姓中。皆能尊重供養諸佛。又能演說無量法門。從此永棄世間。成無上覺。然彼菩薩。能以上妙衣服臥具。飲食醫藥。盡形供養一切如來。得安樂住。如是種種圓滿善根。非以語言能盡邊際。口中常出栴檀妙香。其香普熏無量無數乃至億那由他百千世界。復從一切毛孔。出過人天優鉢羅華上妙香氣。隨所生處。相好端嚴。殊勝圓滿。又得諸資具自在波羅蜜多。一切服用。周徧無乏。所謂諸寶香華。幢幡繒蓋。上妙衣服。飲食湯藥。及諸伏藏。珍玩所須。皆從菩薩掌中自然流出。身諸毛孔。流出一切人天音樂。由是因緣。能令無量無數不可思議諸眾生等。安住阿

耨多羅三藐三菩提。阿難。我今已說法處菩薩本所修行。

成佛時處第十

爾時阿難白佛言。世尊。彼法處菩薩成菩提者。為過去耶。為未來耶。為今現在他方世界耶。佛告阿難。西方去此十萬億佛剎。彼有世界名曰極樂。法處比丘。在彼成佛。號無量壽。今現在說法。無量菩薩及聲聞眾。恭敬圍遶。

光明無量第十一

阿難。彼佛光明普照佛剎。無量無數不可思議。我今略說。光照東方如恒河沙等國土。南西北方四維上下。亦復如是。唯除諸佛本願威神所加。悉皆照燭。是諸佛光。或有加一尋者。或有加一由旬。乃至億那由他百千由旬光者。或普照佛剎者。阿難。以是義故。無量壽佛復有異名。謂無量光。無邊光。無著光。無礙光。光照王。端嚴光。愛光。喜光。可觀光。不思議光。無等光。不可稱量光。映蔽日光。映蔽月光。掩奪日月光。彼之光明。清淨廣大。普令眾生身心悅樂。復令一切餘佛剎中。天龍夜叉阿修羅等。皆得歡悅。阿難。我今開示彼佛光明。滿足一劫。說不能盡。

聖眾無量第十二

復次阿難。彼無量壽如來諸聲聞眾。不可稱量知其邊際。假使比丘滿億那由他百千數量。皆如大目犍連神通自在。於晨朝時。周歷大千世界。須臾之頃。還至本處。彼經億那由他百千歲數。欲共計算無量壽佛初會之中諸聲聞眾。盡其神力。乃至減度。於百分中不知其一。於千分百千分乃至鄔波尼殺曇分中亦不知其一。阿難。譬如大海。深八萬四千由旬。以目極觀。不知邊際。若有丈夫。析一毛端。為五

十分。以其一分。於大海中霑取一滴。阿難。彼之水滴。比於大海。何者為多。阿難白言。假使取千由旬水。猶以為少。況以毛端一分。而可方之。佛告阿難。假使比丘滿億那由他百千數量。皆如大目捷連。經百千億那由他歲。皆共算數彼無量壽如來初會聲聞。所知數量。如彼毛端一滴之水。餘不測者。猶如大海。諸菩薩摩訶薩眾。亦復如是。非以算計之所能知。

壽命無量第十三

阿難。彼佛壽命無量無邊。不可知其劫數多少。聲聞菩薩及諸天人。壽量亦爾。阿難白佛言。世尊。彼佛出世於今幾時。能得如是無量壽命。佛告阿難。彼佛受生。經今十劫。

國界嚴淨第十四

復次阿難。彼極樂界。無量功德具足莊嚴。國土豐稔。天人熾盛。志意和適。常得安隱。無有地獄畜生及琰魔王界。有種種香。周徧芬馥。種種妙華。亦皆充滿。有七寶幢。周布行列。其寶幢上。懸諸幡蓋及眾寶鈴。具足百千諸妙雜色。

寶樹莊嚴第十五

阿難。彼如來國。多諸寶樹。或純黃金。白銀。瑠璃。玻瓈。赤珠。碼碯。玉樹。唯一寶成。不雜餘寶。或以二寶。乃至七寶莊嚴。阿難。彼金為樹者。以金為根莖。白銀為葉及以華果。白銀之樹。銀為根莖。黃金為葉及以華果。碼碯之樹。碼碯根莖。美玉為葉及以華果。美玉樹者。玉為根莖。七寶為葉及諸華果。或有金樹。黃金為根。白銀為

莖。瑠璃為枝。玻瓈為條。赤珠為葉。碼碯為華。美玉為果。或有銀樹。以銀為根。黃金為莖。餘枝果等飾同金樹。瑠璃樹者。瑠璃為根。黃金為莖。白銀為枝。玻瓈為條。赤珠為葉。碼碯為華。美玉為果。玻瓈真珠碼碯等樹。諸寶轉飾。皆若瑠璃。復有玉樹。玉為其根。黃金為莖。白銀為枝。瑠璃為條。玻瓈為葉。赤珠為華。碼碯為果。復有無量摩尼珠等寶莊嚴樹。周徧其國。是諸寶樹。光輝赫奕。世無能比。以七寶羅網。而覆其上。其網柔軟。如兜羅絲。

佛菩提樹第十六

復次阿難。無量壽佛有菩提樹。高十六億由旬。枝葉垂布。八億由旬。樹本隆起。高五千由旬。周圓亦爾。其條葉華果。常有無量百千種種妙色。及諸珍寶殊勝莊嚴。謂月光摩尼寶。釋迦毗楞伽寶。心王摩尼寶。海乘流注摩尼寶。光暉徧照。超過人天。於其樹上。有諸金鑠。垂寶瓔珞。周徧莊嚴。謂盧遮迦寶。末瑳寶。及赤白青色真珠等寶。以為瓔珞。有師子雲聚寶等。以為其鑠。飾諸寶柱。又以純金真珠雜寶鈴鐸。以為其網。莊嚴寶鑠。彌覆其上。以玻瓈萬字半月寶等。互相映飾。微風吹動。出種種聲。令千世界諸眾生等。隨樂差別。於甚深法證無生忍。阿難。彼千世界諸有情等。聞此音已。住不退轉無上菩提。及無量無數有情。得無生法忍。復次阿難。若有眾生。見菩提樹。聞聲嗅香。嘗其果味。觸其光影。念樹功德。由此因緣。乃至涅槃。五根無患。心無散亂。皆於阿耨多羅三藐三菩提得不退轉。復由見彼菩提樹故。獲三種忍。何等為三。一者隨聲忍。二者隨順忍。三者無生法忍。此皆無量壽佛本願威神見所加及。往修靜慮。無比喻故。無缺減故。善修習故。善攝受故。善成就故。

無量壽如來會上

大寶積經無量壽如來會卷下

唐三藏法師菩提流志奉詔譯

地平無山第十七

復次阿難。彼極樂界。無諸黑山。鐵圍山。大鐵圍山。妙高山等。阿難白佛言。世尊。其四天王天。三十三天。既無諸山。依何而住。佛告阿難。於汝意云何。妙高已上。有夜摩天。乃至他化自在天。及色界諸天等。依何而住。阿難白佛言。世尊。不可思議業力所致。佛語阿難。不思議業。汝可知耶。答言。不也。佛告阿難。諸佛及眾生善根業力。汝可知耶。答言。不也。世尊。我今於此法中。實無所惑。為破未來疑網。故發斯問。

河流妙聲第十八

佛告阿難。彼極樂界。其地無海。而有諸河。河之狹者。滿十由旬。水之淺者。十二由旬。如是諸河深廣之量。或二十三十。乃至百數。或有極深廣者。至千由旬。其水清冷。具八功德。濬流恆激。出微妙音。譬若諸天百千伎樂。安樂世界。其聲普聞。有諸名華。沿流而下。和風微動。出種種香。居兩岸邊。多栴檀樹。修條密葉。交覆於河。結實開華。芳輝可玩。羣生遊樂。隨意往來。或有涉河。濯流嬉戲。感諸天水。善順物宜。深淺寒溫。曲從人好。阿難。大河之下。地布金沙。有諸天香。世無能喻。隨風散馥。雜水流芬。天曼陀羅華。優鉢羅華。波頭摩華。拘物頭華。芬陀利華。彌覆其上。復次阿難。彼國人眾。或時遊覽。同萃河

濱。有不願聞激流之響。雖獲天耳。終竟不聞。或有願聞。即時領悟百千萬種喜愛之聲。所謂佛法僧聲。止息之聲。無性聲。波羅蜜聲。十力四無所畏聲。神通聲。無作聲。無生無滅聲。寂靜聲。邊寂靜聲。極寂靜聲。大慈大悲聲。無生法忍聲。灌頂受位聲。得聞如是種種聲已。獲得廣大愛樂歡悅。而與觀察相應。厭離相應。滅壞相應。寂靜相應。邊寂靜相應。極寂靜相應。義味相應。佛法僧相應。力無畏相應。神通相應。止息相應。菩提相應。聲聞相應。涅槃相應。

不聞惡名第十九

復次阿難。彼極樂世界。不聞諸惡趣名。邊無障礙煩惱覆蔽名。無有地獄琰摩畜生名。邊無八難名。亦無苦受不苦不樂受名。尚無假設。何況實苦。是故彼國名為極樂。阿難。我今略說極樂因緣。若廣說者。窮劫不盡。

受用自然第二十

復次阿難。彼極樂世界所有眾生。或已生。或現生。或當生。皆得如是諸妙色身。形貌端正。神通自在。福力具足。受用種種宮殿園林。衣服飲食。香華瓔珞。隨意所須。悉皆如念。譬如他化自在諸天。復次阿難。彼佛國中。有微細食。諸有情類。嘗無噉者。如第六天。隨所思念如是飲食。即同食已。色力增長。而無便穢。復有無量如意妙香。塗香末香。其香普熏彼佛國界。及散華幢幡亦皆徧滿。其有欲聞香者。隨願即聞。或不樂者。終無所受。復有無量上妙衣服。寶冠環釧。耳璫瓔珞。華鬘帶鑠。諸寶莊嚴。無量光明。百千妙色。悉皆具足。自然在身。復有金銀真珠妙寶之網。懸諸寶鈴。周徧嚴飾。若諸有情所須宮殿樓閣等。隨所

樂欲·高下長短·廣狹方圓。及諸床座·妙衣敷上·以種種寶而嚴飾之。於眾生前·自然出現。人皆自謂各處其宮。

人如六天第二十一

復次阿難。極樂國土所有眾生·無差別相。順餘方俗·有天人名。阿難。譬如下賤半挖迦人·對於輪王·則無可諭。威光德望·悉皆無有。又如帝釋·方第六天·威光等類皆所不及。園苑宮殿·衣服雜飾·尊貴自在·階位神通·及以變化·不可為比。唯受法樂·則無差別。阿難。應知彼國有情·猶如他化自在天王。

雨華布地第二十二

阿難。彼極樂界·於晨朝時·周徧四方·和風微動·不逆不亂。吹諸雜華·種種香氣。其香普熏·周徧國界。一切有情·為風觸身·安和調適·猶如比丘得滅盡定。其風吹動七寶樹林·華飄成聚·高七人量。種種色光·照耀佛土。譬如有人以華布地·手按令平。隨雜色華·間錯分布。彼諸華聚·亦復如是。其華微妙·廣大柔軟·如兜羅綿。若諸有情足蹈彼華·沒深四指。隨其舉足·還復如初。過晨朝已·其華自然沒入於地。舊華既沒·大地清淨。更雨新華·還復周徧。如是中時晡時·初中後夜·飄華成聚·亦復如是。阿難。一切廣大珍奇之寶·無有不生極樂界者。

華光出佛第二十三

阿難。彼佛國中·有七寶蓮華。一一蓮華·有無量百千億葉。其葉有無量百千珍奇異色。以百千摩尼妙寶莊嚴。覆以寶網·轉相映飾。阿難。彼蓮華量·或半由旬·或一二三四·乃至百千由旬者。是一一華·出三十六億那由他百千光

明。一一光中。出三十六億那由他百千諸佛。身如金色。具三十二大丈夫相。八十隨好。殊勝莊嚴。放百千光。普照世界。是諸佛等。現往東方為眾說法。皆為安立無量有情於佛法中。南西北方。四維上下。亦復如是。

離分別相第二十四

復次阿難。極樂世界。無有昏闇。亦無火光。涌泉陂湖。彼皆非有。亦無住著家室林苑之名。及表示之像幼童色類。亦無日月晝夜之像。於一切處。標式既無。亦無名號。唯除如來所加威者。

究竟極果第二十五

阿難。彼國眾生。若當生者。皆悉究竟無上菩提。到涅槃處。何以故。若邪定聚。及不定聚。不能了知建立彼因故。

十方佛讚第二十六

阿難。東方如恆沙界。一一界中如恆沙佛。彼諸佛等。各各稱歎阿彌陀佛無量功德。南西北方四維上下。諸佛稱讚。亦復如是。何以故。他方佛國所有眾生。聞無量壽如來名號。乃至能發一念淨信。歡喜愛樂。所有善根。迴向願生無量壽國者。隨願皆生。得不退轉。乃至無上正等菩提。除五無間。誹毀正法。及謗聖者。

三輩往生第二十七

阿難。若有眾生。於他佛剎。發菩提心。專念無量壽佛。及恆種植眾多善根。發心迴向願生彼國。是人臨命終時。無量壽佛。與比丘眾前後圍遶。現其人前。即隨如來。

往生彼國·得不退轉·當證無上正等菩提。是故阿難。若有善男子善女人·願生極樂世界·欲見無量壽佛者·應發無上菩提心·復當專念極樂國土·積集善根·應持迴向。由此見佛·生彼國中·得不退轉·乃至無上菩提。阿難。若他國眾生發菩提心·雖不專念無量壽佛·亦非恆種眾多善根·隨己修行諸善功德·迴向彼佛·願欲往生。此人臨命終時·無量壽佛·即遣化身與比丘眾前後圍遶。其所化佛·光明相好·與真無異。現其人前·攝受導引。即隨化佛·往生其國·得不退轉無上菩提。阿難。若有眾生住大乘者·以清淨心向無量壽如來·乃至十念念無量壽佛·願生其國。聞甚深法·即生信解·心無疑惑。乃至獲得一念淨心。發一念心·念無量壽佛。此人臨命終時·如在夢中見無量壽佛·定生彼國·得不退轉無上菩提。阿難。以此義利故·無量無數不可思議無有等等無邊世界諸佛如來·皆共稱讚無量壽佛所有功德。

十方禮觀第二十八

佛告阿難。東方如恆河沙界·一一界中有如恆沙菩薩·為欲瞻禮供養無量壽佛及諸聖眾·來詣佛所。南西北方四維上下·亦復如是。爾時世尊而說頌曰。

東方諸佛刹。數如恆河沙。如是佛土中。恆沙菩薩眾
皆現神通來。禮無量壽佛。三方諸聖眾。禮觀亦同歸
彼於沙界中。道光諸辯論。住深禪定樂。四無所畏心
各賣眾妙華。名香皆可悅。并奏諸天樂。百千和雅音
以獻天人師。名聞十方者。究竟威神力。善學諸法門
種種供養中。勤修無懈倦。功德智慧景。能破諸幽冥

咸以尊重心。奉諸珍妙供。彼觀殊勝刹。菩薩眾無邊
願速成菩提。淨界如安樂。世尊知欲樂。廣大不思議
微笑現金容。告成如所願。了諸法如幻。佛國猶夢響
恆發誓莊嚴。當成微妙土。菩薩以願力。修勝菩提行
知土如影像。發諸弘誓心。若求徧清淨。殊勝無邊刹
聞佛聖德名。願生安樂國。若有諸菩薩。志求清淨土
了知法無我。願生安樂國。

一生補處第二十九

復次阿難。極樂世界所有菩薩。於無上菩提。皆悉安住
一生補處。唯除大願。能師子吼。擲大甲冑。摩訶薩眾。為
度羣生。修大涅槃者。

聖眾身光第三十

復次阿難。彼佛刹中諸聲聞眾。皆有身光能照一尋。菩
薩光照極百千尋。除二菩薩。光明常照三千大千世界。阿難
白佛言。世尊。彼二菩薩。名為何等。佛告阿難。汝今諦
聽。彼二菩薩。一名觀自在。二名大勢至。阿難。此二菩
薩。從娑婆世界捨壽量已。往生彼國。

妙相聖德第三十一

阿難。彼極樂界所生菩薩。皆具三十二相。膚體柔軟。
諸根聰利。智慧善巧。於差別法無不了知。禪定神通善能遊
戲。皆非薄德鈍根之流。彼菩薩中。有得初忍或第二忍者。
無量無邊。或有證得無生法忍。

常了宿命第三十二

阿難。彼國菩薩。乃至菩提。不墮惡趣。生生之處。能了宿命。唯除五濁剎中出現於世。

供他方佛第三十三

阿難。彼國菩薩。皆於晨朝。供養他方無量百千諸佛。隨所希求種種華鬘。塗香末香。幢幡繒蓋。及諸音樂。以佛神力。皆現手中。供養諸佛。如是供具。廣大甚多。無數無邊。不可思議。若復樂求種種名華。華有無量百千光色。皆現手中。奉散諸佛。阿難。其所散華。即於空中。變成華蓋。蓋之小者。滿十由旬。若不更以新華重散。前所散華。終不墮落。阿難。或有華蓋。滿二十由旬。如是三十四十。乃至千由旬。或等四洲。或徧小千中千。乃至三千大千世界。此諸菩薩。生希有心。得大喜愛。於晨朝時。奉事供養尊重讚歎無量百千億那由他佛。及種諸善根已。即於晨朝還到本國。此皆由無量壽佛本願加威。及曾供養如來。善根相續。無缺減故。善修習故。善攝取故。善成就故。

菩薩功德第三十四

復次阿難。彼極樂界諸菩薩眾。所說語言。與一切智相應。於所受用。皆無攝取。徧遊佛剎。無愛無厭。亦無希求不希求想。無自想。無煩惱想。無我想。無鬪諍相違怨瞋之想。何以故。彼諸菩薩。於一切眾生。有大慈悲利益心故。有柔軟無障礙心。不濁心。無忿恨心。有平等調伏寂靜之心。忍心。忍調伏心。有等引澄淨無散亂心。無覆蔽心。淨心。極淨心。照曜心。無塵心。大威德心。善心。廣大心。無比心。甚深心。愛法心。喜法心。善意心。捨離一切執著心。斷一切眾生煩惱心。閉一切惡趣心。故行智慧。行已。

成就無量功德。於禪定覺分。善能演說。而常遊戲無上菩提。勤修敷演。肉眼發生。能有簡擇。天眼出現。鑒諸佛土。法眼清淨。能離諸著。慧眼通達。到於彼岸。佛眼成就。覺悟開示。生無礙慧。為他廣說。於三界中。平等勤修。既自調伏。亦能調伏一切有情。能令獲得勝奢摩他。於一切法證無所得。善能說法。言辭巧妙。勤修供養一切諸佛。摧伏有情一切煩惱。為諸如來之所悅可。而能如是如是思惟。作是思惟時。能集能見一切諸法。皆無所得。以方便智。修行滅法。善知取捨理非理趣。於理趣非理趣中。皆得善巧。於世語言。心不愛樂。出世經典。誠信勤修。善巧尋求一切諸法。求一切法。增長了知。知法本無。實不可得。於所行處。亦無取捨。解脫老病。住諸功德。從本已來。安住神通。勤修深法。於甚深法。而無退轉。於難解法。悉能通達。得一乘道。無有疑惑。於佛教法。不由他悟。其智宏深。譬之巨海。菩提高廣。喻若須彌。自身威光。超於日月。凡所思擇。與慧相應。猶如雪山。其心潔白。光明普照無邊功德。燒煩惱薪。方之於火。不為善惡之所動搖。心靜常安。猶如大地。洗滌煩惑。如清淨水。心無所主猶如火。不著世間猶如風。養諸有情猶如地。觀諸世界如虛空。荷載眾生。猶如良乘。不染世法。譬之蓮華。遠暢法音。猶如雷震。雨一切法。方之大雨。光蔽賢聖。猶彼大仙。善能調伏。如大龍象。勇猛無畏。如師子王。覆護眾生。如尼拘陀樹。他論不動。如鐵圍山。修慈無量。如彼恆河。諸善法王。能為前導。如大梵天。無所聚積。猶如飛鳥。摧伏他論。如金翅王。難遇希有。如優曇華。最勝丈夫。其心正直。無有懈怠。能善修行。於諸見中。善巧決定。柔和忍辱。無嫉妒心。論法無厭。求法不倦。常勤演說。利益眾生。戒若琉璃。內外明潔。善聞諸法。而為勝寶。其所說

言。令眾悅伏。以智慧力。建大法幢。吹大法螺。擊大法鼓。常樂勤修。建諸法表。由智慧光。心無迷惑。遠眾過失。亦無損害。以淳淨心。離諸穢染。常行惠施。永捨慳貪。稟性溫和。常懷慚恥。其心寂定。智慧明察。作世間燈。破眾生暗。堪受供養。殊勝福田。為大導師。周濟羣物。遠離憎愛。心淨無憂。勇進無怖。為大法將。了知地獄。調伏自他。利益有情。拔諸毒箭。為世間解。為世間師。引導羣生。捨諸愛著。永離三垢。遊戲神通。因力。緣力。願力。發力。世俗力。出生力。善根力。三摩地力。聞力。捨力。戒力。忍力。精進力。定力。慧力。奢摩他力。毗鉢舍那力。神通力。念力。覺力。摧伏一切大魔軍力。并他論法力。能破一切煩惱怨力。及殊勝大力。威福具足。相好端嚴。智慧辯才。善根圓滿。目淨修廣。人所愛樂。其身清潔。遠離貢高。以尊重心。奉事諸佛。於諸佛所。植眾善本。拔除憍慢。離貪瞋癡。殊勝吉祥。應供中最。住勝智境。赫奕慧光。心生歡喜。雄猛無畏。福智具足。無有滯限。但說所聞。開示羣物。隨所聞法。皆能解了。於菩提分法。勇猛勤修。空無相願。而常安住。及不生不滅諸三摩地。行徧道場。遠二乘境。阿難。我今略說彼極樂界所生菩薩摩訶薩眾真實功德。悉皆如是。阿難。假令我身住壽百千億那由他劫。以無礙辯。欲具稱揚彼諸菩薩摩訶薩等真實功德。不可窮盡。阿難。彼諸菩薩摩訶薩等。盡其壽量。亦不能知。

極樂現前第三十五

爾時世尊告阿難言。此是無量壽佛極樂世界。汝應從坐而起。合掌恭敬。五體投地。為佛作禮。彼佛名稱。徧滿十方。彼一一方恆沙諸佛。皆共稱讚。無礙無斷。是時阿難即

從坐起·偏袒右肩·西面合掌·五體投地。白佛言。世尊。我今欲見極樂世界無量壽如來。并供養奉事無量百千億那由他佛·及菩薩眾·種諸善根。時無量壽佛·即於掌中放大光明·徧照百千俱胝那由他刹。彼諸佛刹·所有大小諸山·黑山·寶山·須彌盧山·迷盧山·大迷盧山·目真鄰陀山·摩訶目真鄰陀山·鐵圍山·大鐵圍山·叢薄園林·及諸宮殿天人等物·以佛光明·皆悉照見。譬如有人·以淨天眼·觀一尋地·見諸所有。又如日光出現·萬物斯覩。彼諸國中·比丘·比丘尼·優婆塞·優婆夷·悉見無量壽如來·如須彌山王·照諸佛刹。時諸佛國·皆悉明現·如處一尋。以無量壽如來殊勝光明極清淨故·見彼高座及諸聲聞菩薩等眾。譬如大地洪水盈滿·樹林山河皆沒不現·唯有大水。如是阿難。彼佛刹中·無有他論及異形類·唯除一切大聲聞眾一尋光明·及彼菩薩摩訶薩踰繕那等百千尋光。彼無量壽如來應正等覺·光明映蔽一切聲聞及諸菩薩·令諸有情悉皆得見。彼極樂界菩薩聲聞人天眾等·一切皆覩娑婆世界釋迦如來·及比丘眾圍遶說法。

彌勒述見第三十六

爾時佛告彌勒菩薩言。汝頗見具足清淨威德莊嚴佛刹·及見空中樹林園苑涌泉池沼不耶。汝見大地乃至色究竟天·於虛空中散華樹林以為莊嚴。復有眾鳥住虛空界·出種種音·猶如佛聲·普聞世界。是諸眾鳥·皆是化作·非實畜生。汝見是耶。彌勒白佛言。唯然已見。佛復告彌勒菩薩言。汝見此諸眾生·入踰繕那百千宮殿已·遊行虛空無著無礙·徧諸刹土供養諸佛·及見彼有情於晝夜分念佛相續不耶。彌勒白言。唯然盡見。佛復告言。汝見他化自在天·與極樂諸人·受用資具·有差別不。彌勒白言。我不見彼有少差別。佛告

彌勒。汝見極樂世界人住胎不。彌勒白言。世尊。譬如三十三天夜摩天等。入百由旬。若五百由旬。宮殿之內。遊戲歡樂。我見極樂世界人住胎者。如夜摩天處於宮殿。又見眾生於蓮華內。結跏趺坐。自然化生。

疑悔處胎第三十七

時彌勒菩薩復白佛言。世尊。何因緣故。彼國眾生。有胎生者。化生者。佛告彌勒。若有眾生。墮於疑悔。積集善根。希求佛智。普徧智。不思議智。無等智。威德智。廣大智。於自善根。不能生信。以此因緣。於五百歲。住宮殿中。不見佛。不聞法。不見菩薩及聲聞眾。若有眾生。斷除疑悔。積集善根。希求佛智。乃至廣大智。信已善根。此人於蓮華內結跏趺坐。忽然化生。瞬息而出。譬如他國有人來至。而此菩薩亦復如是。餘國發心。來生極樂。見無量壽佛。奉事供養。及諸菩薩聲聞之眾。阿逸多。汝觀殊勝智者。彼因廣慧力故。受彼化生。於蓮華中結跏趺坐。汝觀下劣之輩。於五百歲中。不見佛。不聞法。不見菩薩及聲聞眾。不知菩薩威儀法則。不能修習諸功德故。無因奉事無量壽佛。是諸人等。皆為昔緣疑悔所致。譬如剎帝利王。其子犯法。幽之內宮。處以華觀層樓綺殿。妙飾奇珍。寶帳金床。重敷茵褥。名華布地。燒大寶香。服御所資。悉皆豐備。而以閻浮金鎖。繫其兩足。佛告彌勒。於意云何。彼王子心。寧樂此不。答言。不也。世尊。彼幽繫時。常思解脫。求諸親識居士宰官長者近臣。王之太子。雖希出離。終不從心。乃至剎帝利王心生歡喜。方得解脫。佛告彌勒。如是如是。若有墮於疑悔。種諸善根。希求佛智。乃至廣大智。於自善根。不能生信。由聞佛名起信心故。雖生彼國。於蓮華中不得出現。彼等眾生處華胎中。猶如園苑宮殿之

想。何以故。彼中清淨。無諸穢惡。一切無有不可樂者。然彼眾生。於五百歲。不見佛。不聞法。不見菩薩及聲聞眾。不得供養奉事諸佛。不得問於菩薩法藏。遠離一切殊勝善根。彼等於中不生欣樂。不能出現修習善法。往昔世中過失盡已。然後乃出。彼於出時。心迷上下四方之所。若五百歲無疑惑者。即當供養無量百千俱胝那由他佛。并種無量無邊善根。汝阿逸多。當知疑惑。與諸菩薩為大損害。

菩薩當生第三十八

爾時彌勒菩薩白佛言。世尊。於此國界。不退菩薩當生極樂國者。其數幾何。佛告彌勒。此佛土中。有七十二億菩薩。彼於無量億那由他百千佛所種諸善根。成不退轉。當生彼國。況餘菩薩。由少善根生彼國者。不可稱計。阿逸多。從難忍如來佛國。有十八億不退菩薩。當生極樂世界。東方寶藏佛國中。有九十億不退菩薩。當生彼土。從無量聲如來國中。有二十二億不退菩薩。當生彼土。從光明如來國中。有三十二億不退菩薩。當生彼土。從龍天如來國中。有十四億不退菩薩。當生彼土。從勝天力如來國中。有十二千不退菩薩。當生彼土。從師子如來國中。有五百不退菩薩。當生彼土。從離塵如來國中。有八十一億不退菩薩。當生彼土。從世天如來國中。有六十億不退菩薩。當生彼土。從勝積如來國中。有六十億不退菩薩。當生彼土。從人王如來國中。有十俱胝不退菩薩。當生彼土。從勝華如來國中。有五百菩薩。具大精進。發趣一乘。於七日中。能令眾生離百千億那由他劫生死流轉。彼等亦當生極樂界。從發起精進如來國中。有六十九億不退菩薩。當生彼土。到彼國已。供養禮拜無量壽如來及菩薩眾。阿逸多。我若具說諸方菩薩生極樂界。若已到今到當到。為供養禮拜瞻仰無量壽佛等者。但說

其名·窮劫不盡。

付囑彌勒第三十九

阿逸多。汝觀彼諸菩薩摩訶薩·善獲利益。若有聞彼佛名·能生一念喜愛之心·當獲如上所說功德。心無下劣·亦不貢高。成就善根·悉皆增上。阿逸多。是故告汝及天人世間阿修羅等。今此法門·付囑於汝。應當愛樂修習。乃至經一晝夜·受持讀誦·生希望心。於大眾中·為他開示。當令書寫·執持經卷。於此經中·生導師想。阿逸多。是故菩薩摩訶薩·欲令無量諸眾生等·速疾安住不退轉於阿耨多羅三藐三菩提·及欲見彼廣大莊嚴攝受殊勝佛剎圓滿功德者·應當起精進力聽此法門。假使經過大千世界滿中猛火·為求法故·不生退屈諂偽之心。讀誦受持書寫經卷·乃至於須臾頃為他開示·勸令聽聞·不生憂惱。設入大火·不應疑悔。何以故。彼無量億諸菩薩等·皆悉求此微妙法門·尊重聽聞·不生違背。是故汝等應求此法。阿逸多。彼諸眾生·獲大善利。若於來世·乃至正法滅時·當有眾生·植諸善本·已曾供養無量諸佛。由彼如來加威力故·能得如是廣大法門·一切如來稱讚悅可。若於彼法攝取受持·當獲廣大一切智智·隨意所樂種諸善根。若善男子善女人等·於彼法中廣大勝解之者·當能聽聞·獲大歡喜·受持讀誦·廣為他說·常樂修行。阿逸多。無量億數諸菩薩等·求請此法·不曾厭背。是故汝等諸善男子及善女人·於今來世·能於是法·若已求現求當求者·皆獲善利。阿逸多。如來所應作者·皆已作之。汝等應當安住無疑·種諸善本。應常修學·使無疑滯。不入一切種類珍寶成就牢獄。阿逸多。如是等類大威德者·能生廣大佛法異門。由於此法不聽聞故·有一億菩薩·退轉阿耨多羅三藐三菩提。阿逸多。佛出世難。離八難身·亦為難

得。諸佛如來無上之法。十力無畏無礙無著甚深之法。及波羅蜜等菩薩之法。能說法人。亦難開示。阿逸多。善說法人。非易可遇。堅固深信。時亦難遭。是故我今如理宣說。汝等修習。應如教住。汝阿逸多。我以此法門及諸佛法。囑累於汝。汝當修行。無令滅沒。如是廣大微妙法門。一切諸佛之所稱讚。勿違佛教而棄捨之。當令汝等獲不害利。淪沒長夜。備眾危苦。是故我今為大囑累。當令是法久住不滅。應勤修行。隨順我教。

說頌諄囑第四十

爾時世尊而說頌曰。

若於福德初未修。終不聞斯微妙法。勇猛能成諸善利。
當聞如是甚深經

彼人曾見諸世尊。能作大光拯濁世。多聞總持如巨海。
彼獲聖賢喜愛心

懈怠邪見下劣人。不信如來斯正法。若曾於佛植眾善。
救世之行彼能修

譬如盲人恒處闇。不能開導於他路。聲聞於佛智亦然。
況餘有情而悟解

如來功德佛自知。唯有世尊能開示。天龍夜叉所不及。
二乘自絕於名言

若諸有情當作佛。行超普賢登彼岸。敷演一佛之功德。
時踰多劫不思議

於是中間身滅度。佛之勝慧莫能量。是故具足於信聞。
及諸善友之攝受

得聞如是深妙法。當獲愛重諸聖尊。如來勝智徧虛空。
所說義言唯佛悟

是故博聞諸智士。應信我教如實言。人趣之身得甚難。
如來出世遇亦難

信慧多時方乃獲。是故修者應精進。如是妙法已聽聞。
常念諸佛而生喜

彼人往昔真吾友。善能樂欲佛菩提

聞經獲益第四十一

爾時世尊說是經已。天人世間。有萬二千那由他億眾生。遠塵離垢。得法眼淨。二十億眾生。得阿那含果。六千八百比丘。諸漏已盡。心得解脫。四十億菩薩。於無上菩提住不退轉。被大甲冑。當成正覺。有二十五億眾生。得不退忍。有四萬億那由他百千眾生。於無上菩提未曾發意。今始初發。種諸善根。願生極樂世界。見阿彌陀佛。皆當往生彼如來土。各於異方。次第成佛。同名妙音。有八萬億那由他眾生。得授記法忍。成無上菩提。彼無量壽佛昔行菩薩道時成熟有情。悉皆當生極樂世界。憶念疇昔所發思願。皆得成滿。

地動現瑞第四十二

爾時三千大千世界。六種震動。并現種種希有神變。放大光明。普照世界。無量億那由他百千天人。同時音樂不鼓自鳴。雨天曼陀羅華。沒至於膝。乃至阿迦膩吒天。皆作種種殊妙供養。佛說經已。彌勒菩薩等。及尊者阿難。一切大眾。聞佛所說。皆大歡喜。

無量壽如來會下

佛說大乘無量壽莊嚴經

佛說大乘無量壽莊嚴經卷上

原本為(清)清龍藏本。 甲·直接校本二。 一·(大)日本大正藏本。 二·(卍)日本卍字藏本。 乙·間接校本四。 一·(麗)高麗藏本。 二·(宋)宋思溪藏本。 三·(元)元普寧藏本。 四·(明)明嘉興藏本。 此四本均據大正·麗本則兼據卍字。 大卍所刊此經·均以麗為原本。 故校勘記中·二本文字同處作麗·異處作大與卍。 文旁數字·標校勘記號數。校勘記見經文後。

宋西天三藏朝散大夫試光祿卿明教大師法賢奉詔譯

如是我聞。一時·佛在王舍城鷲峰山中。與大苾芻眾三萬二千人俱。皆得阿羅漢·具大神通。其名曰·尊者阿若憍陳如·尊者馬勝·尊者麼瑟比拏·尊者大名·尊者跋多婆·尊者稱天·尊者離垢·尊者妙臂·尊者布闍拏枳曩·尊者憍梵波提·尊者優樓頻螺迦葉·尊者那提迦葉·尊者舍利子·尊者大目乾連·尊者摩訶迦旃延·尊者摩訶俱絺羅·尊者劫賓那·尊者摩訶剎那·尊者彌多羅尼子·尊者阿那律·尊者喜·尊者緊鼻哩拏·尊者須菩提·尊者哩嚩帝·尊者佉禰囉嚩彌枳曩·尊者摩賀囉倪·尊者波囉野尼枳曩·尊者嚩拘隸曩·尊者阿難陀·尊者羅睺羅·尊者善來·如是等三萬二千人俱。

爾時尊者阿難·即從座起·偏袒右肩·右膝著地·合掌頂禮。白佛言。世尊。如來應正等覺·諸根清淨·面色圓滿·寶剎莊嚴。如是功德·得未曾有。云何所行廣大妙行·

及過去未來諸佛所行·願為宣說。佛告阿難。善哉善哉。汝為利益一切眾生·懷慈愍心·能問如來微妙之義。汝今諦聽·善思念之。如來應供正徧今為汝說。

佛告阿難。如過去無量無邊不可思議阿僧祇劫·爾時有佛世尊出現於世·名曰然燈如來·應正等覺。彼然燈佛前·復有世尊出現世間·名鉢囉多波野輸如來。又彼佛前有佛出世·名發光如來。又彼佛前·有佛出世·名贊那曩囉護如來。又彼佛前·有佛出世·名須彌劫如來。又彼佛前·有佛出世·名月面如來。又彼佛前·有佛出世·名無垢面如來。又彼佛前·有佛出世·名無著如來。又彼佛前·有佛出世·名龍主如來。又彼佛前·有佛出世·名日面如來。又彼佛前·有佛出世·名山響音王如來。又彼佛前·有佛出世·名須彌峰如來。又彼佛前·有佛出世·名金藏如來。又彼佛前·有佛出世·名火光如來。又彼佛前·有佛出世·名不動地如來。又彼佛前·有佛出世·名琉璃光如來。又彼佛前·有佛出世·名月王如來。又彼佛前·有佛出世·名日音如來。又彼佛前·有佛出世·名散華莊嚴如來。又彼佛前·有佛出世·名吉祥峰如來。又彼佛前·有佛出世·名持海慧自在通王如來。又彼佛前·有佛出世·名施光如來。又彼佛前·有佛出世·名大香象光如來。又彼佛前·有佛出世·名離一切垢如來。又彼佛前·有佛出世·名勇猛峰如來。又彼佛前·有佛出世·名寶光如來。又彼佛前·有佛出世·名持多德得通如來。又彼佛前·有佛出世·名過日月光如來。又彼佛前·有佛出世·名最上琉璃光如來。又彼佛前·有佛出世·名慧華開心行出生如來。又彼佛前·有佛出世·名大華林通王如來。又彼佛前·有佛出世·名一月光如來。又彼佛前·有佛出世·名破無明黑暗如來。又彼佛前·有佛出世·名真珠珊瑚蓋如來。又彼佛前·有佛出世·名三乘法自在王

如來。又彼佛前。有佛出世。名師子海峰自在王如來。又彼佛前。有佛出世。名梵音聲自在王如來。又彼佛前。有佛出世。名世自在王如來。應正等覺。明行足。善逝。世間解。無上士。調御丈夫。天人師。佛。世尊。而於法中。有一苾芻。名曰作法。信解第一。明記第一。修行第一。精進第一。智慧第一。大乘第一。爾時苾芻離自本處。來詣佛前。頭面禮足。於一面立。即以伽他嘆佛面色端嚴。復發廣大誓願。頌曰。

如來微妙色端嚴。一切世間無有等。光明無量照十方。
日月火珠皆暎曜

願我得佛清淨聲。法音普及無邊界。宣揚戒定精進門。
通達甚深微妙法

智慧廣大深如海。內心清淨絕塵勞。超過無邊惡趣門。
速到菩提究竟岸

亦如過去無量佛。威光普照眾生界。為彼羣生大導師。
。度脫老死令安隱

常行布施及戒忍。精進定慧六波羅。未度有情令得度。
已度之者使成佛

我以一切伸供養。百千俱胝那由他。恒河沙數佛世尊。
令我成就寂滅果

復有十方諸佛剎。恒放光明照一切。殊勝莊嚴無等倫。
願我成就利羣品

所有無邊世界中。輪迴諸趣眾生類。速生我剎受快樂。
不久俱成無上道

願我精進恆決定。常運慈心拔有情。度盡阿鼻苦眾生。
所發弘誓永不斷

爾時世尊告阿難言。彼作法苾芻說是偈已。白世自在王如來。我今發阿耨多羅三藐三菩提心。樂求無上正等正覺。唯願世尊說諸佛剎功德莊嚴。若我得聞。恆自修持嚴土之行。爾時世自在王如來告作法苾芻言。汝自思惟修何方便。而能成就佛剎莊嚴。苾芻白言。我智慧微淺。不能了知嚴剎之行。如來應正徧知。願為宣說諸佛剎土莊嚴之事。時世自在王如來。即為宣說八十四百千俱胝那由他佛剎功德莊嚴廣大圓滿之相。經於一劫。方可究竟。爾時阿難聞是事已。白佛言。世尊。彼世自在王佛壽量長短。云何說土經於一劫。佛告阿難。彼佛壽命滿四十劫。阿難。彼作法苾芻。聞佛所說八十四百千俱胝那由他佛剎功德莊嚴之事。明了通達。如一佛剎。即時會中頭面禮足。辭佛而退。往一靜處。獨坐思惟修習功德。莊嚴佛剎。發大誓願。經於五劫。爾時作法苾芻復詣世自在王如來所。五體投地。禮世尊足。禮已。合掌白佛言。世尊。如是八十四百千俱胝那由他佛剎功德莊嚴所行行願。我今成就。時世自在王如來告苾芻言。善哉善哉。汝之行願。思惟究竟。今正是時。為眾解說。時諸菩薩聞是法已。得大善利。能於佛剎修習莊嚴。

爾時作法苾芻聞佛聖旨。偏袒右肩。右膝著地。合掌向佛。即為宣說。世尊。我發誓言。願如世尊證得阿耨多羅三藐三菩提。所居佛剎。具足無量不可思議功德莊嚴。所有一切眾生。及焰摩羅界。三惡道中地獄餓鬼畜生。皆生我剎。受我法化。不久悉成阿耨多羅三藐三菩提。一切皆得身真金色。

世尊。我得菩提成正覺已。十方世界所有眾生。令生我

剎。如諸佛土人天之眾。遠離分別。諸根寂靜。悉皆令得阿耨多羅三藐三菩提。世尊。我得菩提成正覺已。十方世界所有眾生。令生我剎。得大神通。經一念中。周徧巡歷百千俱胝那由他佛剎。供養諸佛。深植善本。悉皆令得阿耨多羅三藐三菩提。世尊。我得菩提成正覺已。所有眾生。令生我剎。一切皆得宿命智通。能善觀察百千俱胝那由他劫過去之事。悉皆令得阿耨多羅三藐三菩提。世尊。我得菩提成正覺已。所有眾生。令生我剎。一切皆得清淨天眼。能見百千俱胝那由他世界粗細色相。悉皆令得阿耨多羅三藐三菩提。世尊。我得菩提成正覺已。所有眾生。令生我剎。一切皆得他心智通。善能了知百千俱胝那由他眾心心所法。悉皆令得阿耨多羅三藐三菩提。世尊。我得菩提成正覺已。所有眾生。令生我剎。一切皆得住正信位。離顛倒想。堅固修習。悉皆令得阿耨多羅三藐三菩提。世尊。我得菩提成正覺已。所有眾生。令生我剎。所修正行善根無量。徧圓寂界而無間斷。悉皆令得阿耨多羅三藐三菩提。世尊。我得菩提成正覺已。所有眾生。令生我剎。雖住聲聞緣覺之位。往百千俱胝那由他寶剎之內徧作佛事。悉皆令得阿耨多羅三藐三菩提。世尊。我得菩提成正覺已。所有眾生。令生我剎。一切皆得無邊光明。而能照曜百千俱胝那由他諸佛剎土。悉皆令得阿耨多羅三藐三菩提。世尊。我得菩提成正覺已。所有眾生。令生我剎。命不中天。壽百千俱胝那由他劫。悉皆令得阿耨多羅三藐三菩提。世尊。我得菩提成正覺已。所有眾生。令生我剎。無不善名。聞無量無數諸佛剎土。無名無號。無相無形。無所稱讚。而無疑謗。身心不動。悉皆令得阿耨多羅三藐三菩提。世尊。我得菩提成正覺已。所有眾生。求生我剎。念吾名號。發志誠心。堅固不退。彼命終時。我令無數苾芻現前圍繞。來迎彼人。經須臾間。得生我剎。悉皆令得

阿耨多羅三藐三菩提。世尊。我得菩提成正覺已。所有十方無量無邊無數世界一切眾生。聞吾名號。發菩提心。種諸善根。隨意求生諸佛剎土。無不得生。悉皆令得阿耨多羅三藐三菩提。世尊。我得菩提成正覺已。所有眾生。令生我剎。皆具三十二種大丈夫相。一生令得阿耨多羅三藐三菩提。世尊。我得菩提成正覺已。所有眾生。令生我剎。若有大願。未欲成佛。為菩薩者。我以威力。令彼教化一切眾生。皆發信心。修菩提行。普賢行。寂滅行。淨梵行。最勝行。及一切善行。悉皆令得阿耨多羅三藐三菩提。世尊。我得菩提成正覺已。所有眾生。令生我剎。於一切處。承事供養無量百千俱胝那由他諸佛。種諸善根。隨意所求。無不滿願。悉皆令得阿耨多羅三藐三菩提。世尊。我得菩提成正覺已。我剎土中所有菩薩。皆得成就一切智慧。善談諸法祕要之義。不久速成阿耨多羅三藐三菩提。世尊。我得菩提成正覺已。我居寶剎所有菩薩。發勇猛心。運大神通。往無量無邊無數世界諸佛剎中。以真珠瓔珞。寶蓋幢幡。衣服臥具。飲食湯藥。香華伎樂。供養承事。迴求菩提。速得成就阿耨多羅三藐三菩提。世尊。我得菩提成正覺已。我居寶剎所有菩薩。發大道心。欲以真珠瓔珞。寶蓋幢幡。衣服臥具。飲食湯藥。香華伎樂。承事供養他方世界無量無邊諸佛世尊。而不能往。我於爾時。以宿願力。令彼他方諸佛世尊。各舒手臂。至我剎中。受是供養。令彼速成阿耨多羅三藐三菩提。世尊。我得菩提成正覺已。我居寶剎所有菩薩。隨自意樂。不離此界。欲以真珠瓔珞。寶蓋幢幡。衣服臥具。飲食湯藥。香華伎樂。供養他方無量諸佛。又復思惟。如佛展臂至此受供。劬勞諸佛。令我無益。作是念時。我以神力。令此供具自至他方諸佛面前。一一供養。爾時菩薩不久悉成阿耨多羅三藐三菩提。世尊。我得菩提成正覺已。我居寶剎所有

菩薩·身長十六由旬·得那羅延力·身相端嚴·光明照曜·善根具足·成就阿耨多羅三藐三菩提。世尊。我得菩提成正覺已·我居寶剎所有菩薩·為諸眾生通達法藏·安立無邊一切智慧·斷盡諸結·悉得證成阿耨多羅三藐三菩提。世尊。我得菩提成正覺已·我居寶剎所有菩薩·以百千俱胝那由他種種珍寶·造作香爐·下從地際·上至空界·常以無價栴檀之香·普薰供養十方諸佛·令得速成阿耨多羅三藐三菩提。世尊。我得菩提成正覺已·所居佛剎·廣博嚴淨·光瑩如鏡·悉能照見無量無邊一切佛剎。眾生覩者·生希有心·不久速成阿耨多羅三藐三菩提。世尊。我得菩提成正覺已·我居寶剎所有菩薩·晝夜六時·恆受快樂·過於諸天·入平等總持門·身光普照無邊世界·不久得成阿耨多羅三藐三菩提。世尊。我得菩提成正覺已·所有十方無量無邊無數世界一切女人·若有厭離女身者·聞我名號·發清淨心·歸依頂禮·彼人命終·即生我剎·成男子身·悉皆令得阿耨多羅三藐三菩提。世尊。我得菩提成正覺已·所有十方無量無邊無數佛剎聲聞緣覺·聞我名號·修持淨戒·堅固不退·速坐道場·成就阿耨多羅三藐三菩提。世尊。我得菩提成正覺已·所有十方無量無邊不可思議無等佛剎一切菩薩·聞我名號·五體投地·禮拜歸命·復得天上人間一切有情尊重恭敬·親近侍奉·增益功德·成就阿耨多羅三藐三菩提。世尊。我得菩提成正覺已·所有眾生·發淨信心·為諸沙門婆羅門·染衣洗衣裁衣縫衣·修作僧服·或自手作·或使人作·作已迴向。是人所感八十一生·得最上衣·隨身豐足。於最後身·來生我剎·成就阿耨多羅三藐三菩提。

佛說大乘無量壽莊嚴經卷上

佛說大乘無量壽莊嚴經卷中

宋西天三藏朝散大夫試光祿卿明教大師法賢奉詔譯

爾時作法苾芻白世尊言。我得菩提成正覺已。所有一切眾生。聞我名號。永離熱惱。心得清涼。行正信行。得生我剎。坐寶樹下。證無生忍。成就阿耨多羅三藐三菩提。世尊。我得菩提成正覺已。所有十方一切佛剎諸菩薩眾。聞我名號。應時證得寂靜三摩地。住是定已。於一念中。得見無量無邊不可思議諸佛世尊。承事供養。成就阿耨多羅三藐三菩提。世尊。我得菩提成正覺已。所有十方一切佛剎聲聞菩薩。聞我名號。證無生忍。成就一切平等善根。住無功用離加行故。不久令得阿耨多羅三藐三菩提。世尊。我得菩提成正覺已。所有十方一切佛剎諸菩薩眾。聞我名已。生希有心。是人即得普徧菩薩三摩地。住此定已。於一念中。得至無量無數不可思議諸佛剎中。恭敬尊重供養諸佛。成就阿耨多羅三藐三菩提。世尊。我得菩提成正覺已。於我剎中所有菩薩。或樂說法。或樂聽法。或現神足。或往他方。隨意修習。無不圓滿。皆令證得阿耨多羅三藐三菩提。世尊。我得菩提成正覺已。所有十方一切佛剎聞我名者。應時即得初忍二忍。乃至無生法忍。成就阿耨多羅三藐三菩提。爾時作法苾芻。向彼佛前發如是願已。承佛威神。即說頌曰。

我今對佛前。而發誠實願。獲佛十力身。威德無等等。復為大國王。富豪而自在。廣以諸財寶。普施於貧苦。令彼諸羣生。長夜無憂惱。出生眾善根。成就菩提果

我若成正覺。立名無量壽。眾生聞此號。俱來我剎中。如佛金色身。妙相悉圓滿

亦以大悲心。利益諸羣品。願我智慧光。廣照十方剎。

除滅諸有情。貪瞋煩惱闍

地獄鬼畜生。悉捨三塗苦。亦生我剎中。修習清淨行。
獲彼光明身。如佛普照曜

日月珠寶光。其明不可比。願我未來世。常作天人師。
百億世界中。而作師子吼

如彼過去佛。所行慈愍行。廣無量無邊。俱胝諸有情。
圓滿昔所願。一切皆成佛

發是大願時。三千大千界。震動徧十方。天人空界中。
散雨一切華。栴檀及沉水

稱讚大苾芻。願力甚希有。決定當作佛。廣利眾生界

復次。阿難。時作法苾芻。對世自在王如來。及天人魔
梵沙門婆羅門阿修羅等。發是願已。住真實慧。勇猛精進。
修習無量功德。莊嚴佛剎。入三摩地。歷大阿僧祇劫。修菩
薩行。不生慳貪心。瞋恚心。愚癡心。亦無欲想。瞋想。癡
想。色聲香味觸想。心不迷亂。口不瘖瘂。身不懈怠。但樂
憶念過去諸佛所修善根。行寂靜行。遠離虛妄。堅守律儀。
常以愛語。饒益眾生。於佛法僧。信重恭敬。調順柔軟。依
真諦門。植眾德本。了空無相。無願無為。無生無滅。善護
口業。不譏他過。善護身業。不失律儀。善護意業。清淨無
染。所有國城聚落。男女眷屬。金銀珍寶。乃至色聲香味觸
等。都無所著。恆以布施。持戒。忍辱。精進。禪定。智
慧。六度之行。利樂眾生。軌範具足。善根圓滿。所生之
處。有無量無數百千俱胝那由他珍寶之藏。從地湧出。攝受
無量無數百千俱胝那由他眾生。發阿耨多羅三藐三菩提心。
如是之行。無量無邊。說不能盡。復次。阿難。作法苾芻行

菩薩行時。於諸佛所。尊重恭敬。承事供養。未曾間斷。為四大天王。恆詣佛所。恭敬禮拜。承事供養。為忉利天王。恆詣佛所。恭敬禮拜。承事供養。為夜摩天王。兜率天王。化樂天王。他化自在天王。乃至大梵天王等。恆詣佛所。恭敬禮拜。承事供養。復次。阿難。處閻浮提。為轉輪王。受灌頂位。及大臣官族等。恆詣佛所。恭敬禮拜。承事供養。為剎帝利婆羅門等。恆詣佛所。恭敬禮拜。承事供養。如是經無量無數百千萬億劫。親近諸佛。植眾德本。所集阿耨多羅三藐三菩提。

復次。阿難。作法苾芻行菩薩行時。口中常出栴檀之香。身諸毛孔出優鉢羅華香。其香普薰無量無邊不可思議那由他百千由旬。有情聞此香者。皆發阿耨多羅三藐三菩提心。復次。阿難。作法苾芻行菩薩行時。色相端嚴。三十二相。八十種好。悉皆具足。復以一切珍寶。莊嚴兩臂。手中恆出一切衣服。一切飲食。一切幢幡。一切傘蓋。一切音樂。乃至一切最上所須之物。利樂一切眾生。令發阿耨多羅三藐三菩提心。

爾時阿難聞佛所說彼作法苾芻菩薩之行。白世尊言。作法苾芻為是過去佛耶。未來佛耶。現在佛耶。世尊告言。彼佛如來。來無所來。去無所去。無生無滅。非過現未來。但以酬願度生。現在西方去閻浮提百千俱胝那由他佛剎。有世界名曰極樂。佛名無量壽。成佛已來。於今十劫。有無量無數菩薩摩訶薩。及無量無數聲聞之眾。恭敬圍繞。而為說法。彼佛光明。照於東方恆河沙數百千俱胝那由他不可稱量佛剎。如是南西北方。四維上下。亦復如是。復次。阿難。彼佛無量壽。若化圓光。或一由旬。二由旬。三由旬。或百由旬。千由旬。百千由旬。或俱胝那由他百千由旬。乃至徧

滿無量無邊無數佛刹。復次·阿難。今此光明·名無量光·
 無礙光·常照光·不空光·利益光·愛樂光·安隱光·解脫
 光·無等光·不思議光·過日月光·奪一切世間光·無垢清
 淨光。如是光明·普照十方一切世界。天龍·藥叉·乾闥
 婆·阿修羅·迦樓羅·緊那羅·摩睺羅伽·人非人等·見此
 光明·發菩提心·獲利樂故。佛告阿難。我住一劫·說此光
 明功德利益·亦不能盡。復次·阿難。無量壽如來·有如是
 百千萬·十萬·百萬·一俱胝·百俱胝·千俱胝·緊迦囉
 數·頻婆囉數·那由他數·阿由他數·毘婆訶數·嚩娑那
 數·穰伽數·阿僧祇數·十阿僧祇數·百阿僧祇數·千阿僧
 祇數·百千阿僧祇數·阿摩你野數·不可思議數·如是無量
 無數聲聞之眾·譬喻算數·數不能及。阿難。彼大目乾連·
 神通第一。三千大千世界·所有一切童男童女·於一晝夜·
 悉知其數。假使百千俱胝聲聞·神通之力·皆如大目乾連。
 又一一聲聞·壽百千俱胝那由他歲。盡其壽命·數彼聲聞·
 百分之中·不及一分。復次·阿難。譬如大海·深八萬四千
 由旬·廣闊無邊。假使有人·出身一毛·碎為百俱胝·細如
 微塵。以一一塵·投海出水。水在塵上·形量亦爾。如是投
 盡毛塵。於意云何。毛塵水多·海中水多·阿難白佛言。世
 尊。毛塵出水·未及半合·海水無量。佛言。阿難。彼目乾
 連等聲聞之眾·盡其形壽·數知數者·如毛塵之水。數未盡
 者·如海中水。如是彼佛有如是無量不可算數聲聞弟子。又
 彼佛國土·大富無量·唯受快樂·無有眾苦。無地獄·餓
 鬼·畜生·焰魔羅界·及八難之報。唯有清淨菩薩摩訶薩及
 聲聞之眾。復次·阿難。彼佛國土·有種種寶柱·皆以百千
 珍寶而用莊嚴。所謂金柱·銀柱·琉璃柱·玻瓈柱·真珠
 柱·碑磔柱·瑪瑙柱·復有金銀二寶柱·金銀琉璃三寶柱·
 金銀琉璃玻瓈四寶柱·金銀琉璃玻瓈真珠五寶柱·金銀琉璃

玻瓈真珠碑磔六寶柱。金銀瑠璃玻瓈真珠碑磔瑪瑙七寶柱。復次。阿難。彼佛國土。復有種種寶樹。根莖枝幹黃金所成。華葉果實白銀化作。亦有寶樹。根莖枝幹白銀所成。華葉果實瑠璃化作。亦有寶樹。根莖枝幹瑠璃所成。華葉果實玻瓈化作。亦有寶樹。根莖枝幹玻瓈所成。華葉果實真珠化作。亦有寶樹。根莖枝幹真珠所成。華葉果實碑磔化作。亦有寶樹。根莖枝幹碑磔所成。花葉果實瑪瑙化作。亦有寶樹。根莖枝幹瑪瑙所成。華葉果實黃金化作。亦有寶樹。黃金為根。白銀為身。瑠璃為枝。玻瓈為梢。真珠為葉。碑磔為華。瑪瑙為果。亦有寶樹。白銀為根。瑠璃為身。玻瓈為枝。真珠為梢。碑磔為葉。瑪瑙為華。黃金為果。亦有寶樹。瑠璃為根。玻瓈為身。真珠為枝。碑磔為梢。瑪瑙為葉。黃金為華。白銀為果。亦有寶樹。玻瓈為根。真珠為身。碑磔為枝。瑪瑙為梢。黃金為葉。白銀為華。瑠璃為果。亦有寶樹。真珠為根。碑磔為身。瑪瑙為枝。黃金為梢。白銀為葉。瑠璃為華。玻瓈為果。亦有寶樹。碑磔為根。瑪瑙為身。黃金為枝。白銀為梢。瑠璃為葉。玻瓈為華。真珠為果。亦有寶樹。瑪瑙為根。黃金為身。白銀為枝。瑠璃為梢。玻瓈為葉。真珠為華。碑磔為果。如是極樂世界七寶行樹。復次。阿難。彼佛國土。清淨嚴飾。寬廣平正。無有丘陵坑坎。荊棘沙礫。土石等山。黑山。雪山。寶山。金山。須彌山。鐵圍山。大鐵圍山。唯以黃金為地。

爾時阿難聞是語已。白世尊言。四大王天。忉利天。依須彌山王住。夜摩天等。當依何住。佛告阿難。夜摩兜率。乃至色無色界一切諸天。皆依空界而住。阿難白言。空界無礙。云何依住。業因果報。不可思議。佛告阿難。汝身果報。亦不可思議。眾生業報。亦不可思議。諸佛聖力。不可思議。彼佛國土。雖無大海。而有泉河。處處交流。其水或

闊十由旬·二十由旬·三十由旬·乃至百千由旬。深十二由旬。其水清淨·具八功德。出微妙聲·譬如百千萬種音樂之聲。徧諸佛剎。一切眾生·聞者適悅·得大快樂。又水兩岸·復有無數栴檀香樹·吉祥果樹·華卉恆芳·光明照曜。若彼眾生過此水時·要至足者·要至膝者·乃至要至頂者·或要冷者溫者·急流者慢流者·其水一一隨眾生意·令受快樂。又於水中出種種聲·佛聲·法聲·僧聲·止息聲·無性聲·波羅蜜聲·力聲·無畏聲·通達聲·無行聲·無生聲·無滅聲·寂靜聲·大慈聲·大悲聲·喜捨聲·灌頂聲·出如是種種微妙音聲。眾生聞已·發清淨心·無諸分別·正直平等·成熟善根·永不退於阿耨多羅三藐三菩提心。又彼佛剎其中生者·不聞地獄聲·餓鬼聲·畜生聲·夜叉聲·鬪諍聲·惡口聲·兩舌聲·殺生聲·偷盜聲·一切惡聲·而彼眾生·色相端嚴·福德無量·智慧明了·神通自在。宮殿樓閣·園林池沼·衣服臥具·如他化自在天·最上快樂之具·一切豐足。復次·阿難。彼土眾生思香華等欲供諸佛·作是念時·華香瓔珞·塗香末香·幢幡傘蓋·及諸伎樂·隨意卽至·滿佛剎中。若思飲食湯藥·衣服臥具·頭冠耳環·真珠羅網等·隨念卽至·亦徧佛剎。又復思念摩尼寶等莊嚴宮殿樓閣·堂宇房閣·或大或小·或高或下·如是念時·隨意現前·無不具足。復次·阿難。譬如有人少有財寶·對受灌頂位剎帝利王·所有威勢·悉皆不現·又剎帝利對天帝釋前·所有威勢·悉皆不現。又天帝釋對他化自在天·所有威勢·悉皆不現。又他化自在天等及色無色界一切威勢·對無量壽如來極樂國土·悉皆不現。如是彼土功德莊嚴·不可思議。

復次·阿難。彼佛國土·每於食時·香風自起·吹動寶樹。樹相振觸·出微妙音·演說苦空無常無我諸波羅蜜。復吹樹華·落於地上·周徧佛剎·高七人量·平正莊嚴·柔軟

光潔。行人往來。足躡其地。深四指量。如迦鄰那觸身安樂。過食時後。是諸寶華。隱地不現。經須臾間。復有風生。吹樹落華。布地面上。如前無異。初夜後夜。亦復如是。

復次。阿難。彼佛國土。無其黑闇。無其星曜。無其日月。無其晝夜。無其取捨。無其分別。純一無雜。唯受清淨最上快樂。若有善男子善女人。若已生。若當生。是人決定證於阿耨多羅三藐三菩提。於意云何。彼佛剎中。無三種失。一。心無虛妄。二。位無退轉。三。善無唐捐。

復次。阿難。東方有恆河沙數世界諸佛如來。出廣長舌相。放無量光。說誠實言。稱讚無量壽佛不可思議功德。南方亦有恆河沙數世界諸佛如來。出廣長舌相。放無量光。說誠實言。稱讚無量壽佛不可思議功德。西方亦有恆河沙數世界諸佛如來。出廣長舌相。放無量光。說誠實言。稱讚無量壽佛不可思議功德。北方亦有恆河沙數世界諸佛如來。出廣長舌相。放無量光。說誠實言。稱讚無量壽佛不可思議功德。如是四維上下恆河沙數世界諸佛如來。出廣長舌相。放無量光。說誠實言。稱讚無量壽佛不可思議功德。阿難。於意云何。欲令眾生聞彼佛名。發清淨心。憶念受持。歸依供養。求生彼土。是人命終。皆得往生極樂世界。不退轉於阿耨多羅三藐三菩提。

復次。阿難。若有善男子善女人。聞此經典。受持讀誦。書寫供養。晝夜相續。求生彼剎。是人臨終。無量壽如來。與諸聖眾。現在其前。經須臾間。即得往生極樂世界。不退轉於阿耨多羅三藐三菩提。

復次。阿難。若有善男子善女人。發菩提心已。持諸禁

戒·堅守不犯·饒益有情·所作善根·悉施與之·令得安樂·憶念西方無量壽如來·及彼國土·是人命終·如佛色相種種莊嚴·生寶剎中·賢聖圍繞·速得聞法·永不退轉於阿耨多羅三藐三菩提。

復次·阿難·若有善男子善女人·發十種心·所謂一不偷盜·二不殺生·三不婬欲·四不妄言·五不綺語·六不惡口·七不兩舌·八不貪·九不瞋·十不癡·如是晝夜思惟極樂世界無量壽佛種種功德·種種莊嚴·志心皈依·頂禮供養·是人臨終·不驚不怖·心不顛倒·即得往生彼佛國土·有無量無數諸佛世尊·稱讚無量壽佛功德名號·聞是法已·永不退於阿耨多羅三藐三菩提。

佛說大乘無量壽莊嚴經卷中

佛說大乘無量壽莊嚴經卷下

宋西天三藏朝散大夫試光祿卿明教大師法賢奉詔譯

復次·阿難·東方恆河沙數佛剎·一一剎中·有無量無數菩薩摩訶薩·及無量無數聲聞之眾·以諸香華幢幡寶蓋·持用供養極樂世界無量壽佛·南方恆河沙數佛剎·一一剎中·亦有無量無數菩薩摩訶薩·及無量無數聲聞之眾·以諸香華幢幡寶蓋·持用供養極樂世界無量壽佛·西方恆河沙數世界·一一佛剎·亦有無量無數菩薩摩訶薩·及無量無數聲聞之眾·以諸香華幢幡寶蓋·持用供養極樂世界無量壽佛·北方恆河沙數佛剎·一一佛剎·亦有無量無數菩薩摩訶薩·及無量無數聲聞之眾·以諸香華幢幡寶蓋·持用供養極樂世界無量壽佛·四維上下·亦復如是·各禮佛足·稱讚佛土功

德莊嚴。爾時世尊卽說頌曰。

東方世界恆河沙。一一剎中無數量。菩薩聲聞發勝心。
各以香華寶蓋等

持至莊嚴佛剎中。供養如來無量壽。供已禮足而稱讚。
最上希有大福田

如是西南及北方。四維上下恆沙界。聲聞菩薩數亦然。
皆以香華伸供養

禮足旋繞懷敬愛。復讚如來宿願深。積聚功德普莊嚴。
無量無邊極樂國

諸佛國界雖嚴飾。難比如來寶剎中。復以天華供養佛。
華散虛空為傘蓋

縱廣量等百由旬。色相莊嚴無有比。徧覆如來寶剎中。
互相慶慰生歡喜

曾於過去百千劫。積集無量眾善根。捨彼輪迴三有身。
令至解脫清淨剎

爾時彼佛無量壽。化導他方菩薩心。密用神通化大光。
其光從彼面門出

三十六億那由他。普照俱胝千佛剎。如是人天普照已。
卽入如來頂髻中

時會一切諸眾生。敬歎佛光未曾有。各各俱發菩提心。
願出塵勞登彼岸

爾時世尊說此偈已。會中有觀自在菩薩。卽從座起。合
掌向佛。而作是言。世尊。以何因緣。無量壽佛。於其面

門。放無量光。照諸佛刹。唯願世尊。方便解說。令諸眾生。及他方菩薩。聞是語已。生希有心。於佛菩提。志樂趣求。入不退位。

爾時世尊告觀自在菩薩言。汝今諦聽。吾為汝說。彼佛如來。於過去無量無邊阿僧祇劫前。為菩薩時。發大誓言。我於未來成正覺時。若有十方世界無量眾生聞我名號。或頂禮憶念。或稱讚歸依。或香華供養等。如是眾生。速生我刹。見此光明。即得解脫。若諸菩薩見此光明。即得受記。證不退位。手持香華及諸供具。往十方界無邊淨刹。供養諸佛。而作佛事。增益功德。經須臾間。復還本土。受諸快樂。是故光明而入佛頂。

復次。阿難。無量壽佛應正等覺所有菩提之樹。高一千六百由旬。四布枝葉。八百由旬。根入土際。五百由旬。華果敷榮。作無量百千珍寶之色。於其樹上。復以月光摩尼寶。帝釋摩尼寶。如意摩尼寶。持海摩尼寶。大綠寶。莎悉帝迦寶。愛寶瓔珞。大綠寶瓔珞。紅真珠瓔珞。青真珠瓔珞。及金銀寶網等。種種莊嚴。

復次。阿難。每於辰時。香風自起。吹此寶樹。樹相敦觸。出微妙音。其聲普聞無量世界。眾生聞者。無其耳病。乃至成就阿耨多羅三藐三菩提。若有眾生。見此樹者。乃至成佛。於其中間。不生眼病。若有眾生。聞樹香者。乃至成佛。於其中間。不生鼻病。若有眾生。食樹果者。乃至成佛。於其中間。舌亦無病。若有眾生。樹光照者。乃至成佛。於其中間。身亦無病。若有眾生。觀想樹者。乃至成佛。於其中間。心得清淨。遠離貪等煩惱之病。佛告阿難。如是佛刹華果樹木。與諸眾生而作佛事。皆是彼佛過去大願之所攝受。

復次·阿難。彼佛剎中所有現在及未來生一切菩薩摩訶薩·一生令得阿耨多羅三藐三菩提。若有菩薩以宿願故·入生死界·作師子吼·利益有情·我令隨意而作佛事。

復次·阿難。彼佛剎中一切菩薩·及諸聲聞·身相端嚴·圓光熾盛·周徧照耀百千由旬·有二菩薩·身光遠照三千大千世界。阿難白言。此二菩薩有大身光·其名云何。佛告阿難。二菩薩者·一名觀自在·二名大精進·現居此界·作大利樂。命終之後·當生彼國。

復次·阿難。彼佛剎中一切菩薩·容貌柔和·相好具足。禪定智慧·通達無礙。神通威德·無不圓滿。深入法門·得無生忍。諸佛祕藏·究竟明了。調伏諸根·身心柔軟。安住寂靜·大乘涅槃。深入正慧·無復餘習。依佛所行·七覺聖道。修行五眼·照真達俗。辯才總持·自在無礙。善解世間·無邊方便。所言誠諦·深入義味。度諸有情·演說正法。三界平等·離諸分別。無相無為·無因無果。無取無捨·無縛無脫。遠離顛倒·堅固不動。如須彌山。智慧明了·如日月朗。廣大如海·出功德寶。熾盛如火·燒煩惱薪。忍辱如地·一切平等。清淨如水·洗諸塵垢。如虛空無邊·不障一切故。如蓮華出水·離一切染故。如雷震響·出法音故。如雲鬘鬘·降法雨故。如風動樹·發菩提芽故。如牛王聲·異眾牛故。如龍象威·難可測故。如良馬行·乘無失故。如師子坐·離怖畏故。如尼拘樹·覆蔭大故。如須彌山·八風不動故。如金剛杵·破邪山故。如梵王身·生梵眾故。如金翅鳥·食毒龍故。如空中禽·無住處故。如慈氏觀·法界等故。如是菩薩·徧滿佛剎。吹法螺·豎法幢·擊法鼓·然法燈。離過清淨·無迷無失。手中出生華鬘瓔珞·塗香末香·一切供具·持往百千俱胝那由他佛

剎。供養諸佛。復於手中。別出寶華。散虛空中。化成寶蓋。廣十由旬。或二十由旬。乃至百千由旬。徧諸佛剎。經須臾間。還來本國。無愛無著。無取無捨。身心寂靜。

佛告阿難。此諸菩薩。我土五濁之所無有。經百千俱胝劫。說不能盡。佛告阿難。吾今此土所有菩薩摩訶薩。已曾供養無量諸佛。植眾德本。命終之後。皆得生於極樂世界。阿難。汝起合掌。面西頂禮。爾時阿難。即從座起。合掌面西頂禮之間。忽然得見極樂世界無量壽佛。容顏廣大。色相端嚴。如黃金山。又聞十方世界諸佛如來稱揚讚歎無量壽佛種種功德。阿難白言。彼佛淨剎。得未曾有。我亦願樂生於彼土。世尊告言。其中生者菩薩摩訶薩。已曾親近無量諸佛。植眾德本。汝欲生彼。應當一心歸依瞻仰。作是語時。無量壽佛於手掌中放無量光。照於東方百千俱胝那由他佛剎。於此世界。所有黑山。雪山。金山。寶山。目真鄰陀山。摩訶目真鄰陀山。須彌山。鐵圍山。大鐵圍山。大海江河。叢林樹木。及天人宮殿。一切境界。無不照見。譬如日出。明照世間。亦復如是。爾時會中苾芻。苾芻尼。優婆塞。優婆夷。天龍。藥叉。乾闥婆。阿修羅。迦樓羅。緊那羅。摩睺羅伽。人非人等。皆見極樂世界種種莊嚴。及見無量壽如來聲聞菩薩圍繞恭敬。譬如須彌山王。出于大海。爾時極樂世界。過於西方百千俱胝那由他國。以佛威力。如對目前。又見彼土。清淨平正。譬如海面。無有丘陵山嶮。草木雜穢。唯是眾寶莊嚴。聖賢共住。

復次。阿難。又彼無量壽佛。與諸菩薩聲聞之眾。亦皆得見我身。及娑婆世界菩薩聲聞人天之眾。

爾時世尊告慈氏菩薩言。汝見極樂世界功德莊嚴。宮殿樓閣。園林臺觀。流泉浴池不。慈氏。汝見欲界諸天。上至

色究竟天·兩種香華·徧遍滿佛剎·作莊嚴不。汝見菩薩聲聞淨行之眾·而作佛聲·演說妙法·一切佛剎·皆得聞聲·獲利樂不。汝見百千俱胝眾生·游處虛空·宮殿隨身不。慈氏菩薩白佛言·世尊·如佛所說·一一皆見。慈氏白言·云何此界一類眾生·雖亦修善·而不求生。佛告慈氏·此等眾生·智慧微淺·分別西方不及天界·是以非樂·不求生彼。慈氏白言·此等眾生·虛妄分別·不求佛剎·何免輪迴。佛言·慈氏·極樂國中·有胎生不。慈氏白言·不也。世尊·其中生者·譬如欲界諸天·居五百由旬宮殿·自在游戲·何有胎生。世尊·此界眾生·何因何緣·而處胎生。佛言·慈氏·此等眾生·所種善根·不能離相·不求佛慧·妄生分別·深著世樂人間福報·是故胎生。若有眾生·以無相智慧·植眾德本·身心清淨·遠離分別·求生淨剎·趣佛菩提·是人命終·剎那之間·於佛淨土·坐寶蓮華·身相具足·何有胎生。慈氏·汝見愚癡之人·不種善根·但以世智聰辯·妄生分別·增益邪心·云何出離生死大難。復有眾生·雖種善根·供養三寶·作大福田·取相分別·情執深重·求出輪迴·終不能得。佛告慈氏·譬如受灌頂位剎帝利王·置一大獄·於其獄內·安置殿堂樓閣·鈎欄窻牖·床榻座具·皆以珍寶嚴飾·所須衣服飲食·無不豐足。爾時灌頂王驅逐太子·禁閉獄中·復與錢財珍寶·羅紈匹帛·恣意受用。佛告慈氏·於意云何·彼太子得快樂不。慈氏白言·不也。世尊·彼中雖有堂殿樓閣·飲食衣服·錢帛金寶·隨意受用·身閉牢獄·心不自在·唯求出離。佛告慈氏·若灌頂王不捨其過·彼諸大臣長者居士等·可令太子免禁獄不。慈氏白言·王既不捨·云何得出。佛言·如是如是·彼諸眾生·雖復修福·供養三寶·虛妄分別·求人天果·得報之時·所居器界·宮殿樓閣·衣服臥具·飲食湯藥·一切所

須·悉皆豐足。而未能出三界獄中·常處輪迴·而不自在。假使父母妻子·男女眷屬·欲相救免·終不能出·邪見業王·未能捨離。若諸眾生·斷妄分別·植諸善本·無相無著·當生佛剎·永得解脫。慈氏菩薩白佛言。世尊。今此娑婆世界·及諸佛剎·有幾多菩薩摩訶薩·得生極樂世界·見無量壽佛·成就阿耨多羅三藐三菩提。佛言。慈氏。我此娑婆世界·有七十二俱胝那由他菩薩摩訶薩·已曾供養無量諸佛·植眾德本·當生彼國·親近供養無量壽佛·成就阿耨多羅三藐三菩提。

復次·阿難。難忍佛剎·有十八俱胝那由他菩薩摩訶薩·生彼國土。寶藏佛剎·有九十俱胝那由他菩薩摩訶薩·生彼國土。火光佛剎·有二十二俱胝那由他菩薩摩訶薩·生彼國土。無量光佛剎·有二十五俱胝那由他菩薩摩訶薩·生彼國土。世燈佛剎·有六十俱胝那由他菩薩摩訶薩·生彼國土。龍樹佛剎·有一千四百菩薩摩訶薩·生彼國土。無垢光佛剎·有二十五俱胝那由他菩薩摩訶薩·生彼國土。師子佛剎·有一千八百菩薩摩訶薩·生彼國土。吉祥峰佛剎·有二千一百俱胝那由他菩薩摩訶薩·生彼國土。仁王佛剎·有一千俱胝那由他菩薩摩訶薩·生彼國土。華幢佛剎·有一俱胝菩薩摩訶薩·生彼國土。光明王佛剎·有十二俱胝菩薩摩訶薩·生彼國土。得無畏佛剎·有六十九俱胝那由他菩薩摩訶薩·生彼國土。悉皆親近供養無量壽佛·不久當成阿耨多羅三藐三菩提。佛言。慈氏。如是功德莊嚴極樂國土·滿彼算數無量之劫·說不能盡。若有善男子善女人·得聞無量壽佛名號·發一念信心·歸依瞻禮。當知此人·非是小乘·於我法中得名第一弟子。

佛告慈氏。若有苾芻·苾芻尼·優婆塞·優婆夷·天

龍·藥叉·乾闥婆·阿修羅·迦樓羅·緊那羅·摩睺羅伽·人非人等·於此經典·書寫供養·受持讀誦·為他演說·乃至於一晝夜思惟彼剎及佛身功德。此人命終·速得生彼·成就阿耨多羅三藐三菩提。

復次·慈氏。今此經典·甚深微妙·廣利眾生。若有眾生·於此正法·受持讀誦·書寫供養。彼人臨終·假使三千大千世界滿中大火·亦能超過·生彼國土。是人已曾值過去佛·受菩提記。一切如來·同所稱讚。無上菩提·隨意成就。佛言。慈氏。佛世難值·正法難聞。如來所行·亦應隨行。於此經典·作大守護。為諸有情·長夜利益。莫令眾生·墮在五趣莊嚴獄中。令諸有情·種修福善·求生淨剎。爾時世尊·而說頌曰。

若不往昔修福慧。於此正法不能聞。已曾供養諸如來。是故汝等聞斯義

聞已受持及書寫。讀誦讚演并供養。如是一心求淨方。決定往生極樂國

假使大火滿三千。及彼莊嚴諸牢獄。如是諸難悉能超。皆是如來威德力

彼佛利樂諸功德。唯佛與佛乃能知。聲聞緣覺滿世間。盡其神力莫能測

假使長壽諸有情。命住無數俱胝劫。稱讚如來功德身。盡其形壽讚無盡

大聖法王所說法。利益一切諸羣生。若有受持恭敬者。佛說此人真善友

爾時世尊說此法時。有十二俱胝那由他人。遠塵離垢。得法眼淨。八百苾芻。漏盡意解。心得解脫。天人眾中。有二十二俱胝那由他人。證阿那含果。復有二十五俱胝人。得法忍不退。復有四十俱胝百千那由他人。發阿耨多羅三藐三菩提心。種諸善根。皆願往生極樂世界。見無量壽佛。復有十方佛刹。若現在生。及未來生。見無量壽佛者。各有八萬俱胝那由他人。得然燈佛記。名妙音如來。當得阿耨多羅三藐三菩提。彼諸有情。皆是無量壽佛宿願因緣。俱得往生極樂世界。佛說是語時。三千大千世界。六種震動。雨諸香華。積至于膝。復有諸天。於虛空中。作妙音樂。出隨喜聲。乃至色界諸天悉皆得聞。歎未曾有。爾時尊者阿難。及慈氏菩薩等。并天龍八部。一切大眾。聞佛所說。皆大歡喜。信受奉行。

佛說大乘無量壽莊嚴經卷下

[淨空法師專集網站\(簡\)](#)製作